

ታይቦ ማጻፋ ጊደ ቆፋ

ታይቦ ማጻፋይ ኢስራኤል አሳይ ሲና ዙማፔ ቦሶፔ ደሚዲ ጸሲ ኢስታስ አማናስ ጫቂዳ ማላ ኦርሼይ ሞኪዛ ባጋራ ዲዛ ቆሳኮ ማታና ጋካናስ ሃኒዳ 40 ላይላ ሃኖ ዮቲስ። ሃ ማጻፋዛ ሱንላ ማጻፋዛ ጊደን ጸፊቲዳ አይፌ ዮኦ ቤሴስ። ሃ ማጻፋይ ሄቩ አይፌ ዮኦታን ሻኬቲስ፤ ኮይሮዚ ኢስራኤል አሳይ ሲና ዙማ ዬዲ ባናፔ ካሴ ሄሳፉካ ኢሲ ዬሌታፔ ጉዬ ዮርዳኖሴ ሻፋፔ ኦርሼይ ሞኪዛ ባጋራ ዲዛ ሞኦቤን ሙሴይ ዴሬዛ ቆዲዳይሳ ቤሴስ (1:1—10:10)። ናምኦንሶዚ ዴሬይ ናምኦቶ ቆዴቲዳይሳ ጋርሳን ኢስራኤል አሳይ ዱጌሃ ባጋራ ዲዛ ካናኔ ቆስ ጊዲዳ ቃዴሴ ባሪኔ ጋኪዴስ፤ ጊደ ኦቲን ኢስታስ ሂዶታይ ኢሜቲዳ ዴሬዮ ጌላናስ ዳንዳይቤቲና፤ ሄሳ ጊሻስ ኢስቲ ሄን ዳሮ ላይላ ጋምኢዳፔ ጉዬ ዮርዳኖሴ ሻፋፔ ኦርሼይ ሞኪዛ ባጋራ ዲዛ ዴሬ ቢዳይሳ ቤሴስ (10:11—21:20)። ሄቭንሶዚ ባጋ ዴሬዚ ሄን ዳናስ ቃቺን ሃንኮ ኦቲዳ ዴሬይ ዮርዳኖሴ ሻፋፔ ጌዴ ፒኒዲ ካናኔ ባናስ ጊቴቲዳይሳ ቤሴስ (21:21—36:13)። ታይቦ ማጻፋይ ዮቲዛይ ዳሮ ዎዴ ሜቶይ ኢስታ ቦላ ጋኪሺን ባቢዛይታኔ ሂዶታ ቃንጺዛይታ፥ ጸሳ ቦላኔ ኢስታ ካሌላናስ ጸሲ ኢስታስ ዶሪዳ ሙሴ ቦላ ማካሊዛ ዴሬታ ጊሻሳ፤ ዴሬዚ ኦዛላኔ ማካላ ጊዲኮካ ጸሲ አሳ ሎኤላ ኦልኢሶን ኦይኪዳይሲ ታሪኬዛን ቆንጨዴስ፤ ሄሳፉካ ኢሲ ኢሲቶ ሙሴስ ዳንዳይይ ቆይኮካ ኢዛስ ሚኖ ኦማኖይ ዲዛ ጊሻስ ኢዚ ጸሳሲኔ ዴሬዛስ ኦማኔቲላን ኦሊዳይሲ ቆንጨዴስ።

ሃ ማጻፋይ ኦይኪዳ ኩሜላ ቆፋ

ሲና ዙማፔ ዴንዲዲ ባናስ ኢስራኤል አሳ ጊቴላ 1:1—9:23

ዴሬዚ ዴንዳናፔ ሲንላን ቆዴቲዴስ 1:1—4:49

ዲማ ዲማ ዎጋታኔ ማራታ 5:1—8:26

ፓዚጋ ባኦሌ ናምኦንሶ ቦንቾ 9:1-23

ሲና ዙማፔ ሞኦቤ ዴሬ ቡስ 10:1—21:35

ሞኦቤ ዴሬን ፖሌቲዳ ሃኖታ 22:1—32:42

ጊብጼፔ ሞኦቤ ዴሬ ጋካናስ ቡስ 33:1-49

ዮርዳኖሴ ሻፋ ፒናናፔ ካሴ ኢሜቲዳ ኦዛዞታ 33:50—36:13

ኢስራኤል ኣሳሰ ኮይሮ ቆዴቲል

¹ ኢስራኤል ኣሳይ ገብጾፔ ኬዚዳ ናሞኣንሉ ላይላን ናሞኣንላ ኣገናይ ዶሚዳ ኮይሮ ጋላስ ኢስቲ ሲና ባዞን ዲሺን ጎዳይ ጋይቶቲላ ዲንካኔ ገደን ሙሴራ ጋይቲዲ፤

² «ኣቱማሳ ኢሳ ኢሳ ሱንላን ሱንላን ጳፋዳ ኢስራኤል ኣሳ ቆሞን ቆሞኒኔ ዛርኬን ዛርኬን ቆዳ።

³ ኔኒኔ ኣሮኔይ ኢስታስ ላይላይ ናሞኡ ታሙኔ ኢዛፔ ቦላራ ዲዛ ኦሌቲ ዳንዳያና ኣቱማሳታ ኢስታ ማራን ማራን ቆዲቲ።

⁴ ዱማ ዱማ ዛርኬታፔ ኢስታ ካሌሊዛ ኢስታስ ኣዋቲዛ ኮራፒኔቲ ኢንቴናራ ገዴቶ።

⁵ ኢንቴና ማዳናይታ ሱንሊ ሃይሳፌ ካሊ ዲዛይታ፡ ኦሮቤሌ ዛርኬፌ ሻዱሬ ና ኤልዱሬ፤

⁶ ሲሞና ዛርኬፌ ጸርሻዳዬ ና ሳሉሞኤል፤

⁷ ዩሁዳ ዛርኬፌ ኣሚናዳቤ ና ኔኣሶኔ፤

⁸ ዩሳኮሬ ዛርኬፌ ጸኣሬ ና ናቲናኤል፤

⁹ ዛቢሎኔ ዛርኬፌ ሄሎኔ ና ኤልያቤ፤

¹⁰ ዮሴፌ ናይታፔ ኤፍሬሜ ቆሞቲ ኣሚሁዳ ና ኤልሻማ ሚናሴ ናይታፔ ፔዳዱሬ ና ጋማልኤል፤

¹¹ ቢኒያሜ ዛርኬፌ ገዲኦኔ ና ኣቢዳኔ፤

¹² ዳኔ ዛርኬፌ ኣሚሻዳዬ ና ኣሂኤዜሬ፤

¹³ ኣሴሬ ዛርኬፌ ኦክራ ና ፋጉኤል፤

¹⁴ ጋዴ ዛርኬፌ ዳኡኤል ና ኤልያሳፌ፤

¹⁵ ኒፍታሌሜ ዛርኬፌ ኤናኔ ና ኣሂሬ» ገ ዮቲዳስ።

¹⁶ ማባራ ጋርሳፌ ዛርኬፌ ዛርኬፌ ኢስራኤል ኣሳ ካሌላናስ ዶሬቲዳ ኮራፒኔቲ ሃይታንታ።

¹⁷ ሙሴይኔ ኣሮኔይ ሃይታ ባንታ ሱንላን ጳፌቲዳይታ ኤኪዳ።

¹⁸ ናሞኣንሉ ኣገናይ ዶሚዳ ኮይሮ ጋላስ ማባራዛ ኩሚል ኢሲ ቦላ ሺሺዲ ዛርኬን ዛርኬኒኔ ዳቦን ዳቦን ሺሺዳፔ ጉዬ ዳሬዛ ቆዲዳ፤ ዬሌቲን ላይላይ ናሞኡ ታሙ ኩሚዳይታኔ ሃሳፌካ ቦላራ ገዲዳ ኣቱማሳ ኢስታ ሱንላን ሱንላን ማዘጋቢ ቆዲዳ።

¹⁹ ሃሳላካ ሙሴይ ጎዳይ ኣዛዚዳ ማላ ሲና ባዞን ዳሬዛ ቆዲዳስ።

²⁰ ኦላ ኦሌታናስ ዳንዳይዛይታ ላይላይ ናሞኡ ታማኔ ሄሳፌካ ቦላራ ዲዛይቲ ባንታ ዛርኬፌ ዛርኬፌ ቆዴቲዳ፤ ኣዴታ ቆዳይ ሃይሳፌ ካሊዛይሳ፤

²¹ ኦሮቤሌ ዛርኬፌ 46,500፤

²²⁻²³ ሲሞና ዛርኬፌ 59,300፤

²⁴⁻²⁵ ጋዴ ዛርኬፌ 45,650፤

26-27 የሁዳ ዛርኬፌ 74,600፥

28-29 ዩሳኮሬ ዛርኬፌ 54,400፥

30-31 ዛቢሎኔ ዛርኬፌ 57,400፥

32-33 ዮሴፌ ና ኤፍሬሜ ዛርኬፌ 40,500፥

34-35 ዮሴፌ ና ሚናሴ ዛርኬፌ 32,200፥

36-37 ቢኒያሜ ዛርኬፌ 35,400፥

38-39 ዳኔ ዛርኬፌ 62,700፥

40-41 ኣሴሬ ዛርኬፌ 41,500፥

42-43 ኒፍታሌሜ ዛርኬፌ 53,400።

44 ሙሴይ፡ ኣርኔይኔ ታማኔ ናምኡ ኢሰራኤል ዛርኬታ ኮራፒኔቲ ቆዲዳ ኣቱማ ኣሳይ ሃይታንታ፤

45 ኣላስ ባና ዳንዳይዛ ኣዳቲ ኡባይ ኢስታስ ላይላይ ናምኡ ታማኔ ሄሳፌካ ቦላራ ዲዛይቲ ባ ዛርኬን ዛርኬን ቆዳቲዳ።

46 ሄይታ ቆዳይ ኢሲ ቦላ 603,550 ጊዲዴስ።

47 ጊዶ ኣቲን ሃንኮ ዛርኬታራ ለዌ ዛርኬቲ ቆዳቲቤቴና።

48 ካሴ ጎዳይ ሙሴስ፥

49 «ኔ ኢሰራኤል ኣቱማ ኣሳ ቆዳሼ ለዌ ዛርኬታ ኢስታራ ጋላ ቆዶፓ።

50 ለዌ ዛርኬቲ ጊዲኮ ጋይቶቲላ ዳንካኔኔ ኢዛ ጊዶን ጎኤቲዛ ሚሻ ቦላ ኣላፌቲላ ኢማ፤ ኢስቲ ዳንካኔዛኔ ኢዛ ጊዶን ጎኤቲዛ ሚሻታ ኡባ ቶኬቶ፤ ዳንካና ጊዶን ኦፊቶ፤ ኢዛ የሾን ዳንካኒ ኡቴቶ።

51 ኢንቲ ካሴ ዳንካኒ ዲዛሶፔ ዴንዲ ቢዛ ዎዴ ለዌ ዛርኬቲ ጸላላ ዳንካኔዛ ሾዲ ላሊዲ ኢስቲ ሼምፒዛ ኦራላሶን ኢስታካ ቶኬቶ፤ ኢስታፌ ኣቲን ዳንካናኮ ሺቂዛ ኣይ ኣሲካ ሃይቆን ቃጸዬቶ።

52 ሃንኮ ኣቲዳ ኢሰራኤል ኣሳይ ባ ቡቴን ቡቴኒኔ ባ ዲዛ ጉታን ጉታን ባ ባንዲራ ባንዲራ ቶኬቶ።

53 ጊዶ ኣቲን ኣይ ኣሲካ ዳንካናኮ ሺቂዲ ታና ሃንቁሊዲ ኢሰራኤል ዴቦ ዳይሲሶንታ ማላ ለዌ ዛርኬቲ ሄ ዳንካኔዛ የሾን ዳንካኒዲ ናጌቶ» ጊዴስ።

54 ሄሳ ጊሻስ ኢሰራኤል ኣሳይ ጎዳይ ሙሴ ኣዛዚዳ ማላ ኡባካ ኦሊዳ።

2

ዛርኬታ ቡቴን ቡቴን ሻኬሬል

- 1 ጎዳይ ሙሴሲኔ ኣሮኔስ ሂዝጊዳስ፡
- 2 «ኢሰራኤል ኣሳይ ባ ባጋ ባጋ ኣሳ ኤሪሲዛ ማላታኔ ባንታ ዛርኬ ዛርኬ ኤሪሲዛ ባንዲራ ካሊዲ ጋይቶቴላ ዱንካኔዛፔ ጉላሪ ሃኪዲ ኢዛ ዩሾን ዱንካኖ።»
- 3 ኣርሼይ ሞኪዛ ባጋራ ዩሁዳ ዛርኬቲ ኡቴቶ፤ ዩሁዳ ዛርኬ ካሌላናይ ኣሚናዳቤ ና ኔኣሶኔ።
- 4 ኢዚ ካሌሊዛ ኣሳ ቆዳይ 74,600።
- 5 ዩሁዳ ዛርኬታፔ ካሊዲ ዩሳኮሬ ቆሞቲ ኢስታ ማታን ዱንካኒ ኡቴቶ፤ ዩሳኮሬ ዛርኬታ ካሌላናይ ጸኣሬ ና ናቲናኤሌ።
- 6 ሄ ኢዛፔ ጋርሳራ ዲዛ ኣሳ ቆዳይ 54,400።
- 7 ዩሳኮሬ ዛርኬታፔ ካሊዲ ዛቢሎኔ ዛርኬቲ ዱንካኒ ኡቴቶ፤ ዛቢሎኔ ዛርኬታ ካሌላናይ ሄሎኔ ና ኤልያቤ።
- 8 ኢዛሰ ዲዛ ኣሳ ቆዳይ 57,400።
- 9 ባ ዛርኬን ዛርኬን ጊዲዲ ዩሁዳ ዛርኬቲ ዱንካኒዳ ባጋራ ኡቲዳ ኣሳ ቆዳይ ኩሜል 186,400፤ ኣሳፔ ሲንል ቢዛይ ሃይሳ ሃ ቡቴዛን ዲዛ ኣሳ።
- 10 ዱጌሃ ባጋራ ኦርቤሌ ዛርኬቲ ባ ባጋታ ኤሪሲዛ ማላታ ጋርሳን ዱንካኒ ኡቴቶ፤ ኦርቤሌ ዛርኬታ ካሌሊዛይ ሻዱሬ ና ኤልጸሬ።
- 11 ኢስታ ቆዳይ 46,500።
- 12 ኦርቤሌ ዛርኬታፔ ካሊዲ ሲሞና ዛርኬቲ ዱንካኒ ኡቴቶ፤ ኢስታ ካሌላናይ ጸርሻዳዬ ና ሳሉሞኤሌ።
- 13 ኢስታ ቆዳይ 59,300።
- 14 ኢስታፌ ካሊዲ ጋዴ ዛርኬቲ ዱንካኒ ኡቴቶ፤ ጋዴ ዛርኬታ ካሌላናይ ኤራኡኤሌ ና ኤልያሳፌ።
- 15 ሂይታንታ ቆዳይ 45,650።
- 16 ኢስቲ ባ ዛርኬን ዛርኬን ጊዲዲ ኦርቤሌይ ዱንካኒ ኡቲዳ ባጋራ ዱንካኒዳ ኣሳ ቆዳይ ኩሜል 151,450 ጊዲዳስ፤ ዩሁዳ ቡቴዛፔ ካሊዲ ናሞኣንሶራ ቢዛይ ኦርቤሌ ቡቴዛ።
- 17 ኮይሮ ናሞኡ ቡቴታፔኔ ወርሴላ ናሞኡ ቡቴታፔ ጊደን ሌዌ ባጋቲ ጋይቶቴላ ዱንካኔዛ ቶኪዲ ቤቶ፤ ኢሲ ኢሲ ቡቴይ ባ ቆሞይ ሻኬቲ ኤሬታና ማላ ዱማ ማላታ ጋርሳን ባንታ ታራ ታራ ናጊዲ ቤቶ።

18 እርሼይ ወሊዛ ባጋራ ኤፍሬሜ ዛርኬቲ ባ ባጋታ ኤሪሲዛ ማላ ጋርሳን ዱንካኒ ኡቴቶ፤ ኤፍሬሜ ዛርኬ ካሌፋናይ አሚሁዴ ና ኤልሻማ።

19 ኢስታስ ቆዳይ 40,500።

20 ኤፍሬሜ ዛርኬታፔ ካሊዲ ሚናሴ ዛርኬቲ ዱንካኒቶ፤ ሚናሴ ዛርኬታ ካሌፋናይ ፔዳጹሬ ና ጋማልኤሌ።

21 ኢስታ ቆዳይ 32,200።

22 ኢስታፌ ካሊዲ ቢኒያሜ ዛርኬቲ ዱንካኒ ኡቴቶ፤ ቢኒያሜ ዛርኬታ ካሌፋናይ ጊዲኦኔ ና አቢዳኔ።

23 ሄ ኢስታ ቆዳይ 35,400።

24 ኢስቲ ባ ዛርኬን ዛርኬን ጊዲዲ ኤፍሬሜ ዛርኬቲ ዱንካኒ ኡቴዳ ባጋራ ዱንካኒዳ አሳ ቆዳይ 108,100 ጊዲዴሰ፤ ኦርቤሌ ቡቴዛ ካሊዲ ሄዻንሶን ኤፍሬሜ ቡቴይ ቦ።

25 ፑዴሃ ባጋራ ዳኔ ዛርኬቲ ባ ባጋታ ኤሪሲዛ ማላታ ጋርሳን ዱንካኒ ኡቴቶ፤ ዳኔ ቆሞታ ካሌፋና ሃላቃይ አሚሻዴዬ ና አሂኤዜሬ።

26 ኢስታ ቆዳይ 62,700።

27 ዳኔ ዛርኬታፔ ካሊዲ አሴሬ ዛርኬቲ ዱንካኒ ኡቴቶ፤ አሴሬ ዛርኬታ ካሌፋና ሃላቃይ ኦክራ ና ፋጉኤሌ።

28 ኢስታ ቆዳይ 41,500።

29 ኢስታፌ ካሊዲ ኒፍታሌሜ ዛርኬቲ ዱንካኒ ኡቴቶ፤ ኒፍታሌሜ ዛርኬታ ካሌፋና ሃላቃይ ኤናኔ ና አሂሬ።

30 ሄይታንታ ቆዳይ 53,400።

31 ኢስቲ ባ ዛርኬን ዛርኬን ጊዲዲ ዳኔ ዛርኬቲ ዱንካኒ ኡቴዳ ባጋራ ዱንካኒዳ አሳ ቆዳይ ኩሜስ 157,600 ጊዲዴሰ። ሄሳሞ ዳኔ ዛርኬቲ ወርሴፋን ኦይዳንሶ ማራን ቤቶ።

32 ኢስራኤሌ አሳይ ባሶን ባሶኒኔ ባ ዛርኬን ዛርኬን ማዘጋቤቲዳይታ ቆዳይ ኢሲ ቦላ 603,550 ጊዲዴሰ።

33 ሌዌ ዛርኬቲ ጊዲኮ ጎዳይ ካሴ ሙሴ አዛዚዳ ማላ ሃንኮ ኢስራኤሌ አሳራ ቆዴቲቤቴና።

34 ሄሳ ማላን ኢስራኤሌ አሳይ ጎዳይ ካሴ ሙሴ አዛዚዳ ማላ ኦሲዳ፤ ኢስታ ዛርኬታፔ ኢሶይ ኢሶይ ባ ባንዲራ ባንዲራ ካሊ ካሊ ዱንካኒ ኡቴዴሰ፤ ኢሶይ ኢሶይ ባ ሶ አሳራ ኢሲፌ ሄሜቴሰ።

3

አርኔ አቱማ ናይታ

1 ጎዳይ ሙሴ ሲና ዙማ ቦላ ሃሳይሲዛ ዋዴ ኣሮኔ ዩሌታይኔ ሙሴ ዩሌታይ ሃይሳፌ ካሊ ዲዛይሳ፤
 2 ኣሮኔስ ኦይዱ ኣቱማ ናይቲ ዴቲስ፤ ሄይቲካ ባይራዚ ናዳቤ ጊዲሺን ሃንኮይቲ ኣቢሁ፥ ኤልኤዘሬኔ ኢታማሬ።
 3 ሄይቲ ቄሴቴላን ኦላና ማላ ቲዬቲዳኔ ሱሚዳ።
 4 ጊዶ ኣቲን ኢስታ ጋርሳፌ ናዳቤይኔ ኣቢሁይ ሲና ባዞን ጎዳ ሲንላን ቤሶንታ ታማ ኤሂዲ ኤሊዳ ጊሻሰ ጎዳ ሃንቆን ቦሼቲ ሃይቂዳ፤ ኢስታስ ናይ ባይንዳ ጊሻሰ ኤልኤዘሬይኔ ኢታማሬይ ጸላ ኢስታ ኣዋ ኣሮኔይ ሼምፖራ ፓጸ ዲዛ ዋዴ ኡባን ቄሴቴላን ኦሊዳ።

ሌዌታ ኦሶ

5 ጎዳይ ሙሴስ ሂዝጊዴስ፥
 6 «ኔኒ ሌዌ ዛርኬታ ሺሻዳ ኢስቲ ቄሴ ኣሮኔ ኦሶን ማዳና ማላ ዋላ።
 7 ኢስቲ ኣሮኔኔ ኩሜላ ማባራ ጋይቶቴላ ዱንካኔዛ ጊዶን ኦሊ ማዶን ባ ኦሶዛ ኦሊ ፖሌቶ።
 8 ጋይቶቴላ ዱንካኔዛ ጊዶን ዲዛ ኦሶ ሚሻታስ ኢስታ ኣላፌ ጊዴቶ፤ ዱንካኔዛ ጊዶን ኢሰራኤሌ ኣሳሰ ኦሴቲዛ ኦሶ ኦሊ ፖሌቶ።
 9 ኢሰራኤሌ ኣሳ ኡባፌ ኢስቲ ሻኬቲዲ ኣሮኔኔ ኢዛ ናይታ ኦሶን ማዳና ማላ ሌዌ ዛርኬታ ዋላ።
 10 ቄሴቴላ ኦሶዛ ኢስቲ ፖላና ማላ ኣሮኔኔ ኢዛ ናይታ ኔ ሱንሳ፤ ኢስታፌ ኣቲን ሃራ ኣሲ ሃይሳ ሃ ኦሶዛ ኦላናስ ጋይቶቴላ ዱንካኔዛኮ ሺቂዛ ጊዲኮ ኢዛዴይ ሃይቆን ቃጸዬቶ።»
 11 ጎዳይ ሙሴስ ሂዝጊዴስ፥
 12-13 «ሄኮ ሌዌ ቆሞቲ ታስ ሃጋዚዛይታ፤ ታኒ ጊብጼ ዴሬ ኣሳ ባይራ ወርሳ ዋዲ ዋዴ ኢሰራኤሌ ኣሳፔ ኢሳፌ ኢሳፌ ዩሌቲዳ ባይራኔ ኢስታ ሜሄታ ባይራታ ኩሜላ ታስ ዱማሳዲስ፤ ጊዶ ኣቲን ሃኢ ቃሴ ባይራ ጊዲ ዩሌቲዳ ኣቱማ ናይታ ሶሆን ሌዌ ዛርኬታ ታኒ ታስ ዶራዲስ፤ ኢስቲ ታስ ኦሊዛይታ ጊዳና፤ ታኒ ጎዳ።»

ሌዌታ ቆዴቴላ

14 ጎዳይ ሙሴስ ሲና ዙማ ቦላ ሂዝጊዴስ፥

15 «ለዌ ዛሬ ታ ኢስታ ኢስታ ዛርኬን ዛርኬኒኔ ኢስታ ቆሞን ቆሞን ቆዳ፤ ዩሌቲን ኢዛስ ኢሲ ኣገና ኩሚዳይሳኔ ሃሳፌ ቦላራ ዲዛ ኣቱማ ና ዉርሳካ ቆዳ።»

16 ሙሴይካ ጎዳይ ኢዛ ኣዛዚዳ ማላ ቆዲዴስ።

17 ለዌስ ሄቹ ኣቱማ ናይቲ ዳቲስ፤ ሄይቲካ ጌርሾኔ፥ ቃኣቲኔ ሜራሬ ጌቲቲቲስ።

18 ጌርሾኔ ዛርኬቲ ሊቢናኔ ሸምኤ ጌቲቲቲስ።

19 ቃኣቲ ዛርኬቲ ኣሚራሜ ዪዲሃሬ፥ ኬብሮኔኔ ኡዚኤሌ ጌቲቲቲስ

20 ሜራሬ ዛርኬቲ ማሂሌኔ ሙሽ ጌቲቲቲስ፤ ሄይታንቲ ባ ሱንላን ሱንላን ባ ኬላ ኣሳስ ኣዋቲዛይታ።

21 ሊቢናኔ ሸምኤ ኬላ ኣሳይ ጌርሾኔ ዛርኬን ቆዴቲዳ።

22 ዩሌቲን ኢሲ ኣገና ጌዲዳ ናፔ ደሚዲ ማዝጋቤቲዳ ኣቱማሳ ቆዳይ 7,500።

23 ጌርሾኔ ባጋቲ ዲንካኔዛፔ ጉዬ ባጋራ ኣርሼይ ዉሊዛ ባጋራ ዲንካኒዳ።

24 ጌርሾኔ ባጋታ ካሌሊዛይ ላኤሌ ና ኤልያሳፌ።

25 ጋይቶቲላ ዲንካኔን ጌርሾኔ ዛርኬታ ኣላፌቲሊ፥ ጋይቶቲላ ዲንካኔዛ ካማታኔ ፔንጌ ቦላ ቃጵቲዛ ማጋላሻታ።

26 ጊቤዛ ጊዶ ማጋላሻታ፥ ዲንካኔዛኔ ያርሾ ያርሺዛሶዛ ዩዪ ኣጲዳ ጊቤዛ ፔንጋ ማጋላሻ ቶሌታኔ ሃሳላካ ሄይታንታስ ጊዲዛ ሚሻታ ኡባታ ናጎ።

27 ኣሚራሜ፥ ዪዲሃሬ፥ ኬብሮኔኔ ኡዚኤሌ ሶ ኣሳይ ቃኣቲ ዛርኬን ቆዴቲዳ።

28 ዩሌቲን ኢሲ ኣገናኔ ሃሳፌ ቦላራ ጌዲዳ ኣቱማሳ ቆዳይ 8,600፤ ሄይታንቲ ጋይቶቲላ ዲንካኔዛ ናጌቲስ።

29 ቃኣቲ ዛርኬቲ ጋይቶቲላ ዲንካኔዛፔ ጉዬራ ዲጌሃ ባጋራ ዲንካኒዳ።

30 ቃኣቲ ቆሞታ ካሌሊዛ ኮራፒኔይ ኡዚኤሌ ና ኤልጸፋኔ።

31 ኢስታ ኣላፌቲሊ ጫቆ ቃላ ታቦታ ቦላ፥ ማዳ ኢዛ ቦላ ዋሊዛ ጸራጴዛ ቦላ፥ ጸምፔ ኢዛ ቦላ ዋሊዛይሳ ቦላ፥ ያርሾ ኢዛ ቦላ ያርሺዛይሳ ቦላ፥ ቄሴቲ ዲማ ቆልኣዛን ጎኤቲዛ ሚሻታ ቦላ፥ ጌዴ ዲንካኔዛስ ኡባፌ ዲማቲዳ ጊዶ ቆልኣ ጌሊዛሶ ባጋራ ዲዛ ማጋላሻ ጊዲሺን ኩሜላ ሃይታ ሃ ሚሻታ ቦላ ኢስታስ ናጋና ኣላፌቲሊ ዴስ።

32 ለዌ ዛርኬ ኡባ ሃላቃይ ቄሴ ኣሮኔ ና ኤልኤዜሬ፤ ኢዚ ዲማቲዳ ቆልኣን ኦሊዛይታ ኡባ ቦላ ኣላፌ።

33 ማሂሌ ሶ አሳይኔ ሙሹ ሶ አሳይ ሜራሬ ዛርኬራ ኢሲኖ ጊዲዳ፤ ሄይቲ ሜራሬ ዛርኬን ቆዳቲዳ።

34 ዩሌቲን ኢሲ አገና ጊዲዳ ጉላ ናፔ ዶሚዲ ቆዳቲዳ አቱማሳ ቆዳይ ኡሱፑን ታማኔ ናምኡ ጾታ።

35 ሜራሬ ዛርኬታ ካሌሊዛይ ጸሪኤሌ ና አቢኤሌ፤ ኢስቲ ጋይቶቲላ ዱንካኔዛፔ ፑዳሃ ባጋራ ዱንካኒ ኡቲዳ።

36 ኢስታ አላፌቴላ ዱንካኔዛ ቶሌታ፣ ኮላታታ፣ ቱሳታኔ ቱሳታ ኢስታን ኤሲዛ ቶሆታ፣ ሄሳሶካ ሃራ ኦሶስ ጎኤቲዛ ሚሻታ ቦላኔ ሄይታንታስ ቤሲዛ ኦሶታ ኦላና አላፌቴላ ዳስ።

37 ሄሳሶካ ጊቤዛ ዩሾን ዲዛ ቱሳታ፣ ዱንካኔዛ ቶሌታ፣ ጲሽኬታኔ ቶሌ ዎዶርታ ቦላ አላፌቴላ ዳስ።

38 ጋይቶቲላ ዱንካኔዛፔ አርሼይ ሞኪዛ ባጋራ ዱንካኒ ኡታናይቲ ሙሴ፣ አሮኔኔ ኢዛ ናይታ፤ ጋይቶቲላ ዱንካኔ ጊደን ኢስራኤሌ አሳ ጊሻስ ኦሴቲዛ አይ ኦሶ ጊዲሶካ ሄ ኦሶዛ ዎጋ ፖሊሲዛ አላፊይ ኢስታ ጊዳቶ፤ ሃራይ ኦኒካ ጌዴ ጋይቶቲላ ዱንካኔ ኬላዛኮ ሺቂኮ ሃይቆን ቃጸዬቶ።

39 ጎዳይ ኢስታ አዛዚዳ ማላ ሙሴይኔ አሮኔይ ዩሌቲን ኢሲ አገና ጊዲዳ ናፔ ዶሚዲ አሳይ ባ ኬላን ኬላን ማዘጋቢዳ ለዌ ቆሞታፔ አቱማ ናይቲ ኩሜል 22,000 ጊዲዳ።

ሌዌ ዛርኬታ ዶሬቴል

40 ጎዳይ ሙሴስ፣ «ኢስራኤሌን ባይራ ጊዲ ዩሌቲዳ አቱማ ናይታስ ላይላይ ኢሲ አገናኔ ሄሳፌ ቦላራ ጊዲዳይታ ቆዳዳ ኢስታ ሱንላ ጸፋ።

41 ኢስራኤሌ አሳ ባይራ ናይታ ኡባ ሳማ ሌዌ ናይታ፣ ሄሳሶካ ኢስራኤሌ አሳ ሜሄ ባይራ ኡባ ሳማ ሌዌ ቆሞታ ሜሄ ኤካ፤ ታኒ ጎዳ» ጊዳስ።

42 ሙሴይካ ባና ጎዳይ አዛዚዳ ማላ ኢስራኤሌ አሳ ጋርሳን ባይራ ጊዲ ዩሌቲዳይታ ኡባ ቆዲዳስ።

43 ኢስቲ ዩሌቲን ኢሲ አገናኔ ሄሳፌ ቦላራ ጊዲዳ ባይራ አቱማ ናይታ ኡባ ኢስታ ሱንላን ሱንላን ቆዲን ኢስታ ቆዳይ 22,273 ጊዲዳስ።

44 ጎዳይ ሙሴስ ሂዘጊዳስ፣

45 «ሄሳ ጊሻስ ባይራ ጊዲ ዩሌቲዳ ኢስራኤሌ አሳ አቱማ ናይታ ሶሆን ሌዌታ ኔ ታስ ሻካ፤ ሄሳሶካ ኢስራኤሌ አሳ ሜሄ ባይራ ሶሆን ሌዌታ ሜሄ ታስ ዲማሳ፤ ታኒ ጎዳ።

46 ኢስራኤሌ አሳይ ዩሊዳ ባይራ ናይታ ቆዳይ ሌዌ ቆሞታፔ 273 ጊዲ ዳሪዛ ጊሻስ ሄይታ ቲርፓ አቱማ ናይታ ሚሻን ዎዛ።

47 ኢሳ ኢሳ ዋዛናሰ ጋይቶቴላ ዱንካኔ ሜዛኔዛ ማላ ኢቻሹ ሳቂሌ ቢራ ኤካ፤
 48 ሄ ኣተዳ ዋዛ ሚሻ ኣሮኔሲኔ ኢዛ ናይታሰ ኢማ።»
 49 ሙሴይካ ለዌ ቆዋታን ዋዜቲዳይታፔ ቦላራ ቲርፒዳ 273 ኣሳታ ጊሻሰ ሸቂዳ ዋዛ ሚሻ ኤኪዴሰ።
 50 ኢሰራኤሌ ኣሳ ባይራታፔ ጋይቶቴላ ዱንካኔ ሜዛኔዛ ማላ ሚሻ 1,365 ሳቂሌ ቢራ ኤኪዴሰ።
 51 ጎዳይ ኣዛዚዳ ማላ ሙሴይ ዋዛ ሚሻ ኣሮኔሲኔ ኢዛ ናይታሰ ኢሚዴሰ።

4

ቃኣቴ ዛርኬታ ኦሶ

1 ጎዳይ ሙሴሲኔ ኣሮኔሰ ሂዝጊዴሰ፤
 2 «ለዌ ናይታ ጊዶፌ ቃኣቴ ዛሬታ ኢሰታ ሶ ኣሳን ኣሳን ኢሰታ ማታ ዳቦን ዳቦን ቆዳ።
 3 ጋይቶቴላ ዱንካኔዛን ኦላናሰ ዳንዳይዛይታ፡ ኢሰታ ላይሊ ሄሹ ታማፌ ቢዲ ኢቻሹ ታሙ ጋካናሰ ዲዛ ኣቱማሳታ ኡባ ማዝጋባ።
 4 ኢሰቲ ኦላና ኦሶይ ጋይቶቴላ ዱንካኔዛ ጊዶን ዲዛ ኡባፌ ዲማ ጌሻ ሚሻታ ናጎ ጊዳና።
 5 ኣሳይ ባ ዲዛሶፔ ዴንዲ ቢሺን ኣሮኔይኔ ኢዛ ናይቲ ዱንካኔዛን ጌሊዲ ጫቆ ቃላ ታቦታዛ ሲንላን ዲዛ ማጋላሻ ዲጌ ዋሊዲ ጫቆ ቃላ ታቦታዛ ኢዛን ጸጹቶ።
 6 ኢዛ ካማናሰ ቃጩቲዳ ጋልባ ማጋላሻዛ ቦላራ ዋሊዲ ሄሳ ቦላ ሙሌራ ሳሎ ሚሳቲዛ ካሬላ ማይኦ ኢዛ ቦላ ሚጪዲ ማይዜቶ፤ ሂሰቲዲ ቶሆ ሚሳታ ቃላባቴ ሉኮዛን ጌልሌቶ።
 7 «ጎዳሰ ሸቂዛ ዲማ ኡኬላ ኢዛ ቦላ ዋሊዛ ጋባቴዛ ሳሎ ሚሳቲዛ ካሬላ ጫርቃን ካሜቶ፤ ጋባቴዛ ቦላ ሸልኤታ፡ ጪልፋታ፡ ጸኣታኔ ዋይኔ ኡሹ ዲቂዛ ሚሻታኔ ኡኬል ኡባ ዋዴ ፓጩይ ባይንዳ ኢዛ ቦላ ዋሌቶ።
 8 ሄሳ ኡባ ዞኦ ጫርቃን ካሚዲ ቦላራ ቃጩቲዳ ጋልባ ማይዜቶ፤ ኢሰታን ቶኪዛ ቶሆ ሚሳታ ቃላባቴ ሉኮዛን ጌልሌቶ።
 9 «ሳሎ ሚሳቲዛ ካሬላ ጫርቃዛ ኤኪዲ ጸዋፔ ኢዛ ቦላ ዋሊዛይሳኔ ጸዋፔታ፡ ቃጹታኔ ቢዲንል ዋሊዛ ኮንኣታ፡ ሂሳሶዛ ዛይቴ ዋሊዛ ሚሻታ ኡባ ኢሲ ቦላ ካሜቶ።
 10 ጸዋፔዛኔ ጸዋፔዛሰ ኮሺዛ ሚሻታ ኡባዛ ኢዛ ካሚዛ ጋልባን ጸጺዲ ኢዛራ ቶኪዛ ሃላ ቦላ ዋሌቶ።

11 «ካሌሊዲ ዋርቃፌ ኦሴቲዳ ያርሾ ያርሺዛይሳ ቦላ ሳሎ መሳተዛ ጫርቃን ካሚዲ ቃጩቲዳ ጋልባ ቦላራ ማይዚዲ ቶሆ መላታ ኢዛን ጌልሌቶ።

12 ጋይቶቴላ ዱንካኔን ጎኤቲዛ መሻታ ኡባ ኤኪዲ ሳሎ ማላ ካሬላ ጫርቃን ካሚቶ፤ ቃጩቲዳ ሌኤ ጋልባ ኢዛ ቦላራ ካሚዲ ቶሆ መላ ቦላ ዋሌቶ።

13 ቢዲንላዛ ያርሾ ያርሺዛሶዛ ቦላፌ ፒቲዲ ያርሾ ያርሺዛሶዛ ኦቻ ቲራ መሳተዛ ጫርቃን ካሚቶ።

14 ያርሾ ያርሺዛሶዛን ኦላናሰ ጎኤቲዛ መሻታ ሄይቲካ ሁላሊታ፥ ሚንጾታ፥ ታማ ካሺዛ መሻታኔ ጉቃ ሳኔታ ኢዛ ቦላ ዋሌቶ፤ ቃጩቲዳ ሌኤ ጋልባ ኢዛ ቦላ ካሚዲ ቶሆ መላታ ኢዛን ጌልሌቶ።

15 ኢሰቲ ባ ዲዛ ሄራፔ ዳንዲ ቢሺን ኣርኔይኔ ኢዛ ናይቲ ጌሻ መሻታኔ ሄ መሻቲ ኢሰታን ጎኤቲዛ መሻታ ኡባካ ካሚዳፔ ጉዬ ቃኦቲ ናይቲ ዪዲ ቶኬቶ፤ ጊዶ ኦቲን ኢሰቲ ሃይቆንታ ማላ ሄ ጌሻ መሻታ ኩሺን ቦቻናሰ ቤሰና፤ ሄሳ ጊሻሰ ጋይቶቴላ ዱንካኔዚ ዳንዲዛ ዋዴ ሄሲ ወሪካ ቃኦቲ ናይታ ኣላፌቲላ።

16 «ቄሴዛ ኣርኔ ና ኤልኤዜሬይ ጸምፔዛ ዛይቲ ሎኦ ሳዋ ሳዋዛ ኤጻኔ፥ ኡባ ዋዴ ሽቂዛ ካላ ያርሾዛኒኔ ቲዬቲዛ ዛይቲዛ ቦላ ኢዛሰ ኣላፌቲሊ ዴኦ፤ ሄሳሶካ ጋይቶቴላ ዱንካኔዛኔ ኢዛ ጊዶንካ ዲዛ ጌሻ መሻታ ኡባ ና፡»

17 ጎዳይ ሙሴኔ ኣርኔ ሂዘጊዴሰ፥

18 «ቃኦቲ ናይቲ ለዌ ቆሞታ ጊዶፌ ጳያና ማላ ኦሶፍቲ።

19 ጌዴ ኡባፌ ዴማ ጌሻ መሻታኩ ሽቂዲ ኢሰቲ ሃይቆንታ ማላ ኢሰታ ኣርኔይኔ ኢዛ ናይቲ ጋይቶቴላ ዱንካኔን ጌሊዲ ኣሳሰ ኢሳሰ ኢሳሰ ኦሶኔ ኢዛዴ ቶሆ ሻኪ ኢሚቶ።

20 ጊዶ ኦቲን ኢሰቲ ሃይቆንታ ማላ ቃኦቲ ናይቲ ዱንካኔዛ ጊዶ ጌሊዲ ቤያናሰ ጉላ ዋዴሰካ ጴሎፔቶ።»

ጌርሾኔ ዛርኬታ ኦሶ

21 ጎዳይ ሙሴሰ ሂዘጊዴሰ፥

22 «ለዌ ዛርኬታ ጋርሳፌ ጌርሾኔ ናይታ ኢሰታ ዳቦን ዳቦኒኔ ኢሰታ ዬሌታን ዬሌታን ቆዳ።

23 ጋይቶቴላ ዱንካኔዛን ኦላናሰ ዳንዳይዛይታ ሄቩ ታሙ ላይላፌ ቢዲ ኢቻሹ ታሙ ላይላ ጋካናሰ ዲዛ ኦቲማሳታ ኡባ ቆዳ።

24 «ዴማ ዴማ መሻታ ቶካና ኣላፌቲሊ ኢሰታሰ ዴሰ።

25 ጋይቶቴላ ዱንካኔዛ ሶ ባጋራኔ ካሬ ባጋራ ካሚዛ ቦላራካ ኢዛ ቦላ ካሚዛ ቃጮቲዳ ሌኤ ጋልባኔ ጌሎሶ ፔንጌዛካ ቶኬቶ።

26 ሄሳሶካ ዱንካኔዛኔ ያርሾ ያርሾሶሆ ጊቤዛ ዩዩ አጂዳ ማጋላሻታ፡ ቶሌ ዋዶሮታ፡ ጊቤ ጌሊዛሶ ፔንጌ ማጋላሻታኔ ሄይታንታ ኦላናሰ ጊጌቲዳ ሚሻታካ ኢሰቲ ቶኬቶ፤ ሄይታ ሄ ሚሻታሰ ጊዲዛ አይ ኦሶካ ኢሰቲ ፖሌቶ።

27 ጌርሾኔ ናይቲ ኦሊዛ ኦሶ ጊዲን ዋይኮ ቶሆ ጊዲን ኣሮኔይኔ ኢዛ ናይቲ ኢሰታ ኣዛዚዳ ማላ ኦፊቶ፤ ኢሰቲ ቶካናሰ ቤሲዛ ሚሻ ኩሚል ኔ ኢሰታሰ ጊሻ ኢማ።

28 ጋይቶቴላ ዱንካኔዛ ጊደን ጌርሾኔ ናይታ ኦሶይ ሄሳ፤ ኢሰታ ኦሶ ቄሴ ኣሮኔ ና ኢታማሬይ ጸሊ ኦሲሶ።

ሜራሬ ዛርኬታ ኦሶ

29 «ሌዌ ዛርኬፌ ጊዲዳ ሜራሬ ናይታ ኢሰታ ዛርኬን ዛርኬኒኔ ኢሰታ ዩሌታን ዩሌታን ቆዳ።

30 ጋይቶቴላ ዱንካኔ ጊደን ኦላናሰ ዳንዳይዛይታ ኢሰታሰ ላይላይ 30 ላይላፌ ቢዲ 50 ላይላ ጋካናሰ ዲዛ አቱማሳታ ኡባ ቆዳ።

31 ኢሰቲ ቶካናሰ ቤሲዛይ ዱንካኔዛ ቶሌታኔ ቶሌታ ጊዶራ ጌሊዛይታ፡ ቱሳታ፤ ዱንካኔዚ ኢዛን ቶሌቲዛ ሚሻታ።

32 ሄሳሶካ ዱንካኔዛ ዩሾን ዲዛ ዴምባን ኤቁዛ ቱሳታ ቶሆታ፤ ቶሌታ ዋዶሮታኔ ሄይታ ኡባታሰ ኮሺዛ ሚሻታ፤ ኢሲ ኢሲ ኣሲ ቶካናሰ ቤሲዛ ሚሻይ ኢዛ ሱንላን ሱንላን ኢዛሰ ኡቶ።

33 ቄሴ ኣሮኔ ና ኢታማሬይ ኦሶዛ ናጌቲ ኦሲሳናሰ ጋይቶቴላ ዱንካኔ ጊደን ሜራሬ ናይታ ሶ ኣሳ ኦሶይ ሃይሳ።»

ሌዌ ዛርኬታ ቆዳ

34 ሙሴይ፡ ኣሮኔይኔ ዴሬዛ ሃላቃቲ ቃኣቲ ዜሬላታ ኢሰታ ዛርኬን ዛርኬኒኔ ኢሰታ ዳቦን ዳቦን ቆዲዳ።

35 ጋይቶቴላ ዱንካኔዛ ጊደን ኦላናሰ ኦሶን ጌሊዳይታ ኩሚል 30 ላይላፌ ቢዲ 50 ላይላ ጊዲዳይታ ቆዲዳ።

36 ቆዴቲዳ አሳይ 2,750 ጊዲዳሰ።

37 ጎዳይ ካሴ ሙሴ ኣዛዚዳ ማላ ጋይቶቴላ ዱንካኔዛን ኦሊዳይቲ ሙሴይኔ ኣሮኔይ ቆዲዳ ቃኣቲ ሶ አሳይ ሃይታንታ።

38 ባ ዛርኬን ዛርኬኒኔ ባ ዳቦን ዳቦን ቆዴቲዳ ጌርሾኔ ናይቲ፡

39 ጋይቶቴላ ዱንካኔዛን ኦላና ጌላናሰ ዳንዳይዛይታሰ ላይላይ ሄሹ ታማሬ ቢዲ ኢቻሹ ታሙ ላይላ ጋካናሰ ዲዛይቲ ወሪካ፡

40 ናምኡ ሺያኔ ኡሱፑን ጴታኔ ሄሹ ታማ።

- 41 ጎዳይ ሙሴ አዛዚዳ ማላ ጋይቶቴላ ዱንካኔዛን ኦሊዳይቲኔ ሙሴይኔ ኣርኔይ ቆዲዳ ጌርሾኔ ናይቲ ሃይታንታ።
- 42 ባ ዛርኬን ዛርኬኒኔ ባ ዳቦን ዳቦን ቆዳቲዳ ሜራሬ ናይቲ።
- 43 ጋይቶቴላ ዱንካኔዛን ኦላና ጌላናሰ ዳንዳይዛይታሰ ላይላይ ሄሹ ታማፌ ቢዲ ኢቻሹ ታሙ ላይላ ጋካናሰ ዲዛይቲ ወሪካ።
- 44 ሄሹ ሺያኔ ናሞኡ ዴታ።
- 45 ጎዳይ ሙሴ አዛዚዳ ማላ ጋይቶቴላ ዱንካኔዛን ሃጋዚዛ ሙሴይኔ ኣርኔይ ቆዲዳ ሜራሬ ናይቲ ሃይታንታ።
- 46 ሙሴይ፡ ኣርኔይኔ ኢሰራኤሌ ሃላቃቲ ኢሰታ ቆሞን ቆሞኒኔ ኢሰታ ዛርኬን ዛርኬን ቆዲዳ ሌዌ ናይቲ።
- 47 ሄሹ ታሙ ላይላፌ ዶሚዲ 50 ላይላ ጋካናሰ ዲዛይቲ ጋይቶቴላ ዱንካኔዛ ጊዶን ኦሶዛ ኦላናሰ ኦሊዛ ሚሻታ ቶካናሰ ጌሊዳይቲ።
- 48 ሙሌራ ኢሰታ ቆዳይ 8,580።
- 49 ሄሳ ማላን ኢሲ ኢሲ ኢሲ ጎዳይ ሙሴ አዛዚዳ ማላ ቆዳቲዳሰ፤ ሄሳሶካ ጎዳይ ሙሴሰ ኢሚዳ አዛዛ ማላ ኢሲ ኢሲ ኢሲ ቶካናሰ ኣላፌቴላ ኤኪዳሰ።

5

ጌዮንታ አሳታ

- 1 ጎዳይ ሙሴሰ ሂዝጊዳሰ፡
- 2 «ኢንቺራቻ ሃርጌይ ኢዛ ቦላ ዲዛዴ ወይኮ ኢዛ ቦላፌ ሃላ ማላይ ጎጊዛዴ ወይኮ ኣሃ ቦቺዲ ቱኒዳዴ ኡባ ኢሰራኤሌ ኣሳይ ባ ዲዛ ጉታፔ ካሬ ኬሳና ማላ አዛዛ።
- 3 ታኒ ኢሰታራ ዲዛ ኢሰታ ጉታ ኢሰቲ ቱኒሶንታ ማላ ሄይታ ጌዮንታ አሳታ ኡባ ኣዴ ጊዲን ማጫ ጊዲን ኢንቴ ጊዶፌ ኬሲ ጎዲቲ።»
- 4 ጎዳይ ሙሴ አዛዚዳ ማላ ኢሰራኤሌ ኣሳይ ባ ጉታፔ ኢሰታ ኬሲ ጎዲዳሰ።

ቆሆ ጊሻሰ ቃንጾ ኢሞ

- 5 ጎዳይ ሙሴሰ ሂዝጊዳሰ፡
- 6 «ኔኒ ኢሰራኤሌ ኣሳሰ፡ ማጫፌ ጊዲን ኣቱማሳፔ ኣይ ኣሲካ ጎዳሰ ኣማኔቶንታዴ ጊዲ ቤቲዲ ኣይ ኣሳ ቦላካ ቆሆ ጋሊኮ ሄሳዳይ ቆሃንቻ።

7 ኢዚ ባ ናጋራ ፓጾ፤ ባ ቆሆዛ ገሻሰ ቃንጾቲዛ ሚሻ ቦላ ጸታፔ ናሞኡ ታሙ ኩሼ ጉጂዲ ቆሄቲዳዴሰ ኤሆ።

8 ጊዶ ኣቲን ሄ ቆሄቲዳዴይ ሃይቂዳ ጊዲኮኔ ኤዳ ኤካናሰ ኢዛሰ ማታ ዳቦይ ባይንዳ ጊዲኮ ሄ ኤዳይ ጎዳሳ፤ ሄ ኤዳቲዛ ኤዳይ ቆሄዳዴ ናጋራ ወርሳና ሽቂዛ ያርሾሰ ኢሚዛ ቆርሾዛራ ኢሲፌ ቄሴዛሰ ኢሚቶ።

9 ሄሳ ማላን ኢሰራኤል ኣሳይ ጎዳሰ ኢሚዛ ዱማ ኢሞታይ ወሪካ ሄ ኢሞታ ኤኪዛ ቄሴዛሰ ጊዶ።

10 ኢሲ ኢሲ ኣሲ ጎዳሰ ኢሚዛ ዱማ ኢሞታይ ሄ ኢሞታ ኢሚዳዴሳ፤ ጊዶ ኣቲን ኢዚ ቄሴዛሰ ኢሚዛ ጊዲኮ ሄ ሚሻይ ቄሴዛሳ።»

ኣማኔቶንታ ማቹታ

11 ሄሳፌ ጉዬ ጎዳይ ሙሴሰ ሂዝጊዴሰ፡

12 «ኢሰራኤል ኣሳፔ ኢሳዴ ማቻ ባ ኣዚናሰ ኣማኔቶንታ ኣጋዳ ካሬ ካሬ ጊኮ፡

13 ሃራ ኣዴራ ዚንኢኮ፡ ቃሴካ ኢዛ ኦሊዳ ቱና ኦሶይ ቆንጮንታ ኣዚናፔ ጊሚዳ ጊዲኮ፡ ኢዚ ቦላ ማርካቲዛ ኣሲ ቤቶንታ ኣጊን ኢዚ ቱናቲሳይ ቆንጮንታ ኣጊኮ፡

14 ኢዛ ቱኒዳ ገሻሰ ኢዚ ኣዚናይ ኢዞ ሲቆናሰ ዳንዳዬሰ፤ ዎይኮ ኢዛ ቱኖንታ ዲሺን ኢዚ ቃናቲን ኩሚዳ ገሻሰ ባ ማቾ ሲቆና ዳንዳዬሰ።

15 ሄሳዴይ ባ ማቹዮ ቄሴኮ ኤኪ ኤሆ፤ ሄ ማጫሳይ ገሻሰ ኮዬቲዛ ኢሲ ኪሎ ባንጋ ጳሌ ያርሾሰ ኤኪ ዮ፤ ሃይሲ ቃናቲሰ ሽቂዛ ካላ ያርሾይ ቆሆ ቆፍሲዛዝ ጊዲዛ ገሻሰ ዛይቲ ኢዛ ቦላ ጉሶፎ፤ ኤጳኔካ ኢዛ ቦላ ዎሶፎ።

16 «ቄሴዚ ማጫሳዮ ኤፊዲ ጎዳ ሲንላን ኤሶ።

17 ጌሻ ሃላ ጸርን ዱቂ ኤኮ፤ ጋይቶቲላ ዱንካኔ ወይጌፔ ጉላ ቢታ ኤኪዲ ሄ ሃላን ጉጂ።

18 ቄሴዚ ማጫሳዮ ጎዳ ሲንላን ኤሶ፤ ኢዚ ጎሴ ቢርሾ፤ ቃናቲሰ ሽቂዛ ካላ ያርሾዛ ኢዚ ኩሼን ዎሶ፤ ቃሴ ሄ ቄሴዚ ቃንጌላ ኤሂዛ ጫሞ ሃላ ጸርራ ባ ኩሼን ኦይኮ።

19 ቄሴዚ ኢዞ ሂዝጊ ጫቁሶ፤ ኔኒ ኔ ኣዚናራ ዲሺን ሃራ ኣዴይ ኔናራ ኣቆንታ ጊዲኮኔ ኔኒ ኔና ቱኒሶንታ ጊዲኮ ቃንጌላ ኤሂዛ ሃይሲ ጫሞ ሃላይ ኔሰ ጎሚቶ።

20 ጊዶ ኣቲን ኔኒ ኔ ኣዚናፔ ሃራ ኣዴራ ዚንኣዳ ቱኒዳ ጊዲኮ፡

21 ጎዳይ ኔሰ ዬላ ኡሎ ሚሊሶኔ ኔ ኡሎ ፑሪሶ! ኔ ዴሬዛ ጋርሳን ኔና ጫቆሲኔ ቃንጌላሰ ኬሶ።

22 ሃይሲ ሃላዚ ጌዴ ኔ ቦላ ጊዶ ጌሊዲ ኔ ኡሎዛ ፑሪሶ! ኔሰ ዬላ ኡሎዛ ጉንዲሶ!፤ ማጫሳያካ፥ ላሚን! ጎዳይ ታ ቦላ ሃሳሶ ኦሶ፤ ጋ ዛሩ።

23 «ሃሳፌ ጉዬ ቄሴዚ ሃሳ ሄ ቃንጌላ ቃላ ጸላ ማጸፋን ጸፎ፤ ሄ ጸፎይሳካ ጫሞ ሃላዚ ዲዛ ጸርዛን ዬጊ ሚጮ።

24 ኢዚ ማጫሳዮ ኢታ ሳኮ ኦይሊዛ ጫሞ ሃላ ኢዛ ኡሻናፔ ሲንሳን፤

25 ቄሴዚ ማጫሳይፌ ያርሾ ጲሌዛ ኤኪዲ ጎዳሰ ያኔ ሃ ቃሴሊ ሺሺዛ ዲማ ያርሾ ጊዳና ማላ ያርሾ ያርሺዛሶዛ ቦላ ሺሾ።

26 ሃሳፌ ጉዬ ካላ ያርሾ ኢሲ ዘላ ጲሌ ኤኪዲ ቆፊሶ ያርሾ ጊዳና ማላ ያርሾ ያርሺዛሶዛ ቦላ ጸጎ፤ ዉርሴሳን ሄ ማጫሳዮ ሄ ሃላ ኡሾ።

27 ማጫሳያ ባና ቱንሳዳ ባ አዚናሰ ዲዛ አማኔቱላ ፓጪንቺዳ ጊዲኮ ቃንጌላ ኤሂዛ ሃላ ኢዛ ኡዬዛ ዋዴ ኢዚ ቦላ ጊዶን ዋልቃማ ሳኮ ኤሃና፤ ሄሲካ ኢዚ ኡሎይ ፑሪና፤ ኢዚሰ ዬላ ኡሎይ ጉንዳና፤ ኢዚ ሱንሳ ኢዚ ዳሬዛ ጊዶን ቃንጌቲዳዝ ጊዲ አታና።

28 ጊዶ አቲን ኢዛ አይኮ ሞሮካ ኦሶንታ ጊዲኮ ኢዚ ቦላ አይኮ ቆሆይካ ጋኬና፤ ኢዛ ናይታካ ዬላና።

29 «ኢሳዴይ ባ ማሾ ላይማቲላን ሲጲዛ ዋዴ ኦላና ዋጋይ ሃይሳፌ ካሊዛይሳ፤ ኢዛ ካሬ ካሬ ጋዳ ሃራ አዴራ ዚንአዳ ቱኒዳ ጊዲኮ፤

30 ዋይኮ ኢሲ አሲ ባ ማሾ ጮ ሜላ ሲጲዛ ጊዲኮ ኢዛ ጎዳ ሲንሳን ኤቃና ማላ ኦሶ።

31 ኢዚ አዚናዚካ ቆሆፔ ጌሽ ጊዳና፤ ማጫሳያ ላይማታ ቤቲዳ ጊዲኮ ቃሴ ኢዛ ባ ቆሆዛ ጋሶን ባ ቦላ ጋኪዛ ፒርዳ ኤካና።»

6

ናዚራዌቲላ ዋጋ

1 ጎዳይ ሙሴሰ ሂዝጊዴሰ፤

2 «ኢሰራኤሌ አሳሰ፤ ማጫ ጊዲን ዋይኮ አዴ ጊዲን አይ አሲካ ባና ጎዳሰ ዲማሳናሰ አዲና አዲኔቲኮ፤

3 ሄሳዴይ ወይኔ ኡሹ ወይኮ ሃራ ማላሲዛ ኡሹ ኡዮፖ፤ ወይኔ፤ ወይኮ ሃራ፤ ስሴቲዳ ጫላ ወይኮ ማላሲዛ ኡሹ ኢዚ ኡዮፖ፤ ወይኔ ሚላ ኣይፌፔ ቲያ ጊዲን ወይኮ ሚላ ጊዲን ሞፖ።

4 ኢዚ ባና ዲማሲዲ ዲዛ ወይን ወይኔ ሚላ ሃጋ ቦላ ዲዛ ኣይፌ ጊዲን ወይኮ ፖቆ ሞፖ።

5 « ኢዚ ናዚራዌቴላሰ ኣዲኔቲዳ ወይይ ዉራና ጋካናሰ ኢዛዴ ሁኤ ቢናና ማጋላይ ቦቾ፤ ኢዚ ባና ጎዳሰ ዲማሲዳ ወይይ ፖሌታና ጋካናሰ ኢዚ ዲማቲዳዴ ጊዲዲ ባ ሁኤ ቢናና ዲቾ። *

6 ኢዚ ናዚራዌ ጊዲ ዲዛ ወይ ኡባን ሃይቂዳ ኣሃኮ ሸቆፖ።

7 ኢዚ ባ ጎዳሰ ባና ዲማሲዳ ማላታይ ኢዛ ሁኤ ቦላ ዲዛ ጊሻሰ ኢዛሰ ኣዋይ ወይኮ ኣያ ወይኮ ኢዛሰ ኣሻይ ወይኮ ሚቻ ሃይቂኮ ኢሰታ ኣሃ ቦቾዲ ኢዚ ባና ቱኒሶፖ።

8 ኢዚ ባና ናዚራዌ ኦሒዳ ወይ ኡባን ኢዚ ጎዳሰ ዲማቲዳ ኣሳ።

9 « ኢዚ ቆፖንታ ዲሺን ኢሳዴይ ኢዛ ኣቻን ሃይቂዲ ካሴ ዲማቲ ዲዛ ኢዛ ሁኤ ቢናና ቱኒሲኮ ኢዚ ላፑንላ ጋላሰ ባ ሁኤ ቢናና ሜዴቲ ቡሉሶ።

10 ኦሰፑንላ ጋላሰ ናምኡ ሃራጴታ ወይኮ ሃራጴ ጨዬታ ጋይቶቴላ ዲንካኔዛ ፔንጌን ዲዛ ቄሴዛኮ ኤሆ።

11 ቄሴዚካ ኢሲ ሃራጴዛ ናጋራ ያርሾሰ ናምኣንሉዛ ቃሴ ጸጌቲዛ ያርሾሰ ሺሾ፤ ጋሶይካ ኢዚ ኣሃ ማታ ሸቂዲ ቱኒዳ ጊሻሰ ቄሴዚ ኢዛ ናጋራ ዉርሳና፤ ሄ ጋላሲካ ናዚራዌይ ባ ሁኤ ኢሰኬዛ ናምኣንሉ ጎዳሰ ዲማሶ።

12 ኢዚ ናዚራዌቴላን ኦላናሰ ባና ጎዳሰ ናምኣንሉ ዲማሶ፤ ጎዳሰ ዲማቲዳ ሄ ኢዛ ኢሰኬዚ ቱኒዳ ጊሻሰ ሄሳፌ ካሴ ኢዚ ናዚራዌቴላን ጋምኢዳ ወይይ ኢዛሰ ቆዳን ጌሌና፤ ኢዚ ባ ቆሆዛ ጊሻሰ ኢሲ ላይላ ጳርሾ ላቃ ኤሆ።

13 « ኢሲ ናዚራዌይ ባ ናዚራዌቴላ ኣዲና ኡባ ወይ ኢዚ ፖላና ወጋይ ሃይሳፌ ካሊ ዲዛይሳ፤ ኢዚ ጌዴ ጋይቶቴላ ዲንካኔን ጌሊዛ ፔንጌዛኮ ቢዲ፤

14 ሄን ባ ያርሾ ጎዳሰ ሺሾ፤ ሄሲካ ጸጌቲዛ ያርሾሰ ኢሲ ላይላ ኩሚዳ ጳርሾ ላቃ፤ ናጋራ ያርሾሰ ኢሲ ላይላ ኩሚዳ ኡዚ ዶርሰ፤ ሄሳላካ ኢሲፌቴላ ያርሾሰ ወሶይ ባይንዳ ጳርሾ ሺሾ።

15 ቃሴ ካላ ያርሾኔ ኡሻ ያርሾ ኢሰታራ ኢሲፌ ያርሻናሰ ኤሆ፤ ሄ ለማቴዛን ካላ ያርሾይ ኢርሾይ ኢዛን ጌሎንታይሳ ጊዶ፤ ቃሴ

6:3 ሉቃ 1:15 * 6:5 ማጋላ ጉሲ ካሴ ወይ ኣሳይ ሁኤ ሜዲዛ ቄሪ ቢላማ።

ሊቆ ዲሌ ዛይቲን መኩቂ ኡኪዳ ኦርዳ ኡኬሊኔ ዛይቲን ቲዬቲዳ ሌኤ ኡኬላ ኤሆ።

16 « ቂሴዚካ ሄሳ ኡባ ናጋራ ያርሾኔ ጹጌቲዛ ያርሾ ኦሊዲ ጎዳ ሲንሐ ሺሾ።

17 ቆርሾዛኔ ለማቴራ ኢርሾይ ኢዛን ጌሎንታ ኡኬላታ ኢሲፊቴላ ያርሾ ኦሊዲ ጎዳሰ ሺሾ፤ ቃሴ ሄሳራ ኢሲፊ ጋሊዲ ካላ ያርሾኔ ኡሻ ያርሾ ያርሾ።

18 « ሄሳፊ ጉዬ ጋይቶቴላ ዲንካኔዛን ጌሊዛ ፔንጌ ቦላ ሄ ናዚራዌዚ ጎዳሰ አዲኔቲዳ ባ ሁኤ ቢናና ሜዴቲዲ ኢሲፊቴላ ያርሾይ ጹጌቲዛ ታማን ዬጎ።

19 « ሳና ጎዳሰ ዲማሲዳ ናዚራዌይ ባ ሁኤ ቢናና ሜዴቲዳፔ ጉዬ ቂሴዚ ዶይሴቲዳ ቆርሾዛ ሚሳ አሾ፤ ኢርሾይ ጌሎንታ ኡኬቲዳ ኦርዳ ኡኬሊኔ ሌኤ ኡኬላ ለማቴፔ ኡኪዲ ሄ ናዚራዌዛ ኩሺን ዋላ።

20 ሄሳፊ ጉዬ ቂሴዚ ኡባ ኡኪዲ ጎዳ ሲንላን ያኔ ሃ ቃሴሊዛ ያርሾ ሂሰቲ ሺሾ፤ ሄይቲካ ጎዳሰ ዲማቲዳ ያርሾ፤ ሄ ቃሴሊዳ አንጋሶይኔ ሚሳዚ ቂሴዛሰ ጊዶ፤ ሄሳፊ ጉዬ ናዚራዌዚ ዋይኔ ኡሹ ኡያናሰ ዳንዳዬሰ።

21 « ሄሳ ጊሻሰ ጎዳሰ ባና ዲማሳናሰ አዲኒዳ ናዚራዌሰ ዋዲዳ ዋጋይ ባና ጎዳሰ ያርሻናሰ ኮሺዛ ያርሾታፔ ቦላራ አሊ ጌፒኮ ኢዚ ቃላ ጌሊዳ ማላ ባ አዲና ፖላናሰ ቤሴሰ ጋ ዮታ። ጌሰ።»

ቂሴቲ ዉርሴላን አንጃና አንጆ

22 ጎዳይ መሴሰ ሂዝጊዳሰ፤

23 «አርኔይኔ ኢዛ ናይቲ ኢሰራኤሌ ዴራ አንጂሺ ሂዝጊ አንጂቶ፤

24 ሳዳይ ኔና አንጆ፤

ኢዚ ኔና ናጎ፤

25 ጎዳይ ባ አይፊሶ ፖኦ

ኔሰ ቆንጨሶ፤

ኢዚ ኔሰ ቃዴቶ።

26 ጎዳይ ኔና ባ ማርቴላ

አይፊን ጾሎ፤

ባ ሳርቴሐካ ኢዚ ኔሰ ኢሞ።

ጋዳ ዮታ።»

27 ቃሴካ ጎዳይ፥ «ኢስቲ ኢስራኤል አሳ ታ ሱንፋን ኣንጂዛ ዋዴ ታኒ ኢስታ ኣንጃና» ጊደስ።

7

ሃላቃቲ ኢሚዳ ኢሞታ

1 ሙሴይ ጋይቶቴፋ ዲንካኔዛ ቶሊ ጊቢዳ ዋዴ ዲንካኔዛኔ ኢዛን ጎኤቲዛ ሚሻታ ኡባ፥ ያርሾ ያርሺዛሶዛኔ ኢዛን ጎኤቲዛ ሚሻታ ቲይዲ ዲማሲደስ።

2 ሄሳፌ ጉዬ ኢስራኤል አሳ ካሌሊዛይቲ፥ ዴራ ቆዲዛ ዋዴ ኢስታ ቦላ አላፌቴሊ ዲዛ ኮራፒኔቲ ወሪ ባ ያርሾ ያርሾ ጎዳስ ሺሺዳ።

3 ኢስቲ ሺሺዳ ያርሾቲ ናሞኡ ናሞኡ ሃላቃታ ሱንፋን ኢሲ ፓራ-ጋሬ፥ ሄሳፋካ ኢሲ ኢሲ ሃላቃ ሱንፋን ኢሲ ኢሲ ቦራ፤ ሄ ኢስቲ ሺሺዳ ያርሾቲ ኢሲ ቦላ ኡሱፑን ፓራ-ጋሬታኔ ታማን ናሞኡ ቦራታ፤ ሄይታ ሄ ያርሾታካ ጋይቶቴፋ ዲንካኔዛ ሲንፋን ሺሺዳ።

4 ጎዳይ ሙሴስ ሂዝጊደስ፥

5 «ሃይቲ ሚሻቲ ጋይቶቴፋ ዲንካኔዛን ዲማ ዲማ ኦሶስ ኢስታን ጎኤታና ማላ ሃይታ ያርሾ ሚሻታ ኢስታፌ ኤካዳ፥ ዲማ ዲማ ኦሶስ ኢስታስ ኮሺዛ ማላ ሻካዳ ለዌታስ ኢማ።»

6 ሄሳ ጊሻስ ሙሴይ ፓራ-ጋሬታኔ ቦራታ ኤኪዲ ለዌታስ ኢሚደስ።

7 ጌርሾኔ ዛርኬታስ ኦሶስ ኮሺዛ ናሞኡ ፓራ-ጋሬታኔ ኦይዲ ቦራታ ኢሚደስ።

8 ቃሴካ ሜራሬ ዛርኬታስ ኦይዲ ፓራ-ጋሬታኔ ኦሶፑን ቦራታ ኢሚደስ፤ ሄይታንታ ኦሶይ ፖሌታናይ አርኔ ና ኢታማሬ አላፌቴፋና።

9 ኢስታስ ዲዛ አላፌቴሊ ጌሻ ሚሻታ ባ ሃሺን ቶኪዛ ጊሻስ ሙሴይ ቃኣቴ ዛርኬታስ ፓራ-ጋሬታ ጊዲን ዋይኮ ቦራታካ ኢሚቤና።

10 ያርሾ ያርሺዛሶዛ ሙሴይ ቲይዲ ጌሺዳ ጋላስ ሃላቃቲ ያርሾ ያርሺዛሶዛ ኣንጂሳናስ ባንታ ኢሞታ ኤሂዲ ያርሾ ያርሺዛሶዛ ሲንፋን ሺሺዳ።

11 ጎዳይ ሙሴስ፥ «ታማኔ ናሞኡ ጋላሳታን ታማኔ ናሞኡ ሃላቃቲ ፓጩይ ባይንዳ ኢሶይ ኢሶይ ኢሲ ኢሲ ጋላስ ኣንጂሶ ባኣሌስ ጊዲዛ ያርሾ ሁኤን ሁኤን ሺሻና ማላ ዮታ» ጊደስ።

12 ኮይሮ ጋላስ ዩሁዳ ቆሞታ ጋርሳፌ አሚናዳቤ ና ኔአሶኔይ ሺሺዳስ።

13 ኢዚ ሺሺዳ ያርሾቲካ ሃይሳፌ ካሊዛይታ፤ ኤሬቲዳ ሜዛኔን ዋሊን 130 ሳቂሌ * ቢራፔ ኦሴቲዳ ኢሲ ፒጫ ሳኔኔ 70 ሳቂሌ † ኢሲ ጉቃ ሳኔ፤ ናምኣይካ ካላ ያርሾ ሺሻናስ ሊቆ ዲሌፌ ዛይቲን ሙኑቄቲዳ ሙኑቃን ኩሚዳ።

14 ኢዛን ኤጻኔይ ኩሚ ኡቲዳ 10 ሳቂሌ ‡ ዋርቃፌ ኦሴቲዳ ጨለፋ።

15 ጹጌቲዛ ያርሾስ ኢሲ ሚርጎ፤ ኢሲ ቆርሾ፤ ኢሲ ላይላ ቆርሾ ላቃ፤

16 ናጋራ ያርሾስ ኢሲ ዳይሻ ኦርጌ፤

17 ኢሲፌቲላ ያርሾስ 2 ቦራታ፤ 5 ቆርሾታ፤ 5 ዳይሻ ኦርጌታኔ ላይላ ኩሚዳ 5 ቆርሾ ላቃታ፤ ሄይቲ ዉሪ አሚናዳቤ ና ኔአሶኔይ ሺሺዳ ያርሾታ።

18 ናምኣንሉ ጋላስ ዩሳኮሬ ዛርኬታ ጋርሳፌ ጹኣሬ ና ናቲናኤሌይ ሺሺዳስ።

19 ኢዚ ሺሺዳ ያርሾቲካ ሃይሳፌ ካሊዛይታ፤ ኤሬቲዳ ሜዛኔን ዋሊን ጴታኔ ሄሹ ታሙ ሳቂሌ ቢራፔ ኦሴቲዳ ኢሲ ፒጫ ሳኔኔ ላፑን ታሙ ሳቂሌ ጉቃ ሳኔ፤ ናምኣይካ ካላ ያርሾ ሺሻናስ ሊቆ ዲሌፌ ዛይቲን ሙኑቄቲዳ ሙኑቃን ኩሚ ኡቲዳስ።

20 ኢዛን ኤጻኔይ ኩሚ ኡቲዳ ታሙ ሳቂሌ ዋርቃፌ ኦሴቲዳ ጨለፋ።

21 ጹጌቲዛ ያርሾስ ኢሲ ሚርጎ፤ ኢሲ ቆርሾ፤ ኢሲ ላይላ ቆርሾ ላቃ፤

22 ናጋራ ያርሾስ ኢሲ ዳይሻ ኦርጌ፤

23 ኢሲፌቲላ ያርሾስ 2 ቦራታ፤ 5 ቆርሾታ፤ 5 ዳይሻ ኦርጌታኔ ላይላ ኩሚዳ 5 ቆርሾ ላቃታ፤ ሄይቲ ዉሪ ጹኣሬ ና ናቲናኤሌይ ሺሺዳ ያርሾታ።

24 ሄሻንሉ ጋላስ ዛቢሎኔ ዛርኬታ ጋርሳፌ ሄሎኔ ና ኤልያቤይ ሺሺዳስ።

25 ኢዚ ሺሺዳ ያርሾቲካ ሃይሳፌ ካሊዛይታ፤ ኤሬቲዳ ሜዛኔን ዋሊን ጴታኔ ሄሹ ታሙ ሳቂሌ ቢራፔ ኦሴቲዳ ኢሲ ፒጫ ሳኔኔ ላፑን ታሙ ሳቂሌ ጉቃ ሳኔ፤ ናምኣይካ ካላ ያርሾ ሺሻናስ ሊቆ ዲሌፌ ዛይቲን ሙኑቄቲዳ ሙኑቃን ኩሚዳ።

* 7:13 130 ሳቂሊይ 1.5 ኪሎ ጊራሜ ጌዳስ። † 7:13 70 ሳቂሊይ 0.8 ኪሎ ጊራሜ ጌዳስ። ‡ 7:14 10 ሳቂሊይ 110 ጊራሜ ጌዳስ።

26 ኢዛን ኤጳኔይ ኩሚ ኡቲዳ ታሙ ሳቂሌ ዋርቃፌ ኦሴቲዳ ጨለፋ።

27 ጹጌቲዛ ያርሾስ ኢሲ ሚርሳ፣ ኢሲ ጳርሾ፣ ኢሲ ላይላ ጳርሾ ላቃ፡

28 ናጋራ ያርሾስ ኢሲ ዳይሻ ኦርጌ፡

29 ኢሲፌቴላ ያርሾስ 5 ቦራታ፡ 5 ጳርሾታ፡ 5 ዳይሻ ኦርጌታኔ ላይላ ኩሚዳ 5 ጳርሾ ላቃታ፤ ሄይቲ ወሪ ሄሎኔ ና ኤልያቤይ ሺሺዳ ያርሾታ።

30 ኦይዳንሉ ጋላስ ኦርቤሌ ቆሞታ ጋርሳፌ ሻዱሬ ና ኤልጹሬይ ሺሺዳስ።

31 ኢዚ ሺሺዳ ያርሾቲካ ሃይሳፌ ካሊዛይታ፡ ኤሬቲዳ ሜዛኔን ዋሊን 130 ሳቂሌ ቢራፔ ኦሴቲዳ ኢሲ ፒጫ ሳኔኔ 70 ሳቂሌ ኢሲ ጉቃ ሳኔ፡ ናሞኣኒካ ካላ ያርሾ ሺሻናስ ሊቆ ጂሌፌ ዛይቲን ሙኑቄቲዳ ሙኑቃይ ኩሚ ኡቲዳስ።

32 ኢዛን ኤጳኔይ ኩሚ ኡቲዳ ኢሲ ታሙ ሳቂሌ ዋርቃፌ ኦሴቲዳ ጨለፋታ፡

33 ጹጌቲዛ ያርሾስ ኢሲ ሚርሳ፣ ኢሲ ጳርሾ፣ ኢሲ ላይላ ጳርሾ ላቃ፡

34 ናጋራ ያርሾስ ኢሲ ዳይሻ ኦርጌ፡

35 ኢሲፌቴላ ያርሾስ 2 ቦራታ፡ 5 ጳርሾታ፡ 5 ዳይሻ ኦርጌታኔ ላይላ ኩሚዳ 5 ጳርሾ ላቃታ፤ ሄይቲ ወሪ ሻዱሬ ና ኤልጹሬይ ሺሺዳ ያርሾታ።

36 ኢቻሻንሉ ጋላስ ሲሞና ቆሞታ ጋርሳፌ ጹርሻዳዬ ና ሳሉሞኤሌይ ሺሺዳስ።

37 ኢዚ ሺሺዳ ያርሾቲካ ሃይሳፌ ካሊዛይታ፡ ኤሬቲዳ ሜዛኔን ዋሊን 130 ሳቂሌ ቢራፔ ኦሴቲዳ ኢሲ ፒጫ ሳኔኔ 70 ሳቂሌ ኢሲ ጉቃ ሳኔ፡ ናሞኣኒካ ካላ ያርሾ ሺሻናስ ሊቆ ጂሌፌ ዛይቲን ሙኑቄቲዳ ሙኑቃን ኩሚዳ።

38 ኢዛን ኤጳኔይ ኩሚ ኡቲዳ ኢሲ ታሙ ሳቂሌ ዋርቃፌ ኦሴቲዳ ጨለፋታ፡

39 ጹጌቲዛ ያርሾስ ኢሲ ሚርሳ፣ ኢሲ ጳርሾ፣ ኢሲ ላይላ ጳርሾ ላቃ፡

40 ናጋራ ያርሾስ ኢሲ ዳይሻ ኦርጌ፡

41 ኢሲፌቴላ ያርሾስ 2 ቦራታ፡ 5 ጳርሾታ፡ 5 ዳይሻ ኦርጌታኔ ላይላ ኩሚዳ ኢቻሹ ጳርሾ ላቃታ፤ ሄይቲ ወሪ ጹርሻዳዬ ና ሳሉሞኤሌይ ሺሺዳ ያርሾታ።

42 ኡሱፑንሶ ጋላስ ጋዴ ዛርኬታ ጋርሳፌ ዳኡኤሌ ና ኤልያሳፌይ ሺሺዴስ።

43 ኢዚ ሺሺዳ ያርሾቲካ ሃይሳፌ ካሊዛይታ፡ ኤሬቲዳ ሜዛኔን ዋሊን 130 ሳቂሌ ቢራፔ ኦሴቲዳ ኢሲ ፒጫ ሳኔኔ 70 ሳቂሌ ኢሲ ጉቃ ሳኔ፡ ናምኣይካ ካላ ያርሾ ሺሻናዉ ሊቆ ጳሌፌ ዛይቲን ሙኑቄቲዳ ሙኑቃን ኩሚዳ።

44 ኢዛን ኤጳኔይ ኩሚ ኡቲዳ ኢሲ ታሙ ሳቂሌ ዋርቃፌ ኦሴቲዳ ጨልፋታ፡

45 ጹጌቲዛ ያርሾስ ኢሲ ሚርሳ፡ ኢሲ ጳርሾ፡ ኢሲ ላይላ ጳርሾ ላቃ፡

46 ናጋራ ያርሾስ ኢሲ ዴይሻ ኦርጌ፡

47 ኢሲፌቲላ ያርሾስ 2 ቦራታ፡ 5 ጳርሾታ፡ 5 ዴይሻ ኦርጌታኔ ላይላ ኩሚዳ 5 ጳርሾ ላቃታ፤ ሄይቲ ዉሪ ዳኡኤሌ ና ኤልያሳፌይ ሺሺዳ ያርሾታ።

48 ላፑንሶ ጋላስ ኤፍሬሜ ዛርኬታ ጋርሳፌ ኣሚሁዴ ና ኤልሻማይ ሺሺዴስ።

49 ኢዚ ሺሺዳ ያርሾቲካ ሃይሳፌ ካሊዛይታ፡ ኤሬቲዳ ሜዛኔን ዋሊን 130 ሳቂሌ ቢራፔ ኦሴቲዳ ኢሲ ፒጫ ሳኔኔ 70 ሳቂሌ ኢሲ ጉቃ ሳኔ፡ ናምኣይካ ካላ ያርሾ ሺሻናስ ሊቆ ጳሌፌ ዛይቲን ሙኑቄቲዳ ሙኑቃን ኩሚዳ።

50 ኢዛን ኤጳኔይ ኩሚ ኡቲዳ ኢሲ ታሙ ሳቂሌ ዋርቃፌ ኦሴቲዳ ጨልፋታ፡

51 ጹጌቲዛ ያርሾስ ኢሲ ሚርሳ፡ ኢሲ ጳርሾ፡ ኢሲ ላይላ ጳርሾ ላቃ፡

52 ናጋራ ያርሾስ ኢሲ ዴይሻ ኦርጌ፡

53 ኢሲፌቲላ ያርሾስ 2 ቦራታ፡ 5 ጳርሾታ፡ 5 ዴይሻ ኦርጌታኔ ላይላ ኩሚዳ 5 ጳርሾ ላቃታ፤ ሄይቲ ዉሪ ኣሚሁዴ ና ኤልሻማ ያርሾታ።

54 ኦስፑንላ ጋላስ ሚናሴ ዛርኬታ ጋርሳፌ ፔዳዱሬ ና ጋማልኤሌይ ሺሺዴስ።

55 ኢዚ ሺሺዳ ያርሾቲካ ሃይሳፌ ካሊዛይታ፡ ኤሬቲዳ ሜዛኔን ዋሊን 130 ሳቂሌ ቢራፔ ኦሴቲዳ ኢሲ ፒጫ ሳኔኔ 70 ሳቂሌ ኢሲ ጉቃ ሳኔ፡ ናምኣይካ ካላ ያርሾ ሺሻናስ ሊቆ ጳሌፌ ዛይቲን ሙኑቄቲዳ ሙኑቃን ኩሚዳ።

56 ኢዛን ኤጳኔይ ኩሚ ኡቲዳ ኢሲ ታሙ ሳቂሌ ዋርቃፌ ኦሴቲዳ ጨልፋታ፡

57 ጽጌቲዛ ያርሾስ ኢሲ ሚርጎ፥ ኢሲ ጳርሾ፥ ኢሲ ላይላ ጳርሾ ላቃ፥

58 ናጋራ ያርሾስ ኢሲ ዳይሻ ኦርጌ፥

59 ኢሲፌቴላ ያርሾስ 2 ቦራታ፥ 5 ጳርሾታ፥ 5 ዳይሻ ኦርጌታኔ ላይላ ኩሚዳ 5 ጳርሾ ላቃታ፤ ሄይቲ ወሪ ፔዳጹሬ ና ጋማልኤሌ ያርሾታ።

60 ኡዱፋንሉ ጋላስ ቢኒያሜ ዛርኬታ ጋርሳፌ ጊዲኦኔ ና ኣቢዳኔይ ሺሺዴስ።

61 ኢዚ ሺሺዳ ያርሾቲካ ሃይሳፌ ካሊዛይታ፥ ኤሬቲዳ ሜዛኔን ዋሊን 130 ሳቂሌ ቢራፔ ኦሴቲዳ ኢሲ ፒጫ ሳኔኔ 70 ሳቂሌ ኢሲ ጉቃ ሳኔ፥ ናሞኣይካ ካላ ያርሾ ሺሻናስ ሊቆ ጳሌፌ ዛይቲን ሙኑቄቲዳ ሙኑቃን ኩሚዳ።

62 ኢዛን ኤጳኔይ ኩሚ ኡቲዳ ኢሲ ታሙ ሳቂሌ ዋርቃፌ ኦሴቲዳ ጨለፋታ፥

63 ጽጌቲዛ ያርሾስ ኢሲ ሚርጎ፥ ኢሲ ጳርሾ፥ ኢሲ ላይላ ጳርሾ ላቃ፥

64 ናጋራ ያርሾስ ኢሲ ዳይሻ ኦርጌ፥

65 ኢሲፌቴላ ያርሾስ 2 ቦራታ፥ 5 ጳርሾታ፥ 5 ዳይሻ ኦርጌታኔ ላይላ ኩሚዳ 5 ጳርሾ ላቃታ፤ ሄይቲ ወሪ ጊዲኦኔ ና ኣቢዳኔ ያርሾታ።

66 ታማንሉ ጋላስ ዳኔ ቆሞታ ጋርሳፌ ኣሚሻዳዬ ና ኣሂኤዜሬይ ሺሺዴስ።

67 ኢዚ ሺሺዳ ያርሾቲካ ሃይሳፌ ካሊዛይታ፥ ኤሬቲዳ ሜዛኔን ዋሊን 130 ሳቂሌ ቢራፔ ኦሴቲዳ ኢሲ ፒጫ ሳኔኔ 70 ሳቂሌ ኢሲ ጉቃ ሳኔ፥ ናሞኣይካ ካላ ያርሾ ሺሻናስ ሊቆ ጳሌፌ ዛይቲን ሙኑቄቲዳ ሙኑቃን ኩሚዳ።

68 ኢዛን ኤጳኔይ ኩሚ ኡቲዳ ኢሲ ታሙ ሳቂሌ ዋርቃፌ ኦሴቲዳ ጨለፋታ፥

69 ጽጌቲዛ ያርሾስ ኢሲ ሚርጎ፥ ኢሲ ጳርሾ፥ ኢሲ ላይላ ጳርሾ ላቃ፥

70 ናጋራ ያርሾስ ኢሲ ዳይሻ ኦርጌ፥

71 ኢሲፌቴላ ያርሾስ 2 ቦራታ፥ 5 ጳርሾታ፥ 5 ዳይሻ ኦርጌታኔ ላይላ ኩሚዳ 5 ጳርሾ ላቃታ፤ ሄይቲ ወሪ ኣሚሻዳዬ ና ኣሂኤዜሬ ያርሾታ።

72 ታማኔ ኢሲንላ ጋላስ ኣሴሬ ቆሞታ ጋርሳፌ ኦክራ ና ፋጉኤሌይ ሺሺዴስ።

73 ኢዚ ሺሺዳ ያርሾቲካ ሃይሳፌ ካሊዛይታ፡ ኤሬቲዳ ሜዛኔን ዋሊን 130 ሳቂሌ ቢራፔ ኦሴቲዳ ኢሲ ፒጫ ሳኔኔ 70 ሳቂሌ ኢሲ ጉቃ ሳኔ፡ ናምኣይካ ካላ ያርሾ ሺሻናሰ ሊቆ ጳሌፌ ዛይቲን ሙኑቄቲዳ ሙኑቃን ኩሚዳ።

74 ኢዛን ኤጻኔይ ኩሚ ኡቲዳ ኢሲ ታሙ ሳቂሌ ዋርቃፌ ኦሴቲዳ ጨለፋታ፡

75 ጸጌቲዛ ያርሾስ ኢሲ ሚርጎ፡ ኢሲ ጳርሾ፡ ኢሲ ላይላ ጳርሾ ላቃ፡

76 ናጋራ ያርሾስ ኢሲ ዳይሻ ኦርጌ፡

77 ኢሲፌቲላ ያርሾስ 2 ቦራታ፡ 5 ጳርሾታ፡ 5 ዳይሻ ኦርጌታኔ ላይላ ኩሚዳ 5 ጳርሾ ላቃታ፤ ሄይቲ ወሪ ኦክራ ና ፋጉኤሌ ያርሾታ።

78 ታማኔ ናምኣንላ ጋላስ ኒፍታሌሜ ዛርኬታ ጋርሳፌ ኤናኔ ና ኣሂሬይ ሺሺዳስ።

79 ኢዚ ሺሺዳ ያርሾቲካ ሃይሳፌ ካሊዛይታ፡ ኤሬቲዳ ሜዛኔን ዋሊን 130 ሳቂሌ ቢራፔ ኦሴቲዳ ኢሲ ፒጫ ሳኔኔ 70 ሳቂሌ ኢሲ ጉቃ ሳኔ፡ ናምኣይካ ካላ ያርሾ ሺሻናሰ ሊቆ ጳሌፌ ዛይቲን ሙኑቄቲዳ ሙኑቃን ኩሚዳ።

80 ኢዛን ኤጻኔይ ኩሚ ኡቲዳ ኢሲ ታሙ ሳቂሌ ዋርቃፌ ኦሴቲዳ ጨለፋታ፡

81 ጸጌቲዛ ያርሾስ ኢሲ ሚርጎ፡ ኢሲ ጳርሾ፡ ኢሲ ላይላ ጳርሾ ላቃ፡

82 ናጋራ ያርሾስ ኢሲ ዳይሻ ኦርጌ፡

83 ኢሲፌቲላ ያርሾስ 2 ቦራታ፡ 5 ጳርሾታ፡ 5 ዳይሻ ኦርጌታኔ ላይላ ኩሚዳ 5 ጳርሾ ላቃታ፤ ሄይቲ ወሪ ኤናኔ ና ኣሂሬ ያርሾታ።

84 ያርሾ ያርሺዛሶዛ ቲይዲ ጌሺዳ ጋላስ ሃላቃቲ ያርሾሶዛ ኣንጂሶ ጋሶን ሺሺዳ ኢሞታይ ሃይታንታ፤ ቢራፔ ኦሴቲዳ 12 ፒጫ ሳኔታ፡ ቢራፔ ኦሴቲዳ 12 ጉቃ ሳኔታኔ ዋርቃፌ ኦሴቲዳ ኢሰታን ኤጻኔ ዋሊዛ 12 ኬሬታ።

85 ቢራፔ ኦሴቲዳ ኢሲ ኢሲ ኬሬይ 130 ሳቂሌ ጌዲ ዳዴሰ፤ ቢራፔ ኦሴቲዳ ኢሲ ኢሲ ቁሌ ማላ ሳኔይ 7 ሳቂሌ ጌዲ ዳዴሰ፤ ቢራፔ ኦሴቲዳ ኬሬቲኔ ቁሌ ማላ ሳኔቲ ጾሳ ኬላ ሜዛኔን ዋሊዛ ዋዴ ኡባይ ኢሲ ቦላ 2,400 ሳቂሌ § ጌዲዳ።

86 ዋርቃፌ ኦሴቲዳ ኤጻኔይ ኢሰታ ኩሚ ኡቲዳ ታማኔ ናምኡ ሻቲቲ ጎዳ ኬላ ሜዛኔን ዋሊዛ ዋዴ ኢሶይ ኢሶይ 10 ሳቂሌ

ጊዲሺን ኡባይ ኢሲ ቦላ 120 ሳቂሌ * ጊዲዴስ።

⁸⁷ ካፋ ያርሾራ ኢሲፌ ጸጌቲዛ ያርሾስ ሽቂዳ ሜሄ ቆዳይ 12 ቦራታ፥ 12 ቆርሾታኔ ላይሐ ኩሚዳ 12 ቆርሾ ላቃታ፤ ቃሴ ኢስቲ ናጋራ ያርሾስ ሽሺዳይ 12 ዴይሻ ኦርጌታ።

⁸⁸ ኢሲፌቴፋ ያርሾስ ሽቂዳ ሜሄ ቆዳይ 24 ቦራ፥ 60 ቆርሾ፥ 60 ዴይሻ ኦርጌኔ ላይሐ ኩሚዳ 60 ቆርሾ ላቃ፤ ያርሾ ያርሺዛሶዚ ቲዬቲ ጌዪዳፔ ጉዬ ኣንጂሶ ባኣሌስ ኢሜቲዳ ኢሞታቲ ሃይታንታ።

⁸⁹ ሙሴይ ጎዳራ ሃሳያናስ ጌዴ ጋይቶቴፋ ዱንካኔዛን ጌሊን ኣቶቴሐ ዴማናስ ሽቂዛሶን ታቦታ ካማ ቦላ ዲዛ ናሞኡ ከሩቤታ ጊዶራ ጎዳይ ኢዛስ ሃሳይዛ ቃላ ሲዪዲ ኢዚካ ኢዛራ ሃሳዬቲዴስ።

8

ጸሞፔታ ዋሶሶ

¹ ጎዳይ ሙሴስ ሂዝጊዴስ፤

² « ኔኒ ኣሮኔስ ላፑን ጸሞፔታ ኢስታ ቦላ ዋሊዛ ዋዴ ጸሞፔቲ ጸሞፔ ኢስታ ቦላ ዋሊዛ ባላታስ ሲንፋ ባጋራ ዲዛሶ ፖኢሳና፤ ጋዳ ዮታ።»

³ ኣሮኔይካ ጎዳይ ሙሴ ኣዛዚዳ ማላ ኦሊዴስ፤ ጸሞፔታ ኢስታ ቦላ ዋሊዛ ባላታፔ ሲንፋ ባጋራ ዲዛሶዛ ፖኢሳና ማላ ጊግሲ ዋሊዴስ።

⁴ ጸሞፔታ ኢስታ ቦላ ዋሊዛ ባላቲ ጋርሳ ቶሆሶፔ ዶሚዲ ጨሼ ሚሳቲዛ ባላታ ጴራ ጋካናስ ቆጶቲዳ ዋርቃፌ ኦሴቲዳ፤ ሄይቲካ ጎዳይ ሙሴ ቤሲዳ ማላ ጸሞፔ ኢስታ ቦላ ዋሊዛ ባላታ ሌሚሶን ኦሴቲዳ።

ሌዌ ዛርኬቲ ጌዪዲ ዲማቲዛ ዋጋ

⁵ ጎዳይ ሙሴስ ሂዝጊዴስ፤

⁶ «ሃንኮ ኣቲዳ ኢስራኤሌ ዴራ ጋርሳፌ ሌዌ ቆሞታ ዲማ ሻካዳ ጌሻ።

⁷ ጌሾ ዋጋስ ጊጌቲዳ ሃፋን ኢስታ ኣራጫ፤ ኢስቲ ባንታ ቦላ ዲዛ ኢሰኬ ኡባ ሜዴታናሲኔ ባ ማይኦካ ሜጨዲ ባና ጌሻና ማላ ኦፋ።

* 7:86 120 ሳቂሌይ 1.4 ከሎ ጊራሜ ጊዴስ።

8:4 ኬሳ 25:31-40፤

8 ሄሳፌ ካሊዲ ኢሲ ሚርጎኔ ካፋ ያርሾስ ጊዲዛ ሊቆ ጳሌፌ ዛይቲን ሙኑቁቲዳ ሙኑቃ ኤኪ ቤቶ፤ ኔካ ናጋራ ያርሾስ ሸቂዛ ኢሲ ሚርጎ ኤካ ባ።

9 ሄሳፌ ጉዬ ኔ ኢሰራኤል አሳ ሸሻዳ ሌዌቲ ጋይቶቴፋ ዱንካናስ ሲንፋ ባጋራ ጎዳ ሲንፋን ኤሳ።

10 ኢሰራኤል አሳይካ ሌዌታ ሁኤ ቦላ ባ ኩሼ ዋ።

11 አሮኔይ ሌዌታ ጎዳ ኦሶ ኦፋናስ ጊጌቲዳይታ ጊዳና ማላ ኢሰራኤል አሳ ጋርሳፌ ያኔ ሃ ቃሴሊ ሸሺዛ ያርሾ ኦሊዲ ኢስታ ጎዳ ሲንፋ ሸሹ።

12 «ሄሳፌ ጉዬ ሌዌቲ ባ ኩሼታ ሄ ናሞኡ ሚርጎታ ሁኤ ቦላ ዋ። አሳ ናጋራ ወርሶ ያርሾስ፤ አሳ ጸጌቲዛ ያርሾስ ኦፋና ኢስታ ማሪሳናስ ጎዳ ሲንፋን ያርሻ።

13 ሌዌታ ያኔ ሃ ቃሴሊ ሸሺዛ ያርሾ ሂስታዳ ጎዳ ሲንፋ ሸሻ፤ አሮኔይ ኢዛ ናይታካ ኢስታ ቦላ ሹማ።

14 ሄሳ ማላን ሌዌቲ ታይታ ጊዳና ማላ ሃንኮ ኦቲዳ ኢሰራኤል አሳ ጊዳፌ ኔ ታስ ኢስታ ሻካ።

15 «ኔኒ ሌዌታ ሻካ ጌሺዳፔኔ ያኔ ሃ ቃሴሊ ሸሺዛ ያርሾ ሂስቲዳፔ ጉዬ ኢስቲ ጋይቶቴፋ ዱንካኔዛ ጊዳን ኦፋና ቤሲዛ ኦሶዛ ፖላናስ ዬቶ።

16 ታኒ ኢስታ ኮይሮ ባይራ ዬሌቲዛ ኢሰራኤል አሳ ኦቲማ ናይታ ኡባ ጊሻስ ታስ ዶራዲስ፤ ኢሰራኤል አሳ ጊዳፌ ኢስቲ ታስ ሙሌራ ቡዞ ጊዳና።

17 ጊብጼ ቢታን ባይራ ዬሌቲዳ አሳፔ ሜሄ ጋካናስ ዲዛይታ ታኒ ዋጲዳ ዋዴ ኢሰራኤል አሳ ኢሳ ኢሳ ኬፋን ኦዴ ጊዲዲ ባይራ ዬሌቲዳ አሳፔ ሜሄ ጋካናስ ዲዛይታ ኡባ ታስ ዱማሳ ሻካዲስ።

18 ሃኢ ቃሴ ኢሰራኤል አሳ ባይራ ኦቲማ ናይታ ጊሻስ ሌዌ ዛርኬታ ታስ ሻካዲስ።

19 ኢስቲ ኢሰራኤል አሳ ጊሻስ ጊዲዲ ጋይቶቴፋ ዱንካኔዛ ጊዳን ታስ ኦፋና ማላኔ ኢሰራኤል አሳይ ጌዴ ጌሻሶዛኮ ሸቂዳ ቦሻን ቦሼቶንታ ማላ ኢስታ ናጋና ማላ ሌዌታ ኢሰራኤል አሳ ጋርሳፌ ታስ ኢሞታ ማላ ኤካዳ አሮኔሲኔ ኢዛ ናይታስ ኢማዲስ።»

20 ሄሳ ጊሻስ ጎዳይ ሙሴ አዛዚዳ ማላ ሙሴይ፤ አሮኔይኔ ኢሰራኤል አሳይ ኡባይ ሌዌታ ዱማሲ ሻኪዳ።

21 ሌዌቲ ሜጤቲ ጌዱዳ፤ ባ ማይኦካ ሜጤዳ፤ ኦሮኔይ ኢስታ ያኔ ሃ ቃሴሊ ሺሺዛ ያርሾ ሂስቲ ጎዳ ሲንሐ ሺሺዳስ፤ ጌሾ ዋጋካ ኢስታ ጊሻስ ፖሊዳስ።

22 ጎዳይ ሙሴስ ሌዌታ ጊሻስ ኦሚዳ ኦዛዘዛ ማላ ዴሬዚ ወሪካ ኦሊዳስ፤ ሄሳ ማላን ሌዌቲ ኦሮኔኔ ኢዛ ናይታ ኦላፊቴላ ጋርሳን ጋይቶቴላ ዱንካኔዛ ጊዶን ኦላናስ ጊጌቲዳ።

23 ጎዳይ ሙሴስ ሂዝጊዳስ።

24-25 «ሌዌቲ ኦሶ ደማናስ ቤሲዛ ዋጋቲ ዬሌቲን ናምኡ ታማኔ ኢቻሹ ላይላፊ ቢዲ ኢቻሹ ታሙ ላይላ ጋካናስ ዲዛይቲ ወሪ ጋይቶቴላ ዱንካኔዛ ጊዶን ኦሌቶ፤ ኢቻሽ ታሙ ላይላ ኩሚሺን ኦላፊቶ።

26 ሄሳፊ ጉዬ ኢስታ ኢሻቲ ጋይቶቴላ ዱንካኔዛ ጊዶን ኦሊዛ ዋዴ ማዳናስ ዳንዳዬቴስ ኦቲን ባርካ ጸላ ዲኮ ኦይ ኦሶካ ኦላፊቶ።»

9

ፓዚጋ ባኦሌ ቦንቾ ዋጋ

1 ኢስራኤሌ ኦሳይ ጊብጾፔ ኬዚዳ ናምኦንሉ ላይላን ኮይሮ ኦጊናን ጎዳይ ሙሴስ ሲና ባዞን ሂዝጊ ዮቲዳስ።

2 «ኢስራኤሌ ኦሳይ ፓዚጋ ባኦሌዛ ኢዚ ቦንቾቲዛ ዋዴን ቦንቾ፤

3 ሃይሳ ሃ ኦጊናዛን ታማኔ ኦይዳንሉ ጋላሳ ኦማርስ ዋጋ ማላኔ ዲዛ ማራ ማላ ቦንቾ።»

4 ሄሳ ጊሻስ ሙሴይ ፓዚጋ ባኦሌዛ ኦሳይ ቦንቻና ማላ ዮቲዳስ።

5 ኢስቲካ ኮይሮ ኦጊናይ ጌሊዳ ታማኔ ኦይዳንሉ ጋላስ ጋዴይ ቃሚሺን ሲና ባዞን ፓዚጋ ባኦሌዛ ቦንቾዳ፤ ኢስራኤሌ ኦሳይ ጎዳይ ሙሴ ኦዛዚዳ ማላ ኡባ ኦሊዳ።

6 ጊዶ ኦቲን ኢስታ ጋርሳፊ ሃይቂዳ ኦሃ ቦቺዳ ጊሻስ ቱኒዳ ኦሳቲ ኢስታ ጊዶን ዲዛ ጊሻስ ሄ ጋላስ ፓዚጋ ባኦሌዛ ቦንቻናስ ዳንዳይቤቴና፤ ሄሳ ጊሻስ ኢስቲ ሙሴኮኔ ኦሮኔኮ ሸቂዳ።

7 ሙሴስ፡ «ኑኒ ኦሃ ቦቺዳ ቱኒዳስ ሺን ሃንኮ ኢስራኤሌ ኦሳፔ ዱማሶን ኑኒ ኢዛ ዋዴን ጎዳስ ያርሾ ሺሾንታ ማላ ኦዛስ ዲጌቲዘኒ?» ጊዳ።

8 ሙሴይካ ኢስታስ፡ «ታኒ ጎዳፔ ኢዚ ኢንቴ ጊሻሰ ኣዛዚዛይሳ ሲያና ጋካናሰ ናጊሺቴ» ጊዳስ፡

9 ጎዳይ ሙሴስ ሂዘጊዳስ፡

10 «ኔኒ ኢሰራኤሌ ኣሳስ፡ ሓንቴፊ ጊዳን ዋይኮ ኢንቴ ዘፊላፊ ኣሳይ ኣሃ ቦቹዲ ቱኒኮ ዋይኮ ኦጌ ቢዳ ጊዳኮ ኢዛዳይ ጎዳ ፓዚጋ ባኣሌ ቦንቻናሰ ዳንዳዬስ፡፡

11 ሄሲካ ናሞኣንሉ ኣጊናይ ጌሊዳ ታማኔ ኦይዳንሉ ጋላስ ጋዴይ ቃሚሺን ቦንቻናሰ ዳንዳዬስ፤ ኢስቲ ቦንቹሺ ፓዚጋ ዶርሳ ኢርሾይ ጌሎንታ ኡኩሉ ጫሞ ሚላ ሃይላራ ሜቶ፡፡

12 ጋዴይ ዋንታና ጋካናሰ ሄ ካላፊ ኣይኮካ ኣሾፊቶ፤ ሹኩቲዳ ሜሄዛ ሜቁላፊ ኢሲኔዮካ ሜንሉፊቶ፤ ኢስታስ ኢሜቲዳ ዋጋ ማላ ባኣሌዛ ቦንቹቶ፡፡

13 ጌሽ ጊዳዲኔ ኦጌ ቦንታ ኣሲ ኦኒካ ፓዚጋ ባኣሌዛ ቦንቹዛ ጋላስ ቦቹንታዴይ ታ ዴራፔ ሻኩቶ፤ ኢዚ ያርሾዛ ቤሲዛ ዋዴን ያርሾንታ ኣጊዳ ጊሻሰ ባ ናጋራሰ ቤሲዛ ቁጻቴ ኤኮ፡፡

14 « ኣኒቴ ጊዳን ቤቲ ዪዳ ሃራ ዴፊ ኣሲ ጎዳ ፓዚጋ ባኣሌዛ ቦንቻና ኮይኮ ዲዛ ዋጋ ማላ ኡባ ፖሊ ቦንቻናሰ ቤሴስ፤ ዴሬን ዪሉቲዳይሳ ጊዳን ኣሳ ቢታ ኣሰ ጊዳን ሃይሳ ዋጋዛ ኢሲ ማላ ፖሎ» ጋዳ ዮታ፡፡»

ታማ ሚሳቲዛ ሻራ (ኬሳ 40:34-38)

15 ጋይቶቴላ ዱንካኔዚ ቶኩቲዳ ጋላስ ሻራዚ ዱንካኔዛ ጎዚ ኦይኪዴስ፤ ኦማርሳፊ ቢዳ ጋዴይ ዋንታና ጋካናሰ ዱንካኔዛ ቦላ ታማ ሚሳቲዛ ሻራይ ካሚ ኦይኪዴስ፡፡

16 ጋላስ ጋላስ ሻራይ ካሚ ኦይኪዴስ፤ ሄ ሻራዚካ ኦማርሰ ኦማርሰ ታማ ማላ ፖኤስ፡፡

17 ሻራዚ ዱንካኔዛ ቦላፊ ዴንዲዛ ዋዴ ኡባን ኢሰራኤሌ ኣሳይ ባ ዱንካኒ ዲዛሶፔ ዴንዲ ቤስ፤ ሻራዚ ኤቁዛ ዋዴ ኣሳይካ ባ ዲዛሶን ዱንካኒ ኡቲስ፡፡

18 ኢሰራኤሌ ኣሳይ ባ ዲዛሶፔ ዴንዲ ቢዛ ዋዴ ጊዳን ኢስቲ ሃራሶን ዱንካኒ ኡቲዛ ዋዴ ጎዳይ ኢስታ ኣዛዚዳ ማላ ሃኔቴስ፤ ሻራዚ ዱንካኔዛ ቦላ ዋዲዲ ካሚ ኦይኪዳ ዋዴ ኡባን ኢስቲ ባንቲ ዱንካኒ ኡቲዳሶሆን ጋሞኤቴስ፡፡

19 ሻራዚ ዱንካኔዛ ቦላ ዳሮ ጋለስ ጋምኢኮካ ኢስቲ ጎዳስ አዛዜቱላን ሄን ባ ዱንካኒ ዲዛሶን ጋምኤቲስ ኣቲን አዋካ ቃጾቲና።

20 ኢሲ ኢሲ ዋዴ ሻራዚ ዱንካኔዛ ቦላ ጉላ ጋላሳታ ጸላ ጋምኤስ፤ ገዲኮካ ሄን ጋዳን ኢስቲ ጋምኢኮ ዋይኮ ጌዴ ሲንፊ ቢኮ ጎዳይ ኢስታ አዛዚዳ ማላ ሃኔቲስ።

21 ሻራዚ ኢሲ ኢሲ ዋዴ ጋዴይ ዋንታና ጋካናስ ጸላ ጋምኤስ፤ ጋዴይ ዋንቲሺን ሻራዚ ዴንዲዳ ማላ ሄራካ ሄማል ዶማቲስ፤ ዋይኮ ሻራዚ ጋለስ ገዲን ኦማርስ ዴንዲዳ ዋዴ ኢስቲካ ዴንዲ ቤቲስ።

22 ናምኤ ጋለስ ገዲን ዋይኮ ኢሲ አገና ገዲን ዋይኮ ኢሲ ላይሊካ ገዲን ሄሳፊካ አዳሳ ዋዴ ሻራዚ ዱንካኔዛ ቦላ ካሚ ኡቲዳ ዋዴ ኡባን ኢስቲካ ባንቲ ዱንካኒ ዲዛሶ፤ ቃጾቲና፤ ገዶ ኣቲን ሻራዚ ዴንዲ ቢዛ ዋዴ ኢስቲካ ዴንዲ ሄማል ዶማቲስ።

23 ኢስቲ ዱንካኒ ኡቲዛይ ዋይኮ ባ ዲዛሶ፤ ዴንዲ ቢዛይ ጎዳይ ሙሴስ ኢሚዳ አዛዞዛ ማላ።

10

ቢራፔ ኦሴቲዳ ዛዬታ

1 ጎዳይ ሙሴስ ሂዝጊዴስ፡

2 «ዴሬዛ ኢሲ ቦላ ሺሻናስ ገዲን ዋይኮ አሳይ ዱንካኒ ዲዛሶ፤ ዴንፊላናስ ፑኒዛ ናምኤ ዛዬታ ቢራፔ ቆጶ ኬሳ።

3 ናምኤ ዛዬቲ ፑኒቲዛ ዋዴ ኩማላ ማባራይ ጋይቶቲላ ዱንካኔዛ ፔንገን ኔ ዲዛሶ ሺቆ።

4 ኢሲ ዛዬይ ዛዬቲዛ ዋዴ ገዲኮ ኢስራኤል አሳፔ ኮራፒኔቲ ጸላ ኔኮ ሺቆቶ።

5 ዛዬዛ ቶቁ ሂስቲ ዛይኮ አርሼይ ሞኪዛ ባጋራ ዱንካኒ ኡቲዳ አሳይ ኮይሮ ሄማል ዶሞ።

6 ኔ ዛዬዛ ናምኢንሶ ቶቁ ሂስታ ፑኒዛ ዋዴ ዴንገሃ ባጋራ ዱንካኒ ኡቲዳ አሳይ ሄማል ዶሞ፤ ዛዬይ ቶቁ ገ ዛዬቲዛ ዋዴ አሳይ ሄማል ዶማናስ ማላታ ገዶ።

7 ዴራ ኢሲ ቦላ ሺሻናስ ዛዬታ ቶቁሶንታ ዚቂ ሂስታ ዛያ።

8 ቄሴ ገዲዳ አርኔ ናይቲ ዛዬታ ፑኒቶ፤ ሂሲካ ኢንቲስ ና ና ጋካናስ ኤቂ ዲዛ ዋጋ ገዶ።

9 «ኢንቲ ዴራ ቦላ ዋራጂዳ ኢንቲ ሞርኬታራ ኢንቲ ኦሌታናስ ኬዚዛ ዋዴ ዛዬታ ቶቁ ሂስቲ ፑኒቲ፤ ሂስቲኮ ጎዳ ኢንቲ ጶሳይ ኢንቲና ቆፓናኔ ኢንቲ ሞርኬታፔ ኢንቲና አሻና።

10 ሄሳታካ ኢንቴ ኡፋይሳ ባኣሌ ጋላስ፡ ሄሲካ ኣገና ባኣሌታኔ ዲማ ዲማ ኢንቴ ቦንቻናስ ቃቺዳ ባኣሌታ ቦንቹዛ ዎዴ ጸጌቲዛ ያርሾኔ ኢሲፌቲላ ያርሾታ ሺሺዛ ዎዴ ዛዬታ ፑኒቴ፤ ሄይቲ ጸሳ ሲንላን ኢንቴና ቆፍሳና፤ ታኒ ጎዳ ኢንቴ ጸሳ።»

ሲናፔ ኢስራኤል ኣሳ ቡስ

11 ዴሬዚ ጊብጾ ዴሬፔ ኬዚዳ ናምኣንሶ ላይላን ናምኣንሶ ኣገናይ ጌሊዳ ናምኡ ታማንሶ ጋላስ ማርካቴላ ዲንካኔዛፔ ቦላራ ዲዛ ሻራዚ ዴንዲዴስ።

12 ኢስራኤል ኣሳይ ሲና ባዘፌ ዴንዲዲ ሻራዚ ፓራኔ ባዘን ኤቃና ጋካናስ ዲማ ዲማሶን ሸምፒዳ።

13 ኢስራኤል ኣሳይ ጎዳይ ካሴ ሙሴ ኣዛዚዳ ኣዛዛዛ ማላ ኮይሮ ዩሾ ሄሜላ ዶሚዴስ።

14 ዩሁዳ ቆሞታ ባንዲራ ጋርሳን ዲዛ ኣሚናዳቤ ና ኔኣሶኔይ ካሌሊን ባ ቡቲ ታራ ናጊዲ ኮይሮ ቢዳ።

15 ዪሳቡሬ ዛርኬታ ካሌሊዛይ ጸኣሬ ና ናቲናኤሌ።

16 ዛቢሎኔ ዛርኬታ ካሌሊዛይ ሄሎኔ ና ኤልያቤ።

17 ሄሳፌ ጉዬ ዲንካኔዚ ሾዴቲን ዲንካኔዛ ቶኪዳይቲ ጌርሾኔ ቆሞቲኔ ሜራሬ ዛርኬቲ ቡስ ዶሚዳ።

18 ኢስታ ካሊዲ ኦርቤሌ ዛርኬታ ባንዲራ ጋርሳን ዲዛይቲ ሻዱሬ ና ኤልጵሬይ ካሌሊን ባ ታራ ናጊዲ ቢዳ።

19 ሲሞና ዛርኬታ ካሌሊዛይ ጵርሻዳዬ ና ሳሉሞኤሌ።

20 ጋዴ ዛርኬታ ካሌሊዛይ ዳኡኤሌ ና ኤልያሳፌ።

21 ሄሳፌ ጉዬ ሌዌ ባጋ ኣስ ጊዲዳ ቃኣቲ ዛርኬ ጊዲዳይቲ ጌሻ ሚሻታ ቶኪ ኤኪዲ ቢዳ፤ ኢስቲ ባፔ ሲንላ ባጋን ዲዛ ሄራዛ ጋካናፔ ካሴ ጸሳ ዲንካኔዚ ቶሊቲ ኡቴስ።

22 ሄሳፌ ካሊዲ ኤፍሬሜ ዛርኬታ ባንዲራ ጋርሳን ዲዛይቲ ኣሚሁዴ ና ኤልሻማይ ካሌሊን ባ ታራ ናጊዲ ቢዳ።

23 ሚናሴ ዛርኬታ ካሌሊዛይ ፔዳጵሬ ና ጋማልኤሌ።

24 ቢኒያሜ ዛርኬታ ካሌሊዛይ ጊዲኦኔ ና ኣቢዳኔ።

25 ዉርሴላን ሃ ቡቲታ ጉዬ ቱቻን ናጊዛ ዳኔ ዛርኬታ ባንዲራ ጋርሳን ዲዛይቲ ባ ታራ ናጊዲ ቢዳ፤ ዳኔ ቆሞታ ካሌሊዛይ ኣሚሻዳዬ ና ኣሂኤዘሬ።

26 ኣሴሬ ዛርኬታ ካሌሊዛይ ኦክራ ና ፋጉኤሊ፤

27 ኒፍታሌሜ ዛርኬታ ካሌሊዛይ ኤናኔ ና ኣሂሬ።

28 ሄሳ ጊሻስ ኢስራኤል ኣሳይ ካሴ ባ ዲዛሶፔ ኬዚዲ ባ ቡቲን ቡቲን ቢዛ ቡሳ ማራይ ሃይሳ ማላ።

29 ሙሴይ ባ ማቼይ አዋ ሚዲያሜ ዳሬ አስ ኤራኤሌ ና ሆባቤስ፡ «ሄኮ ኑኒ ጎዳይ ኑስ አማናስ ካሴ ጫቂዳ ዳሬ ባናስ ገብቲደስ፤ ጎዳይ ኢስራኤሌ አሳ ዳሬሳናስ ካሴ ኑስ ጫቂ ዋሊደስ፤ ሄሳ ገሻስ ኔካ ኑናራ ሄቆ፤ ኑኒ ኔስ ሎኦ ኦፋና» ገደሰ።

30 ሆባቤይ፡ «አካይ! ካሴ ታኒ ዬሌቲዳ ዳሬኔ ታ ዳቦታኮ ሲማ ባና» ገደሰ።

31 ሙሴይ አዛስ፡ «ኔ ኑፔ ሻኬታ ቦፓርከ! ኑኒ ሃይሳ ባዞ ቢታን ቢሼ አዋን አዋን ሽምፓና ቤሲዛኮ ኔኒ ኤራሳ፤ ኔኒ ኑና ኑኒ ካሌሊዛ አስ ገዳና።

32 ኔኒ ኑናራ ቢኮ ጎዳይ ኑስ አሚዛ ሎኦ ሚሻ ኡባፌ ኑ ኔስ ሻኪ አማና» ገደሰ።

33 ዳሬዚ ገሻ ዙማይ ዲዛ ሲና ባዞ ዬጊዲ ሄሹ ጋላሳ ኦጌ ቢደስ፤ ሄሹ ጋላሳታን ጎዳ ጫቆ ቃላ ታቦታዚ አሳይ ሽምፓናሶ ኮያናስ አሳፔ ሲጎሳቲ ቢደስ፤ አሳቲ ካሴ ባ ዲዛ ሄራ ዬዳናፔ ካሴቲዲ አሳይ ሽምፓናሶ ኮያናስ ጫቆ ቃላ ታቦታዚ አሳታፌ ሲጎሳን ሲጎሳን ቢደስ።

34 አሳቲ ባ ዲዛሶፔ ዳንዲ ዳንዲ ቢሺን ጎዳ ሻራይ ጋላስ ጋላስ አሳታ ካሚ ኦይኬስ።

35 ጫቆ ቃላ ታቦታይ ባና ዳንዲሺን ዳንዲሺን ሙሴይ፡ «ጎዳዉ! ኔካ ዳንዲ፤ ኔ ሞርኬቲ ላሌቲቶ፤ ኔና ኢዲዛይቲ ዉሪካ ኔ ሲጎሳፌ ከቼቶ!» ገሰ።

36 ጫቆ ቃላ ታቦታዚ አሲሶ ጋኪ ኤቂዛ ዋዴ፡ «ታ ጎዳዉ! ዳሮ ሺያን ቆዳቲዛ ኢስራኤሌ አሳኮ ኔ አይፌሶ ሃ ዛራ» ገሰ።

11

ጸሓ ታማ

1 ኢስራኤሌ አሳይ ባ ቦላ ጋኪዳ ሜቶ ኡባ ገሻስ ጎዳ ቦላ ዙዙሚደስ፤ ጎዳይ አሳ ዙዙንሳ ዋሶዛ ሲዪዲ ኬሂ ሃንቂቲደስ፤ አሳታ ቦላካ ጸጊዛ ታማ ዬዲደስ፤ ሄ ጎዳ ታማይ አሳይ ዲንካኒ ኡቲዳሶሆፔ ጋጸራ አማርዳይሳ ሚደስ።

2 አሳይካ ባና ጎዳራ ገገሳና ማላ ሙሴኮ ዋሲደስ፤ ሙሴይካ ጎዳ ዋሲን ታማዚ ቶኢደስ።

3 ጸሓ ታማይ ሄን አሳታ ገደን ኤዲዳ ገሻስ ሄ ሶሆይ፡ «ታቤሬ»* ገብቲደስ።

10:35 ማዛ 68:1 * 11:3 ታቤሬ፡ ታቤሬ፡ ታቤሬ ጉሳ ቢርሽላይ፡ «ታማይ ኤዴስ» ጉሳ።

ጋፊዳ ጊሻስ አሳ ዙዙንል

4 ኢስራኤል አሳራ ዋላኬቲ ኬዚዲ ቢዛ ሃራ ዲማ ዲማ ዴሬ አሳይ አሾ ማናስ ዳሮ አዋቲዴስ፤ ኢስራኤል አሳይካ፥ «ኑኒ ማና አሾ አዋፔ ዴሚኖ!

5 ካሴ ኑ ጊብጾን ዲዛ ዋዴ አይኮ ሚሽ ቃንጸንታ ጮ ሜላ ሚዛ ሞሌ አሾይ፥ ሌሌሄይ፥ ሌሌሄ ሚሳቲዛ ሃቢሃቤይ፥ ዶኖ ሚሳቲዛ ኩራቲይ፥ ሱንኩርቶይኔ ቱሞይ ኑና ላሞሴስ።

6 ሃኢ ጊዲኮ ማና ጸላይ ኑና ሳሌሊዴስ፤ ቆጵይካ ካል ኢጲዴስ፤ ማናፌ አቲን ሃራ ኑ ቤኢዛ ካሊ ባዋ» ጊ ዬኪዴስ።

7 ማናይ ዴቦ አይፌ ማላ ጉላ፤ ኢዛስ ሜቆይ ቦጺ ኤኪዛ ሺዳ ማላ ጊዲዲ ጋላልኦ ሚሳቲስ።

8 አሳይ ሄሳ ዩዩ ዩዩ ማጾስ፤ ኢዛ ዋጸን ጋጨዲ ዋይኮ ኡዲላን ጫዲዲ ጉላ ጸሮን ሙኑቂዲ ኡኬስ፤ ሚሺን ኢዚ ዶናን ዛይቲራ ጊንዴቲ ኡኬቲዳ ኡኬላ ማላ ማልኤስ።

9 አማርስ አማርስ ኢስቲ ዲንካኒ ዲዛሶ ሄራን ጸዛይ ዋጲሺን ማናይ ኢዛራ ኢሲፌ ዋጵስ።

10 ዴሬዚ ወሪካ ባ ዲንካኔ ፔንጌን ፔንጌን ባሶ አሳራ አሳራ ኤቂዲ ዬኪሺን ሙሴይ ሲዩዴስ፤ ጸሲ ኢስታ ቦላ ሃንቄቲዳ ጊሻስ ሙሴይ ኬሂ ጨጨዴስ።

11 ኢዚ ጎዳ፥ «ሃይሳ ዴጾ ሜቶ ኔስ አይሌ ጊዲዳ ታ ቦላ አይስ ኤሃዲ? ኔኒ ሃይሳ ሃ ዴሬዛ ኡባ ዴጾ ቶሆ ታና ኔ ቶሳናስ ታ ኔና አይ ሚሺሳዲና?

12 ቡሮ ቆንል ቆሚዛ ና ዲቺዛ ሄ ጉላ ናዛ ኢዲሚዛ ማላ ታኒ ኢስታ ኢዲማዳ ኔኒ ካሴ አዋታስ ጫቂዳ ቢታ ጋላና ማላ ኔ ታና ኦሊዛይ ሃይታንታ ወርሳ ሻሪዳይ ታኔ? ዋይኮ ኢስታ ታ ዬላዲና?

13 ኢስቲ ታና፥ «ኑስ አሾ ኢማ» ጊዲ ታኮ ዩዲ ዬኪዛ ጊሻስ ሃይሳ አሳ ኡባስ ጊዳና አሾ ታ አዋፔ ኤሆ?

14 ታኒ ታርካ ሃይሳ ዴራ ካሌላናስ ዳንዳይኬ፤ ሃይሲ አላፌቲላዚ ታና ኬሂ ዴጲዴስ።

15 ኔ ታና ሃይሳሶ ዋዩሳናፔ ታኒ ሜቶ ቤኦንታ ማላ ኔ ታስ ሚሼቲዛ ጊዲኮ ኔ ታና ሃኢ ዋጲዳኮ ታስ ሎኦ» ጊ ዋሲዴስ።

ላፑን ታሙ ጨማታ ዶራቴል

16 ጎዳይ ሙሴስ፡ «ዳሬዛ ኣይሳና ዳንዳይዛ ኤሬቲዳ ላቸን ታሙ ጨማታ ዶራ፤ ኔኒ ኢስታ ሺሻዳ ጋይቶቲላ ዱንካኔዛኮ ኤሃዳ ኔ ኣቻን ኤሳ።

17 ታኒካ ሄ ዋዳዳ ኔናራ ሃሳያና፤ ታኒ ኔስ ኢሚዳ ኣያናፔ ኢስታስ ሻካ ኢማናና፤ ሄሳፌ ጉዬ ኢስቲ ዳሬዛ ኔስ ዲዛ ኣላፌቲላፌ ሻኪ ኤኪዲ ዳሬዛ ቶሆ ቶኪ ኔና ማዳና፤ ሃይሳፌ ጉዬ ሃይሳ ኣላፌቲላ ኔ ጸላ ቶካካ።

18 ሃኢካ ዳሬዛስ፡ «ዋንቶስ ኢንቴና ጌሺቴ፤ ኢንቴስ ማና ኣሾይ ዳና፤ ኢንቴ ኦኒ ማና ኣሾ ኦስ ኦኒ ኢማናይ ጊዲ ዩኪዳይሳኔ ኦስ ጊብጾይ ሎኦ ጊዳይሳ ጎዳይ ሲዩዴስ፤ ሄኮ ሃኢ ኢንቴስ ጎዳይ ኣሾ ኢማና፤ ኢንቴካ ኢዛ ማንዴታ።

19 ኢንቴ ኣሾ ማናይ ኢሲ ጋላስ ዋይኮ ናምኡ ጋላስ ዋይኮ ኢቻሹ ጋላስ ዋይኮ ታሙ ጋላስ ዋይኮ ናምኡ ታሙ ጋላስ ጸላ ጊዴና።

20 ኢዚ ኢንቴና ሳሌሊዲ ኢንቴስ ሲዴራ ኬዛና ጋካናስ ኣጊና ኩሜል ኢንቴ ኢዛ ማና፤ ሄሲካ ሃናናይ ኢንቴ ሃይሳ ኢንቴ ጊዶን ዲዛ ጎዳ ካዲዳ ጊሻሲኔ ኦኒ ጊብጾፔ ካሴ ኬዘንታ ኣጊዳኮ ኦስ ሎኦኮሺን ጊዲ ኢንቴ ዩኪዳ ጊሻሳ» » ጊዴስ።

21 ሙሴይ ጎዳስ፡ «ሄኮ ሃኢ ታኒ ካሌሊዛይ ኡሱቸን ጸቱ ሺ ኣሳ፤ † «ኔኒ ኣጊናስ ጊዳና ኣሾ ኢስታስ ኢማናና» ጋዳ ቃላ ጊላዳሳ።

22 ሂስቲን ሃይሳ ኣሳስ ኣይ ኬና ሜሄይ ሹኬቲን ጊዳኔ? ኣባ ጊዶን ዲዛ ሞሌይ ኡባይ ኢሲ ቦላ ሺቂዳኮ ጊዳንዴ?» ጊ ኦይቺዴስ።

23 ጎዳይ ሙሴስ፡ «ታስ ጸሳስ ዋልቃይ ጉሉ? ታ ቃላይ ኢንቴ ኣቻን ፖሌታናኮኔ ኣጋናኮ ኔ ሃኢ ቤኣና» ጊ ዛሪዴስ።

24 ሄሳ ጊሻስ ሙሴይ ኬዚዲ ጎዳይ ኢዛስ ጊዳይሳ ኡባ ዳሬዛስ ዮቲዴስ፤ ዳሬዛ ካሌሊዛይታፔ ላቸን ታሙ ኣስ ኢሲስ ሺሺዲ ዱንካኔዛ ዩሾን ኤሲዴስ።

25 ጎዳይካ ሻራራ ዋዲዲ ኢዛስ ዮቲዴስ፤ ሙሴስ ኢሚዳ ኣያናፔ ሻኪዲ ዴራ ካሌሊዛ ላቸን ታሙ ጨማታ ቦላ ዋሊዴስ፤ ኣያናይ ኢስታ ቦላ ዋዲን ኢስቲ ባንታ ቃላ ቶቁ ሂስቲዲ ናቤታ ማላ ቲንቢቲ ሃሳይዳ፤ ኢስቲ ሄሳ ናምኣንሊቤቴና።

26 ማዘጋገቤቲዳ ላቸን ታሙ ዴራ ካሌሊዛይታ ጊዶፌ ናምኣቲ ኤልዳዴኔ ሜዳዴ ጌቲቲዛይቲ ጌዴ ዱንካኔዛኮ ቦንታ ባንቲ ዲዛ

† 11:21 ኣሳ፡ ኣሳ ጊዛይሲ ማጫሳታኔ ናይታ ጉጁና።

ሄራን ጋሞኢዳ፤ ኢስቲ ሄን ዲሺን አያናይ ኢስታ ቦላ ዋዲን ኢስቲካ ባ ቃላ ቆቁ ሂስቲዲ ናቤታ ማላ ቲንቢቲ ሃሳይዳ።

27 ኢሲ ናቲላ አሲ ሙሴኮ ዋጺ ቢዲ፡ «ኤልዳዳይኔ ማዳዳይ ሄን ባንታ ሄራን ዲሺ ቲንቢቲ ሃሳይቲስ» ገ ዮቲዳስ።

28 ናቲላፌ ዶሚዲ ሙሴ ኦሊ ማዲዛ ናዌ ና ኢያሶይ፡ «ታ ጎዳ ሙሴ! ሃይታንቲ ቲንቢቲ ሃሳዮንታ ማላ ቲቃ!» ገዴስ።

29 ሙሴይካ ኢዛስ፡ «ኔ ታስ ሚሼታዳ ሄሳ ጋይ? ታኒ ገዲኮ ጸሲ ሃይሳ ዴራ ኡባ ቦላ ባ አያና ዋሊኮኔ ኡባይካ ባ ቃላ ቆቁ ሂስቲዲ ናቤታ ማላ ቲንቢቲ ሃሳይዳኮ ሄሲ ታስ ኡፋይሳ!» ገዴስ።

30 ሙሴይኔ ኢስራኤል አሳ ካሌሊዛ ላፑን ታሙ አሳይ ጌዴ ባ ዲዛሶ ሲሚዴስ።

ጎዳይ ኩራቾ ሚሳቲዛ ካፎ ዩዲዴስ

31 ሄሳፌ ጉዬ ጎዳይ ጫርኮ ዴንሊዲ አባ ገደፌ ኩራቾ ሚሳቲዛ ካፎ አሳይ ዴንካኒ ኡቲዳ ሄራ ኤሂዴስ፤ ሂስቲዲ ሄ ካፎታ ቢታፌ ፑዴ ናሞኡ ዋዳ ኬና ቆቁ ገዲ ፒራዲ ዩዲ አሳይ ዴንካኒ ኡቲዳ ሄራ ዩሾን ኢሲ ጋላሳ ኦጌ ኬና ገዲዛሶን ቢታ ቦላ ማይኢ ኡቲዳ።

32 ሄሳ ገሻሰ ሄ ጋላሲኔ እማርስ፡ ሄሳሶካ ዋንቴላ ጋላሲካ ዴሬዚ ሄ ካፎታ ኦይኪ ሺሺዴስ፤ ኢሲ አሲካ ታሙ ኪሎፔ ፓጮ ኦይኪቤና፤ ኢዚካ ሜላና ማላ ባ ዴንካኒዳ ሄራ ዩሾ ኡባን ሚጪዳ።

33 ገደ ኦቲን ኢስቲ ቡሮ ጮሚ ሚቶንታ ዲሺን ጎዳይ ዴራ ቦላ ኬሂ ሃንቁቲዴስ፤ ጎዳይ ገታ ቦሻካ ዴራ ቦላ ዩዲዴስ።

34 አሾ አሞቲዲ ሃይቂዳ አሳ ሄን ጋዳን ሞጊዳ ገሻሰ ሄ ጋዴዛ ሱንሊ፡ «ኪብሮቴ-ሃታኣቤ»፥ ጌቲቲዴስ።

35 አሳይ ኪብሮቴ-ሃታኣቤ ጌዴ ሃጺሮቴ ቢዲ ሄን ዴንካኒ ኡቲዴስ።

12

ሙሴ ቦላ ማራሚኔ አሮኔ ዴንዶ

1 ሙሴይ ቶጵፓፔ ማቾ ኤኪዳ ገሻሰ ማራማኔ አሮኔይ ዘገርሳን ኢዛ ሂዘገ ካዲዳ፡

፥ 11:34 ኪብሮቴ-ሃታኣቤ፡ ኪብሮቴ-ሃታኣቤ ጉሲ አሞ ዴፎ ጉሳ።

2 «ጎዳይ ሙሴ ባጋራ ጸላ ሃሳይዱ? ኑ ባጋራ ሃሳይቤ?»
ጎዳይ ኢስቲ ጊዳይሳ ኡባካ ሲደዳስ።

3 ሙሴይ ጊዳይኮ ቢታ ቦላ ዲዛ አሳ ኡባፌ አዲዳ አሸኬ
አሳ።

4 ሄራካ ጎዳይ ሙሴ፥ አሮኔኔ ማራሞ፥ «ኢንቴ ሄቫይ ጋይቶቴላ
ዱንካኔኮ ሃ ዪቴ!» ጊዳይክ ኢስቲካ ቢዳ።

5 ሂስቲን ጎዳይ ቱስ ሚሳቲዛ ሻራ ጊዳራ ዋዲዲ ዱንካኔዛ
ፔንጌን ኤቂዲ፥ «ሃይሶ አሮኔ! ሃኔ ማራሜ!» ጊ ዳይጊዳስ፤
ናሞአቲካ ጌዳ ኢዛ ሲንሐ ሸቂዳ።

6 ጎዳይ ኢስታስ፥ «ሄኮ ሃኢ ታ ኢንቴና ጊዛይሳ አኬኪ ሲደቴ!
«ኢንቴ ጊዳን ናቤቲ ዲኮ፥

ታኒ ታና ኢስታስ
አጂታን ቆንጨሳይስ፤
አጉሞን ኢስታ ሃሳይሳይስ።

7 ታኒ ታስ ሃጋዚዛ
ሙሴራ ጊዳይኮ
ሄሳ ማላን ሃሳይኬ፤
ኢዚ ታ ኬላን
አማኔቲዳ አሳ።

8 ሄሳ ጊሻስ ታኒ ኢዛራ ሲንላን
ቆንጨራ ሃሳይሰ አቲን
ጉዬራ ቆታን ሃሳይኬ፤
ኢዚ ታ ሜቆ ቤዴስ፤
ሂስቲን ኢንቴ ታ ኦሳንቻዛ
ሙሴ ቦላ

ዋኒ ያዮንታ ካጼ ቃላ
ሃሳይዳቲ?» ጊዳይክ።

9 ጎዳ ሃንቆይ ኢስታ ቦላ ታማ ማላ ኤጺ ኬዚዳስ፤ ኢዚካ
ኢስታ ሄን አጊ ቢዳስ።

10 ሻራዚ ዱንካኔዛ ቦላፌ ዴንዲ ቢን ማራማ ኢንቺራቻ
ሃርጋንቻ ጊዳዱስ፤ ኢንቺራቻ ሃርጌዚካ ኢዚ ቦላ ሻቻ ማላ
ቦላዳስ፤ አሮኔይ ማራሞ ቤዱሺን ኢዛ ኢዛስ ኢንቺራቻ ሃርጋንቻ
ጊዳ ቤታዱስ።

11 አሮኔይ ሙሴስ፥ «ታ ጎዶ! ኑኒ ኔ ቦላ ኦላዲ ናጋራ ጋሶን
ሃይሲ ኢታ ቂጽቴይ ኑ ቦላ ፖሌታና ማላ ኦሶፋርኪ!

12 ኢዛካ ባ አዪ ኡሎን ሃይቃዳ ኢዚስ ባጋ አሳቴላይ
ሜቴቲቺን ዬሌቲዳ አዉጫያ ና ማላ ኦሶፋርኪ!» ጊዳስ።

13 ሄሳ ጊሻስ ሙሴይ፥ «ጸሳው! ኢዛ ፓላርኪ!» ጊዲ ፑዴ ጎዳኮ ዋሲደሰ።

14 ጎዳይካ ሙሴስ፥ «ኢዚ አዋይ አይፊሶን ጩኝ ጩቲዳራካ ዩላታዳ ላፑን ጋላስ ጋካናስ ጋምኣ ኤሬኬ? ሄሳ ጊሻስ ኢዛ አሳይ ዲዛ ሄራፔ ኬዛዳ ላፑን ጋላስ ጋካናስ አሲ ባይንዳሶን ታካሹ፤ ሄሳፊ ጉዬ አሳይ ዲዛሶ ጌላናስ ዳንዳያውስ» ጊ ዛሪደስ።

15 ሄሳ ጊሻስ ማራማ አሲ ዲዛ ጉታፔ ካሬ ኬዛዳ ላፑን ጋላስ ጋካናስ ባና ጌንፋዱስ፤ ኢዛ ሄፔ ሲማና ጋካናስ ዴሬዚ ባ ዲዛሶፔ ሃራሶ ቃጺቤና።

16 ሄሳፊ ጉዬ አሳይ ሃጺሮቴፔ ዴንዲዲ ፓራኔ ባዞን ዱንካኒ ኡቲደስ።

13

ካናኔ ዴሬ ጸሞሲ ጸላናስ ቢዳ አሳታ

(ዛሬ 1:19-33)

1 ጎዳይ ሙሴስ ሂዝጊደስ፥

2 «ታማኔ ናምኡ ኢስራኤል አሳስ ኢማና ጊዳ ካናኔ ቢታዮ ጸሞሲ ጸሊዲ ያና ማላ ዬዳ።»

3 ሙሴይካ ጎዳይ ኢዛ አዛዚዳ ማላ ኢስራኤል አሳ ካሌላዛይታ ጊደፊ ፓራኔ ባዞፊ ታማኔ ናምኡ አሳታ ዬዲደስ።

4 ሄ አሳታ ሱንፋይካ ሃይሳፊ ካሊዛይሳ፤ ኦርቤሌ ዛርኬፊ ዛኩሬ ና ሻሙኤ፥

5 ሲሞና ዛርኬፊ ሆሬ ና ሳፋጾ

6 ዩሁዳ ዛርኬፊ ዮፊኔ ና ካሌቤ፥

7 ዪሳኩሬ ዛርኬፊ ዮሴፊ ና ዪጊኣሌ፥

8 ኤፍሬሜ ዛርኬፊ ናዌ ና ሆሴኤ፥

9 ቢኒያሜ ዛርኬፊ ኤራፎ ና ፓሊጾ፥

10 ዛቢሎኔ ዛርኬፊ ሳዴ ና ጋዲኤሌ፤

11 ዮሴፊ ዛርኬፊ ሚናሴ ባጋ ጊዲዳ ሱሴ ና ጋዴዬ፥

12 ዳኔ ዛርኬፊ ጋማሌ ና አምኤሌ፥

13 ኣሴሬ ዛርኬፊ ሚካኤሌ ና ሳቱሬ፥

14 ኒፍታሌሜ ዛርኬፊ ዋፊሴ ና ናሂቤ፥

15 ጋዴ ዛርኬፊ ማኬ ና ጋኤኤሌ።

16 ሄይቲ ዴሬዛ ሃኖታ ጸሞሲ ጸሊዲ ያና ማላ ሙሴይ ከቲዳይታ፤ ናዌ ና ሆሴኤ፥ «ኢያሶ» ጊዲ ኢዛ ሱንፋ ላሚደስ።

17 ሙሴይ ኢስታ ከቲ ዩዲሼ፥ «ኢንቴ ቢሼ ኔጌቤ ባጋራ አዲሲ ፑዴ ጌዜ ቢታ ቢቴ።

18 ሄ ዳሬያ አይ ሚሳቲዛኮ፥ አይ ኬና አሲ ኢዚን ዲዛኮ ቃሴካ አሳ ሚኖቴላ አይ ማላኮ ጸሞሲ ጸሊዲ ዩቴ።

19 ሄ ቢታያ ኢታኮኔ ሎኦኮ አሳይ ዲዛ ካታማያ ገምቤታ ኡቲዳኮ ዋይኮ ገምቤቶንታ ሙ ሚላ ዲዛኮ ጸሞሲ ጸሊቴ።

20 ቢታያ ሞጵኮኔ ቃላኮ፥ ዋራኮኔ ሙ ዲዛኮ ጸሞሲ ጸሊቴ፤ ሚኒቴ! ሄ ቢታን ዲዛ ሚላ አይፊታፔ ኤኪ ዩቴ» ጌዴሰ፤ ኢስቲ ሄ ቢዳ ዋዴይ ዋይኔ ሚላ አይፊይ ቴሪዛ ዋዴ።

21 ሄሳ ጊሻሰ ሄ ዋዴ አሳይ ፑዴሃ ባጋ ዴሬ ቢዴሰ፤ ሄ ዴሬዛን ዲዛ ጸኔ ባዞፊ ዶሚዲ ጌዴ ሃማቴ አዲ ቢዛሶዛ ማታን ዲዛ ኤሪሆቤ ጋካናሰ ዩዩ ጸሊዲ።

22 ኮይሮ ጌዴ ኔጌቤ ቢዲ ሄራ ኩብሮኔ ጋኪዳ፤ ኩብሮኔይካ፥ «ኤናቄ» ጌቴቲዛ ጌሳኔ ጉባ ጌታ አሳታ ዜሬላ ጌዲዳ አሂማኔ፥ ሻሻዬኔ ታለማዬ ጌቴቲዛ ዛርኬቲ ዲዛ ቢታ። [ኩብሮኔይ ጌብጸን ዲዛ ጸኖሴ ካታማይፔ ላፑን ላይላ ሲንሳታ ኤቃዱሰ።]

23 ኢስቲ ሄራ አዲሲ ጌዴ ኤሽኮሌ ሾባ ጋኪዳ፤ ሄፔካ ዋይኔ ሚላ አይፊራ ዲዛ ሃጋ ቃንጺ ኤኪዲ ሄ ዋይኔ ሚላ አይፊፔ ኢሲ ወርጮ ኢሳዴይ ባርካ ቶካናሰ ዳንዳዮንታ ዴጾ ጌዲዳ ጊሻሰ ናሞኡ አሳቲ ሚላን አሊ ቶኪዳ፤ ኢዛራ ኢሲፊ ኦሮማኔ ሚላ አይፊኔ ባላሴ ሚላ አይፊ ኤኪ ዩዳ።

24 ሄሲ ሄ ሶሆዚ፥ «ኤሽኮሌ* ሾባ» ጌቴቲዳ ጋሶይካ ኢስራኤሌ አሳይ ዋይኔ ሚላ ኢዛ አይፊ ወርጮዛራ ጋሊ ቃንጺ ኤኪዲ ዩዳሶ ጌዲዳ ጊሻሳ።

25 ኢስቲ ቢታዮ ኦይዲ ታሙ ጋላሰ ጸሞሲ ጸሊዳፔ ጉዬ አጊ ሲሚዳ።

ካናኔ ዴሬ ጸሞሲ ጸላናሰ ቢዳ አሳቲ ሺሺዳ ቆፋ

26 ፓራኔ ባዞን ቃዴሴን ዲዛ ሙሴኮ፥ ኦሮኔኮኔ ኢስራኤሌ ማባራ ኩሚላኮ ሲሚ ዩዲ ባንቲ ቤይዳይሳ ኡባ ቆንጨሲ ዮቲዳ፤ ባንቲ ኤኪ ዩዳ ሚላ አይፊዛካ ኢስታ ቤሲዳ።

27 ኢስቲ ሙሴሰ፥ «ኦኒ ቢታዮ ጸሞሲ ቤኢዲ አዳፊካ ኢዛ ማላኔ ኤሲ ኩሚዳ ዱሬ ዴሬ ጌዲዳሮ ሻኪ ኤሪዶሰ፤ ሄ ቢታያ ኢሚዛ አይፊዛ ሃይሳ ቤያ።

28 ጌዴ አቲን ሄ ዴሬዩን ዲዛ አሳይ ዳሮ ሚኖ፤ ሃሳፊ ቦላራ ኢስታ ካታማቲካ ዳሮ ጌታታኔ ገምቤይ ዩዩ አዲዳይታ፤ ሄሲ ሄሳ

* 13:24 ኢብራዊታ ቃላራ ኤሽኮሌ ጉሲ፥ «ዋይኔ አይፊ ወርጮ» ጉሳ።

ጊዲሺን አሳይ ቃሴ ጌሳኔ ጉባ ጊታ ጊዲዳ ኤናቄ ዜሬላታ ኑ ቤይዶስ።

29 አማሌቄ አሳይ ኔጌቤን ዲሺን፣ ሂቲ አሳይ፣ ያቡሴ አሳይ፣ አሞሬ አሳይ ቦላ ጌዜ ቢታን ካናኔ አሳይ ቃሴ ዮርዳኖሴ ሃላ ጋጸኒኔ ሜዲቴራኔ አባ አቻን ዳቴስ» ጊ ዮቲዳ።

30 ካሌቤይ ቃሴ ሙሴ ሲንላን አሳ ጮኡ ሂስቲዲ፣ «ኑኒ ኢስታ ጸናናስ ኑስ ጊዲዛ ዋልቃይ ዲዛ ጊሻስ ኑኒ ሃኢ ቢዲ ሄ ቢታዮ እኔ አይኮስ» ጊዴስ።

31 ካሌቤራ ቢዳ አሳቲ ቃሴ፣ «ኑኒ ኢስታ ቦላ ሜቶ ጋላናስ ሙሌካ ኑስ ዋልቃይ ባዋ፤ ሄ ዴራን ዲዛ አሳይ ኑፔ ዳሮ ሚኖ» ጊዳ።

32 ኢስቲ ጸሞሲ ጸላና ቢዳ ዴሬዛ ጊሻስ ኢስራኤል አሳስ ኤሂ ዮቲዳ ዮኦይ አሳስ ዲዛ ሂዶታ ቃንጺሲዛ ዮኦ፤ ኢስቲ ቃሴካ፣ «ኑኒ ኢዞ ጸሞሲ ጸሊዳ ቢታያ ኢዚን ዳናስ ቢዛ አስ ሚቲዛ ቢታ፤ ኑኒ ሄን ቤይዳ አሳይካ ጌሳኔ ጉባ ጊታ።

33 ኔፍሌሜ ባጋ ጊዲዳ ኤናቄ ናይታ ኑኒ ሄን ቤይዶስ፤ ኑኒ ኢስታ አቻን ቄሪ ጉሞባሮ ሚሳቲዶስ፤ ኢስቲካ ኑና ሄሳሶ ጸሎንታ አጌቴና» ጊዳ።

14

ሙሴ ቦላ ዴሬዛ ዴንሐ

1 ዴሬዚ ሄ ጋላሳ ኑማርስ ኩሜሐ ባ ቃላ ቶቄ ሂስቲዲ ዋሲሼ አቂዴስ፤

2 ኩሜላ ኢስራኤል ማባራይ ሙሴ ቦላኔ አሮኔ ቦላ ዙዙሚሼ፣ «ኑኒ ካሴ ሄን ጊብጾን ዲሼ ዋይኮ ሃይሳ ሃ ባዞ ቢታን ሃይቂዳኮ ኑስ ሎኦኮሺን!

3 ጎዳይ ኑና ሂኖ ሄ ዴሬዮ አዛስ ኤፊዜ? ኑኒ ወሪካ ኦላን ወራናስ ዶስ፤ ኑ ማቹቲኔ ኑ ናይቲካ ዲኤታና፤ ሄሳፌ ኑኒ ዴጌ ጊብጾ ሲሚኮ ኑስ ሎኦኖ» ጊዳ።

4 ሄሳ ጊሻስ ኢስቲ ባ ጋርሳን ኢሶይ ኢሳራ፣ «እኔ ሃ ጴቴ! ኑና ካሌላና አስ ዶሪዲ እኔ አጌ ጉዬ ጊብጾ ሰሞስ» ጊ ሃሳዬቲዳ።

5 ሄ ዋዴ ሙሴይኔ አሮኔይ ኩሜላ ዴራ ሲንላን ቢታ ቦላ ጉፋኒዳ።

6 ቢታዮ ጸሞላናስ ኪቲቲዳ አሳታፔ ናዌ ና ኢያሶይኔ ዮፌኔ ና ካሌቤይ ዮኦዛን ዳሮ ጨጨዲ ባንታ ማይኦዛ ዳኪዳ።

7 ኢስቲ ዳሬዛስ፡ «ኮኒ ቢዲ ዩዪ ጸሞሲ ዴሊዳ ቢታያ ኬሃ ሎኦ ቢታ።

8 ጎዳይ ኑናን ኡፋዬቲዳ ጊዲኮ ኢዚ ኑና ሄ ኤፋና፤ ኤሲኔ ማሊ ኢዚን ኩሚዳ ጋሳ ቢታዮ ኢዚ ኑስ ኢማና።

9 ኢንቲ ጊዲኮ ጎዳ ቦላ ማካሎፍቲ! ሄን ዲዛ ዳሬዛስካ ባቦፍቲ! ኮኒ ኢስታ ቂሶን ጸናና፤ ጎዳይ ኑናራ ዴሰ፤ ኢስታ ቦላፌ ኤሾይ ዴንዲቺዳ ጊሻስ ኢንቲ ኢስታስ ሙሌካ ባቦፍቲ!» ጊዳ።

10 ኢስታ ሹቻራ ጫዲ ዋዳናስ ኩሚዳ ማባራይ ኢስታ ቦላ ዴንዲዴስ፤ ጊዳ ኣቲን ጎዳ ቦንቾይ ኢስራኤሌ ኣሳ ኩሚዳስ ጋይቶቲፋ ዲንካኔዛን ቆንጨዴስ።

ሙሴይ ዳሬዛስ ዋሲዳ ዋሳ

11 ጎዳይ ሙሴስ፡ «ሃይሲ ዳሬዚ ኣይዴ ጋካናስ ታና ካዳኔ? ታኒ ዳሬዛ ሲንፋን ዳር ማላታ ኦፋዲስ፤ ሂስቲን ዳሬዚ ታናን ኣማኔቶንታ ኣይዴ ጋካናስ ኢጸኔ?

12 ሄኮ ሃኢ ታኒ ኢታ ሃርጌ ኢስታ ቦላ ኤሃዳ ኢስታ ኡባ ወርሳና፤ ኔና ጊዲኮ ኢስታፌ ኣዲዛ ሚኖ ካዋቲፋስ ኣዋሳና» ጊዴስ።

13 ሙሴይ ጊዲኮ ጎዳስ፡ «ኔኒ ሃይሳ ዳሬዛ ኔ ዋልቃን ጊብጾፔ ኬሳዳሳ፤ ኔኒ ሃይሳ ኔ ዳሬዛ ቦላ ኦሊዳይሳ ጊብጾ ኣሳይ ሲዪዳ ዋዴ።

14 ሄሳ ሃኒዳ ዮኦ ኡባ ሃይሳ ዳሬዛን ዲዛ ኣሳ ኩሚዳስ ኢስቲ ዮታና፤ ሃይቲ ሃ ኣሳቲ ኔኒ ጎዳይ ኑናራ ዲዛይሳኔ ሻራይ ኑፔ ቦላራ ቆንጨን ቤቲዛ ማላ ኔኒ ጋላስ ጋላስ ሻራ ማላ ቱሳን ኦማርስ ኦማርስ ታማ ማላ ቱሳን ጊዳዳ ኑፔ ሲንፍ ኣዳ ካሌሊዛይሳ ሲዪሼ ጋሞኢዳ።

15 ሂስቲን ኔ ሃኢ ኔ ኣሳ ወርሳ ዋዲኮ ኔ ጎባቲፋ ሲዪዳ ካዋቲፋ ኡባይ።

16 ኔና፡ «ኢዚ ባ ዳሬዛ ጌልፋና ጊዲ ካሴ ጫቂዳ ጫቆዛ ፖላናስ ዳንዳዮንታ ኣጊዳ ጊሻስ ኢስታ ባዞን ዋዲ ዳይሲዴስ» ጋና።

17-18 ጎዳ ሃይሳፌ ካሴ ኔኒ፡ «ጎዳይ ኤሌ ሃንቁቲ ኤሬና፤ ኢዛ ማርቲፋይኔ ኢዛ ሲቆይ ዳር፤ ኢዚ ናጋራኔ ጌላቲፋ ኣቶ ጋና፤ ጊዳ ኣቲን ናይታኔ ኢስታስ ናይታ ናይታ ጋካናስ ኢስቲ ዩሊዳይታ ናጋራ ጊሻስ ታ ኢስታ ቃጸናና» ጊዳ ማላ ፖላዳ ኔ ዋልቃ ቤሳ።

19 ሃኢካ ጎደ! ለሜቶንታ ኔ ጌታ ሲቆዛን ኢስቲ ጊብጾፔ ኬዘሶፌ ሃኖ ጋካናሰ ኔ ኢስታ ማሪዳ ማላ ሃይሳ ዴራ ናጋራ ኔ ማራና ማላ ታ ኔና ዋሳይሰ» ጊዴሰ።

20 ጎዳይካ ሙሴሰ፡ «ኔ ታና ኦይቺዳ ማላ ታ ኢስታ ማራዲሰ።

21 ጊዶ ኣቲን ታኒ ዴኦን ዲዛ ማላኔ ታ ቦንቸይ ቢታ ኡባን ኩሚዳ ማላ።

22 ታኒ ኢስታሰ ጊብጾኒኔ ሃይሳ ባዞ ቢታን ኦሊዳ ጌታ ማላታኔ ታ ቦንቸዛ ቤኢዲ ታሰ ኣዛዜቶንታ ኢጲዳይታፔኔ ታሙቶ ታና ፓጪዳ ኣሳታፔ ኦኒካ።

23 ታኒ ካሴ ኢስታ ኣዋታሰ ኢማና ጋዳ ጫቂዳ ቢታኖ ኢስቲ ሙሌካ ጌሌቴና፤ ታና ካጲዳይ ኦኒካ ኢዞ ሙሊራ ቤኤና።

24 ጊዶ ኣቲን ታ ኦሳንቻ ካሌቤሰ ሃንኮይታፔ ዲማ ቆፋይ ኢዛሰ ዲዛ ጊሻሲኔ ኢዚ ታና ኩሜፋ ዋዚናፔ ካሊዳ ጊሻሰ ኢዚ ቢዲ ካሴ ዩዩ ጸሊዳ ቢታኖ ታ ኢዛሰ ኢማና፤ ኢዛ ዜሬፋቲካ ሄ ቢታኖ ላታና።

25 ኣማሌቄ ዴሬ ኣሳይኔ ካናኔ ዴሬ ኣሳይ ሾባ ጊዶን ዲዛ ጊሻሰ ኢንቲ ዋንቶ ጉዬ ሲሚዲ ዞኦ ኣባ ባጋራ ኤፊዛ ኦጌዛራ ጌዴ ባዞ ሲሚ ቢቲ» ጊዴሰ።

ዙዙሚዳይታ ቃጸዬቴሰ

26 ጎዳይ ሙሴሰኒ ኣርኔሰ ሂዝጊዴሰ።

27 «ሃይቲ ኢታ ኣሳቲ ኣይዴ ጋካናሰ ታ ቦላ ዙዙማኔ? ሃ ዙዙማቲዛ ኢሰራኤሌ ኣሳይ ታ ቦላ ዙዙማቲሺን ታ ሲያዲሰ።

28 ኔ ኢስታሰ፡ ታኒ ታ ዴኦ ሱንፋን ጫቃይሰ፤ ታኒ ኢንቲ ሃሳይሺን ታ ሃይፋን ሲዱዳ ማላ ኢንቲ ቦላ ኦፋና፤ ታኒ ጎዳይ ሃይሳ ኖታዲሰ።

29 ኢንቲ ታ ቦላ ዙዙማቲዳ ጊሻሰ ኢንቲ ጋርሳፌ ቆዴቲሺን ላይፋይ ናምኡ ታሙኒ ኢዛፔ ቦላራ ጊዲዳይታ ኡባ ኣሃይ ሃይሳ ባዞ ቢታን ኩንዲ ኣታና።

30 ኢንቲ ሄ ዴሬኖ ጌሊዲ ዴኣና ማላ ካሴ ታ ኢንቲሰ ጫቃዲሰ፤ ጊዶ ኣቲን ኖፊኔ ና ካሌቤፔኔ ናዌ ና ኢያሶፔ ኣቲን ኢንቲፌ ኢሳዴይካ ሄ ቢታኖ ጌሌና።

31 ዲኤቲዲ ኣታና ጌቲቲዳ ኢንቲ ናይታ ኢንቲ ካጲዳ ቢታኖ ታ ጌሌፋና፤ ሄ ቢታኖ ታ ኢስታ ላቲሳና።

32 ኢንቲ ኣሃይ ጊዲኮ ሃይሳ ሃ ባዞዛን ኩንዲ ኣታና።

33 አንቲ ናይቲ አንቲ ኣማኖንታ ኢጲዳ ጋሶን አንቲፌ ወርሴፋን ሃይቁዛዴ ኣሃይ ባዞ ቢታን ኩንዲ ኣታና ጋካናስ 40 ላይላ ኩሜል ጌታ ሜቶ ኤኪሼ ሃይሳ ሃ ባዞዛን ቶይላታና።

34 አንቲ ሄ ቢታ ጸሞሲ ጸሊዳ 40 ጋሳሳ ቆዳን ኢሲ ጋሳሳዮ ኢሲ ላይላ። ሄሲካ ኦይዱ ታሙ ላይላ ኩሜል አንቲ አንቲ ናጋራ ጊሻሰ ዋይታና፤ ታኒ አንቲ ቦላ ዴንዲዳይሳ አንቲ ሄሳን ኤራና።

35 ታ ቦላ ዴንዲዳ ኢታ ኣሳታ ቦላ ታኒ ሃይሳ ኡባ ኦላና፤ ሃይሳ ባዞዛን ኡባቲካ ወሪ ወራና፤ ኡባቲካ ሃይቃና፤ ታኒ ጎዳይ ሃይሳ ዮታዲሱን ጋ ዮታ።።»

36 ሙሴይ ካናኔ ቢታዮ ጸሞሲ ጸላናስ ከቲ ዬዲዳ ኣሳቲ ቢዲ ቢታዮ ቤዬ ሲሚዳፔ ጉዬ ሄ ቢታይ ጊሻሰ ኢታ ዋሪ ኤሄዲ ዴሪዚ ባ ጋርሳን ዙዙሜታና ማላ ኦሊዳ።

37 ሄ ኣሳቲ ጎዳ ሲንፋን ቦሻን ሾጮቲ ሃይቂዳ።

38 ሄ ቢታዮ ቢዲ ጸሞሲ ጸሊዳ ኣሳታ ጊደፌ ናዌ ና ኢያሶይኔ ዮፊኔ ና ካሌቤይ ጸላ ሼምፖራ ፓጸ ኣቲዳ።

ካናኔ ቢታ ቦላ ዴንዲዳ ኮይሮ ዋራጃ

(ዛሬ 1:41-46)

39 ጎዳይ ጊዳይሳ ሙሴይ ኢሰራኤል ኣሳስ ዮቲን ኣሳይ ጫሞ ዬሆ ዬኪዴስ።

40 ዋንቲፋ ጋላስ ዋንታ ማላዶራ ኢስቲ ዴንዲዲ ፑዴ ጌዜቲዛሶ ኬዛናስ ጊጌቲዲ። «ኮኒ ናጋራ ኦሶይሳካ ዛሪ ኣኬኪዶስ፤ ሃኢ ጊዲኮ ኮኒ ካሴ ጸሲ ኦና ጌልፋና ጊ ሂዶታ ኢሚዳ ዴሬዮ ባናስ ጊጌቲዶስ» ጊዳ።

41 ሙሴይ ጊዲኮ ኢስታሰ። «ሂስቲን አንቲ ጎዳስ ሃኢካ ኣይስ ኣዛዘቲኬቲ? አንቲ ቆፒዳይሲ አንቲስ ሱሬና።

42 ሄሳ ጊሻሰ አንቲ ሄ ቦፒቲ፤ ጎዳይ አንቲናራ ጊዶንታ ጊሻሰ አንቲ ሞርኬቲ አንቲና ጸናና።

43 ኣማሌቄ ኣሳይኔ ካናኔ ኣሳይ አንቲናራ ሄን ኦሌታና፤ ጊዶ ኣቲን አንቲ ጎዳ ኣጊዳ ጊሻሰኔ ኢዚ አንቲናራ ባይንዳ ጊሻሰ አንቲ ሄ ኦላን ሃይቃና» ጊዴስ።

44 ሙሴ ጊዲን ጫቆ ቃላ ታቦታዚ ካሴ ባ ዲዛ ሄራፔ ዴንዶንታ ዲሺን ኢስቲ ፑዴ ጌዜ ቢታዮ ኦላናስ ጸላቲፋን ዴንዲዳ።

45 ሄሳፌ ጉዬ ሄ ዴሬን ዲዛ ኣማሌቄ ኣሳይኔ ካናኔ ኣሳይ ኢስታ ቦላ ሜቶ ጋሊዲ ጸኒዳ ሆርማ ጋካናስ ጎዲ ዬዲዳ።

15

ያርሾ ገሻሰ ጉጃቲ አሜቲዳ ዋጋ

¹ ጎዳይ ሙሴስ ሂዝጊዴስ፤

² «ኔኒ ኢሰራኤል አሳሰ፤ ሓገቴስ አማና ቆፒዳ ቢታዮ አገቴ ጌሊዳ ዋዴ፤

³ ጸጌቲዛ ያርሾስ ዋይኮ ኣዲና ገሻሰ ያርሼታና ያርሾስ ዋይኮ ኣሲ ባ ሎኦ ቆፋፔ ሺሺዛ ያርሾ ገሻሰ፤ ዋይኮ ሎሴ ባኣሌታ ዋዴ ሺቂዛ ያርሾታ ሚዛፔ ዋይኮ ዶርሳፌ ጎዳስ አገቴ ሺሻንዴታ፤ ሄሳ ሚሳቲዛ ያርሾይ ጎዳ ሳዊዛ ያርሾ ገዳና፡፡

⁴ ሄሳ ገሻሰ ሄሳ ማላ ሺሺዛ ኣሲ ዉሪ ኢሲ ሊቲሮ ገዳና ዛይቲን ኢሲ ኪሎ ገዲዛ ሊቆ ጳሌፌ ሙኑቄቲዳ ካላ ያርሾ ሺሻናሰ ቤሴስ፡፡

⁵ ቃሴ ጸጌቲዛ ያርሾስ ዋይኮ ሃራ ያርሾስ ኤሂዛ ኢሲ ኢሲ ዶርሳ ላቃራ ኢሲ ሊቲሮ ዋይኮ ኡሻ ያርሾ ሺሺቲ፡፡

⁶ « ሳርሾ ያርሾስ ሺሺዛ ዋዴ ቃሴ ናምኡ ኪሎ ጳሌ ኢሲ ሊቲሮኔ ሳይሶ ገዲዛ ዋጋራ ዛይቲን ሙኑቄዲ ሺሺቲ፡፡

⁷ ኡሻ ያርሾስ ኢሲ ሊቲሮኔ ሳይሶ ገዲዛ ዋይኮ ኡሹ ሺሻ፤ ሄሲ ዉሪካ ሎኦ ጎዳ ሳዊዛዚኔ ኡፋይሲዛዝ ገዳና፤

⁸ « ሳኔ ኢሲ ሚርጎ ኣዲናሰ፤ ዋይኮ ኢሲፌቲላ ያርሾስ፤ ዋይኮ ጸጌቲዛ ያርሾስ፤ ዋይኮ ሃራ ያርሾስ ሺሺዛ ዋዴ፤

⁹ ሄ ሚርጎዛራ ሄሹ ኪሎ ገዲዛ ሊቆ ጳሌፌ ናምኡ ሊቲሮ ዛይቲን ሙኑቄቲዳ ካላ ያርሾ ሺሻ፡፡

¹⁰ ሄሳፉካ ኡሻ ያርሾስ ናምኡ ሊቲሮ ገዲዛ ዋይኮ ኡሹ ሺሻ፤ ሄሲካ ጎዳ ኡፋይሲዛ፤ ሳዊዛዚኔ ጸጌቲዛ ያርሾ ገዳና፡፡

¹¹ ሄሳ ገሻሰ ኢሲ ኢሲ ሚርጎ፤ ዋይኮ ኢሲ ኢሲ ሳርሾ ዋይኮ ሳርሾ ላቃ ዋይኮ ኮርቤ ላቃ ያርሾስ ሺሺዛ ዋዴ ኢሲፌ ሺቂዛ ካላ ያርሾይ ሄሳ፡፡

¹² ኢሲ ሜሄፔ ቦላራ ሺቂዛ ዋዴ ኢዛራ ኢሲፌ ሺቂዛ ካላ ያርሾይ ሄሳ ማላ ጉጃቲስ፡፡

¹³ ዴሬን ዩሌቲዳ ኢሰራኤል አሳፔ ኢሶይ ኢሶይ ጸጌቲዛ ያርሾኔ ሳዋይ ጎዳ ኡፋይሲዛ ያርሾ ሺሺዛ ዋዴ ሄሳፉ ኦፋናሰ ቤሴስ፡፡

¹⁴ ሲንፋፌ ያና ዩሌታን አገቴናራ ዲዛ ቤቲ ኣሲ ዋይኮ አገቴ ጋርሳን ዲዛ ሃራ ዴሬ ኣሲ ኦኒካ ጸጌቲዛ ያርሾ ዋይኮ ጎዳ ኡፋይሲዛ ካላ ያርሾ ጎዳሰ ሺሻና ኮይኮ ኢዛዴይካ አገቴ ኦፊዛይሳ ማላ ኦፋናሰ ቤሴስ፡፡

15 እንገንጽ ኡባቲካ እንገንጽ ጊደን ዲዛ አሳ ዳሬ አሳቲካ ሃይሳፌ ያና ላይላታን ኡባታን ሃይታ ዋጋታ ኢሲ ማላ ናጋናስ እንገንጽ በሴስ፤ እንገንጽ ኢስቲ ኡባቲ ጎዳ ሲንሳን ኢሲኖ።

16 እንገንጽ እንገንጽ ዲዛ ሃራ ዳሬ አሳ ኡባስ ዲዛ ዋጋይ ማራይ ኢሲኖ ጊደን ጋ ዮታ።»

17 ጎዳይ ሙሴስ ሂዝጊደስ፤

18 «ኔኒ ኢስራኤል አሳስ፤ ሆኖ እንገንጽ ካሌሊዛ ቢታዮ እንገንጽ ጌሊዛ ዋዴ፤

19 ሄ ቢታይን ካዲዛ ካል ኡባ ሚዛ ዋዴ ሄ ካላፌ ጎዳስ አሞታ አሚጥ።

20 ሄሲካ ኮይሮ ዲሊዛ፤ ኡኩል ኡኩዲ ባሌ፤ አሚጥ ያርሾ ኦሊዲ ሸሸጥ።

21 ቡሮ፤ ያና ዬሌታ ኡባን ኮይሮ ዲሊዛ፤ ኡኩዲ ጎዳስ አሞታ ሸሸጥ።

22 « ጎዳይ ሙሴስ አሚጥ አዛዞታ፤ ኢሳ እንገንጽ ኤርንታ ሞሪዛ ጊዲኮ፤

23 ዋይኮ ሲንሳፌ ያና ዬሌታ፤ ሙሴ ባጋራ አሚጥ አዛዞታ ፖሎንታ አጊኮ፤

24 ሄሳ ማላ ባላይ ማባራይ ኤርንታ ሃኒኮ ኢሲ ሚርጎ ኤሂዲ ጎዳ ሳዊዲ ኡፋይሲዛ ያርሾ፤ ጸጌቲዛ ያርሾ ኢዛስ ሸሸጥ፤ ዋጋዚ አዛዚዛ ማላ ካላ ያርሾ፤ ኡሻ ያርሾ ኢዛራ ኢሲ ቦላ ጋሊ ሸሸጥ፤ ሄሳፌካ ቦላራ ኢሲ ዳይሻ ኦርጌ ናጋራ ያርሾስ ሸሸጥ።

25 ቄሴዚ ኩሜላ ኢስራኤል ማባራ ናጋራ ወርሶ፤ ኢስቲ ኤርንታ ኦሊዲ ናጋራ ጋሶን ጸጌቲዛ ያርሾ፤ ካላ ያርሾ ሸሸጥ ጊሻስ ኢስታ ናጋራይ አቶ ጌቲታና።

26 ኡባይካ ኤርንታ ዲሼ ናጋራ ኦሊዲ ጊሻስ ኢስራኤል አሳ ዋይኮ ኢስታ ጊደን ዲዛ ሃራ ዳሬ አሳ ናጋራይ አቶ ጌቲታና።

27 « ሳሊ አሲ ኤርንታ ናጋራ ኦሊዲ ኢሲ ላይላ ዳይሻ ላቃ ባ ናጋራ ጊሻስ ያርሾስ ሸሸጥ።

28 ኤርንታ ዲሼ ናጋራ ኦሊዲዳስ ኢዛ ናጋራይ አቶ ጌቲታና ማላ ቄሴዚ ጎዳ ሲንሳን ኢዛ ናጋራ ወርሶ፤ ኢዛ ናጋራይካ አቶ ጌቲታና።

29 ኢስራኤል ዳሬን ዬሌቲዳ ኢስራኤል አሲ ዋይኮ ኢስታ ጊደን ዲዛ አሳ ዳሬ አሲ ኤርንታ ዲሼ ናጋራ ኦሊዲ ጊዲኮ ኡባስ ዲዛ ዋጋይ ኢሲ ማላ።

30 « ሪዶ አቲን ኢሰራኤል ዳሬ አሰ ዋይኮ ሃራ ዳሬፔ ቤቲ ኢስታ ጊዶ ዪዳ አሲ ዋዚናይ ኤሪሺን ናጋራ ኦሊዳ አሲ ዉሪካ ጎዳ ለቂዳ ጊሻሰ ዳሬዛፔ ሻኬቲ ጳዮ።

31 ኢዛዳይ ጎዳ ለቂዳ ጊሻሰኔ ኢዛ ኣዛዞታ ኤሪሺ ሞሪዳ ጊሻሰ ሙሌራ ጳዮ፤ ኢዛ ጎሜይ ኢዛራ ቦ ኃ ዮታ።»

ሳምባታ ዋጋ ሚንሒዲ ቃጸዬቲዳ አሰ

32 ኢሰራኤል አሳይ ባዘን ዲዛ ዋዳ ኢሲ ጋላሰ ኢሳዳይ ሳምባታ ጋላሰ ሚል ሚጺሺ ኦይኬቲዳሰ።

33 ሄ ኢዛ ኦይኪዳ አሳቲ ኢዛ ኦይኪ ኤኪዲ ሙሴኮ፥ ኣሮኔኮኔ ኩሜላ ማባራይ ዲዛሶ ኤፊዳ።

34 ኢስቲካ ኢዛ ዋሰታናኮኔ ኤፊቶንታ ኢጸን ጉላ ዋዳሰ ቃሹቲሻና ማላ ዛቤሰ ኢሜቲዳሰ።

35 ሄሳፌ ጉዬ ጎዳይ ሙሴሰ፥ «ሄ ኣዳዚ ሃይቆ! ኩሜላ ማባራይ ዲዛሶፔ ኢዛ ካሬ ኬሲዲ ሹቻራ ጫዲ ዋዳ» ጊዳሰ።

36 ሄሳ ጊሻሰ ኩሜላ ማባራይ ባንቲ ዲዛ ጉታፔ ሃራሶ ኤፊዲ ጎዳይ ኣዛዚዳ ማላ ሹቻራ ኩራኪ ዋዳዳሰ።

ማይኦ ማጫራ ጊሻሰ ኢሜቲዳ ዋጋ

37 ጎዳይ ሙሴሰ ሂዝጊዳሰ፥

38 «ኔኒ ኢሰራኤል አሳሰ፥ ለኒፔ ማይኢዛ ማይኦሰ ማጫራ ኬሲፔ፤ ኢሲ ኢሲ ማጫራይ ሳሎ ሚሳቲዛ ጸላታፔ ጊዳ፤ ሄሳካ ኢንቴ ቡሮፔ ያና ዬሌታ ኡባንካ አጎፍቴ።

39 ሄ ማጫራታ ኢንቴ ቤኢዛ ዋዳ ኡባን ታ ኣዛዞታ ሃሳኢ ኤኪዲ ፖሊቴ፤ ሂሰቲኮ ኢንቴ ኢንቴ ኣይፌን ቤኢዳይሳኔ ኢንቴ ዋዚናን ኣሞቲዳይሳ ካሊዲ ታፔ ሻኬቲኬታ።

40 ማይኦታ ጸራን ዲዛ ማጫራታ ኢንቴ ቤኢዛ ዋዳ ታ ኣዛዞታ ኡባ ፖላና ማላ ኢሰቲ ኢንቴና ቆፍሳና፤ ኢንቴካ ሙሌራ ታሰ ሃሬቲዳይታ ጊዳና።

41 ታኒ ኢንቴ ጎዳ፤ ኢንቴሰ ጎዳ ጊዳናሰ ኢንቴና ጊብጾፔ ኬሲዳ ጸሳይ ታና ኃ ዮታ።»

16

ሙሴ ቦላ ዳንዲዳ አሳታ

1 ለዌ ዛርኬ ቃኣቲ ባጋፌ ዪጸሃሬ ና ቆሬይ፥ ኦሮቤሌ ዛርኬ ኤልያቤ ናይቲ ዳታኔይኔ ኣብራሚይ ቃሴካ ፓሊቲ ና ኦናይ ሜቶ ሚዲዳ።

2 ኢስራኤል አሳ ጋርሳን ኤሬቲዳ ዴሬዛ ካሌፋናስ ዶሬቲዳ 250 አሳታ ባንታ ቦላ ኤኪዲ ሙሴ ቦላ ዴንዲዳ።

3 ኢስቲካ ሙሴ ሲንፋኒኔ ኣሮኔ ሲንፋን ሸቂዲ ኢስታስ፥ «ኢንቴ ሙሌካ ዋጋፔ ኣጰዴታ! ሃይሲ ዴሬዚ ኡባይ ጎዳስ ዲማቲዳ ዴሬ፤ ጎዳይካ ኢስታራ ዴስ፤ ሂስቲን ኢንቴ ጎዳ ዴራ ቦላ ኣዛስ ኢንቴና ጶቁ ጶቁ ሂስቴቲ?» ጊዳ።

4 ሙሴይካ ሄሳ ሲዪዳ ማላ ጉፋኒዲ ዋሲዴስ።

5 ቆሬሲኔ ኢዛ ካሊዛይታስ፥ «ዋንቶ ማላዶ ጎዳይ ኢዛስ ዲማቲዳይቲ ኦናንታኮ ኢዚ ሻኪ ኑና ቤሳና፤ ሄሲካ ባስ ጊዲዛይታኔ ባ ዶሪዳይታ ባስ ኦፋና ማላ ባኮ ሺሺ ኤካና።

6 ዋንቶ ማላዶ ኔኒኔ ኔናራ ኢሲፌ ኦፊዛይቲ ወሪካ ኢንቴ ኢዛን ኤጳኔ ጨዋሲዛ ጲናዛ ኤኪ ዪቴ።

7 ኢስታ ቦላ ቦንቆ ታማኔ ኤጳኔ ዋሊዲ ጌዴ ያርሾ ኢዛ ቦላ ያርሺዛሶ ሺሺቴ፤ ሄሳፌ ጉዬ ጎዳይ ኑፔ ኦና ባስ ዶሪዳኮ ኑ ቤያና፤ ኢንቴ ለዌ ናይቲ ኬሂ ሞሪዴታ!» ጊዴስ።

8 ቃሴካ ሙሴይ ቆሬስ፥ «ኢንቴ ለዌቲ ዋዚናን ዋሊ ሲዪቴ!

9 ኢንቴ ጌዴ ኢዛኮ ሸቂዲ ጋይቶቴላ ዲንካኔ ጊዶን ኢንቴ ኢንቴ ኦሶ ፖላና ማላኔ ኢንቴ ኢስራኤል አሳ ሲንፋን ኤቂዲ ኢስታስ ኦፋና ማላ ኢስራኤል ጎዳይ ኢንቴና ሃንኮ ኢስራኤል አሳ ጋርሳፌ ሻኪ ዲማሲዳይሳ ኢንቴ ጮ ሜላ ላፋ ኣይፌን ዴሌቲ!

10 ኢዚ ኢንቴናኔ ሃንኮ ለዌ ዛርኬታ ባኮ ሺሺዴስ፤ ኢንቴ ጊዲኮ ቄሴቴላ ኤካናስ ቃቃቴታ፤

11 ሄሳ ጊሻስ ኔኒኔ ኔናራ ዙፔቲዛይቲ ወሪካ ጎዳ ቦላ ዴንዲዴታ፤ ኢንቴ ኣሮኔ ቦላ ዙዙሜታናስ ኢዚ ኦኔ?» ጊዴስ።

12 ሄሳፌ ጉዬ ሙሴይ ኤልያቤ ናይታ ዳታኔኔ ኣብራሜ ዴይጊሲዴስ፤ ኢስቲ ጊዲኮ፥ «ኑ ቦኮ!

13 ኑኒ ባዞን ሃይቃና ማላ ኔ ኑና ኤሲኔ ማሊ ኩሚዳ ቢታፌ ኬሲዳይሲ ኔስ ጉጺን ሃኢ ቃሴ ኑ ቦላ ሃላቃ ጊዳናስ ኮያይ?

14 ኔኒ ኑና ሎኑ ካል ኢሚዛ ጎሻ ጋዴ ኤሆንታይሲ ዋይኮ ኣታኪልቴራ ዲዛሶ ላቲሶንታይሲ ኤሬቲዳዛ፤ ሃኢ ቃሴ ኔ ኑና ባሌፋናስ ኮያሳ፤ ሄሳ ጊሻስ ሃኢ ኑ ኔኮ ቦኮ!» ጊዳ።

15 ሙሴይካ ዳር ሃንቁቲዲ ጎዳስ፥ «ሃይቲ ኣሳቲ ኔስ ሺሺዛ ያርሾዛ ኔ ኤኮፋ፤ ታኒ ጊዲኮ ኢስታፌ ኢሳዴካ ቆሃቤኬ፤ ሃራይ ኣቶሺን ኢሲ ሃሪካ ኢስታፌ ኤካቤኬ» ጊዴስ።

16 ሙሴይ ቆሬስ፥ «ኔኒኔ ኔናራ ኢሲፌ ዲዛ 250 አሳይ ኣሮኔይ ዲዛሶ ጋይቶቴላ ዲንካኔኮ ዪቴ።

17 እንትፌ አሳዳይ አሳዳይ አንቲ አንቲ ጸና ኮይኪ ዪቲ፤ ጸናዛ ጊዶን ኤጳኔ ጉጂቲ፤ 250 ጸናታራ አንቲ አንቲ ኤጳኔዛ ጎዳ ሲንፋን ሺሻንዳታ፤ ኔኒኔ ኣሮኔይካ አንቲ አንቲ ኤጳኔ ኤጳኔ ሺሺቲ» ጊዳሰ።

18 ሄሳ ጊሻሰ ኢሰቲ ወሪካ ኢሶይ ኢሶይ ባ ጸናን ጸናን ኤጳኔ ጉጂ ኤኪዲ ጋይቶቲፋ ዱንካኔ ፔንጌን ሙሴራኔ ኣሮኔራ ኢሲፌ ኤቂዳ።

19 ሄሳፌ ጉዬ ቆሬይ ኢሰታራ ኤቂቲዲ ባናራ ዙፔቲዛይታ ጋይቶቲፋ ዱንካኔዛ ፔንጌ ሺሺዳ ዎዴ ጎዳ ቦንቾይ ኩሜፋ ዴራሰ ቆንጪዳሰ።

20 ጎዳይካ ሙሴሲኔ ኣሮኔሰ ሂዝጊዳሰ።

21 «ሃይሳ ዴራ ኣቻፌ ሃኪ ኤቂቲ፤ ታኒ ኢሰታ ኢሲቶ ኡባ ጳይሳና።»

22 ሙሴይኔ ኣሮኔይ ሲንፋ ጉሉ ጉፋኒዲ፡ «ሸምፖራ ዲዛ ሜዲታ ኡባሰ ጎዳ ጊዲዳ ጸሶ! ኢሲ ኣሲ ኦሊዳ ናጋራ ጌዶን ኔኒ ኩሜፋ ዴራ ጳይሳና ጋይ?» ጊዲ ጸሳኮ ዋሲዳ።

23-24 ጎዳይ ሙሴሰ፡ «ቆሬ ዱንካናፔ፡ ዳታኔ ዱንካናፔኔ ኣብራሜ ዱንካናፔ ሃኪ ኤቃና ማላ ኔኒ ዴራሰ ኮታ» ጊዳሰ።

25 ሄሳፌ ጉዬ ሙሴይ ኢሰራኤሌ ኣሳ ካሌሊዛይታ ካሌሊ ኤኪዲ ዳታኔኮኔ ኣብራሜኮ ቢዳሰ።

26 ዴሬዛሰካ፡ «አንቲ ሃይታ ማካላ ኣሳታ ዱንካኔታፔ ሃኪ ኤቂቲ፤ ኢሰታ ሚሽ ጊዲዳዝ ኣይኮካ ቦቾፍቲ፤ ሂሰቶንታ ኣጊኮ ኢሰታ ናጋራ ጋሶን አንቲ ወሪካ ኢሰታራ ኢሲፌ ፒቲቲ ጳያና» ጊዳሰ።

27 ሄሳ ጊሻሰ ዴሬዚ ቆሬ ዱንካኔዛፔ፤ ዳታኔ ዱንካኔዛፔኔ ኣብራሜ ዱንካኔዛፔ ሃኪ ኤቂዳሰ። ዳታኔይኔ ኣብራሜይካ ባ ማቼታራኔ ባ ናይታራ ባ ዱንካኔዛፔ ካሬ ኬዚዲ ባ ፔንጌን ፔንጌን ኤቂዳ።

28 ሄ ዎዴ ሙሴይ ዴራሰ፡ «ሃይሳ ሃ ኦሶዛ ኦፋናሰ ጎዳይ ታና ኪቲዳይሳኔ ታኒካ ሃይሳ ኦሊዛይ ታ ሼኔን ጊዶንታይሳ አንቲ ሃይሳን ኤራና።

29 ሃይቲ ሃ ኣሳቲ ኣሲ ሃይቂዛ ማላ ሃይቂዛ ጊዲኮ ጎዳይ ታና ኪቲቤና።

30 ጊዶ አቲን ኣሲ ሃይሳን ሲዪ ኤሮንታ ኦራፋ ሚሽ ጎዳይ ኢሰታ ቦላ ኦሊን ኢሰቲ ሸምፖራ ፓጳ ዲሼ ዱጌ ሃይቂዳይቲ ዲዛሶ ዎታና ማላ ቢታያ ዶዬታዳ ኢሰታኔ ኢሰታሰ ዲዛዝ ኡባ

ሚቲኮ ሃይቲ አሳቲ ጎዳራ ኤቄቲዳይሳ ኢንቴ ሄ ዋዴ ኤራና»
ጊዴሰ።

³¹ ሙሴይ ሄሳ የቲዳ ማላ ዳታኔይኔ ኣብሮኔይ ኤቄ ዲዛ
ቢታያ ደዩታዳ።

³² ኢሰታኔ ኢሰታ ሶ አሳ፣ ቆሬ፣ ኢዛራ ዙፔቲዛ አሳኔ ኢሰታሰ
ዲዛዝ ኡባ ሚታዲሰ።

³³ ሂሰቲን ኢሰቲ ሸምፖራ ፓጸ ዲሼ ባሰ ዲዛ ሚሻራ ዲጌ
ዲፎን ጌሊዳ፤ ቢታያ ኢሰታ ካማዳ ዴራ ጊደፌ ቆይሳዲሰ።

³⁴ ሄ ሄራን ዲዛ ኢሰራኤሌ አሳይ ሄ አሳ ዋሶ ሲዩዲ፣ «ሃይሲ
ቢታይ ኦናካ ሚቶንታ ኣጌና!» ጊ ዋሲሼ ባቃቲዴሰ።

³⁵ ቃሴካ ጎዳይ ሳሎፔ ታማ ዬዲዲ ኤጻኔ ጨዋሲዛ 250
አሳ ጸጊዴሰ።

³⁶ ሂሳፌ ጉዬ ጎዳይ ሙሴስ ሂዝጊዴሰ።

³⁷ «ኣሮኔ ና ኤልኤዜሬይ ጸርቂማላፔ ቆጶቲዳ ጸናቲ ዲማ
ጊዲዳ ጊሻሰ ጸጌቲዛ አሳታ ማታፔ ኢሰታ ጊደን ዲዛ ቦንቆ
ታማዛ ሃሆሶ ኤፌ ቆላና ማላ ኢዛሰ የታ፤

³⁸ ሄ ጸናቲ ጎዳሰ ያርሾ ያርሺዛሶዛ ሸቂዳ ዋዴ ጌዩዳ፤ ሄሳ
ጊሻሰ ባ ናጋራ ጋሶን ሃይቂዳ አሳታ ጸና ኤካዳ ለኢሳ ቆጶ፤
ሂሰታዳ ያርሾ ያርሺዛሶዛ ካማ ኦላ፤ ሄይቲካ ኢሰራኤሌ አሳይ
ናጌታና ማላ ኢሰታሰ ሴራ ማላታ ጊዳና።»

³⁹ ሄሳ ጊሻሰ ኤልኤዜሬይ ጸናታ ኤኪዲ ያርሾ ያርሺዛሶዛሰ
ካማ ጊዳና ማላ ሌኤን ቆጶ ኬሲዴሰ።

⁴⁰ ሄሲ ሄ ሃኖዚ ኦኒካ ኣሮኔ ዜሬል ጊደንታ ኣሲ ጎዳሰ
ኤጻኔ ጨዋሳናሰ ያርሾ ያርሺዛሶዛ ሸቆንታ ማላ ኢሰራኤሌ አሳይ
ኡባይ ናጌታና ማላ ቆፍሲዛ ማላታ ጊዳና፤ ሄሳሶ ጊደንታ ኣጊኮ
ሄሳ ማላ ኦሊዛ ኣሲ ኡባይካ ቆሬ ማላኔ ኢዛራ ዙፔቲዳይታ ማላ
ቆያና፤ ሃይሲ ዉሪካ ካሴ ጎዳይ ሙሴ ባጋራ ኢሚዳ ኣዛዞዛ ማላ
ፖሌቲዴሰ።

ኣሮኔይ ዴራ ቦሻፔ ኣሺዳ ኣሾ

⁴¹ ዋንቴላ ጋላሰ ኩሜላ ኢሰራኤሌ ማባራይ፣ «ጎዳ ዴራ ኢንቴ
ዋዲዴታ» ጊዲ ሙሴ ቦላኔ ኣሮኔ ቦላ ጉጉሚዴሰ።

⁴² ዴሬይ ሙሴራኔ ኣሮኔራ ኤቄታናሰ ኢሲ ቦላ ሸቄቲዳ ዋዴ
ጋይቶቴላ ዲንካኔዛ ሻራይ ካሚ ኦይኪን ጎዳ ቦንቾይ ኢዛን
ቆንጨዳይሳ ጉዬ ሲሚ ቤኢደሰ።

⁴³ ሙሴይኔ ኣሮኔይ ዬዲ ጋይቶቴላ ዲንካናሰ ሲንላ ባጋራ
ኤቂዳ።

⁴⁴ ጎዳይ ሙሴስ ሂዝጊዴሰ።

45 «ሃይታ ሃ አሳታፔ ፖቂ ኤቂቲ፤ ታኒ ኢሰታ ኢሲቶ ዲፒ ሂሰታ ጳይሳና!» ናምኣቲካ ዲጌ ቢታ ቦላ ጉፋኒዳ።

46 ሙሴይ ኣሮኔስ፡ «ኔኒ ኔ ጸና ኤካዳ ያርሾ ያርሺዛሶዛፔ ቦንቆ ታማ ኢዛ ቦላ ጉጃ፤ ሄ ታማ ቦላ ኤጸኔ ዋላ፤ ሄሳፌ ጉዬ ኤሶን ዴራኮ ባዳ አሳ ናጋራ ዉርሳ! ሄኮ ጸሳ ሃንቆይ ቆንጨዳ ጊሻሰ ዴሬዛ ጊዶን ቦሻይ ዶሚዴስ» ጊዴስ።

47 ሄሳ ጊሻሰ ኣሮኔይ ሙሴይ ኣዛዚዳ ማላ ባ ጸና ኤከዲ ሸቂቲ ዲዛ አሳ ጊዶ ኤሶን ቢዴስ፤ ቦሻይ ዴራ ጊዶን ዶሚዳይሳ ቤኢዲ ኤጸኔዛ ቦንቆ ታማ ቦላ ዋሊዲ አሳ ናጋራ ዉርሲዴስ።

48 ኣሮኔይ ፓጻ ዲዛ አሳሲኔ ሃይቂዳ አሳሰ ጊዶን ኤቂዲ ዴራ ቦላ ዪዛ ቦሻ ቲቂዴስ።

49 ሄ ዋዴ ሃይቂዳ አሳ ቆዳይ ቆሬራ ኢሲፌ ጌላቴላን ሃይቂዳይቲ ኣቲን 14,700።

50 ቦሻዚ ኤቂን ኣሮኔይ ጋይቶቴላ ዲንካኔዛ ፔንጌን ዲዛ ሙሴኮ ሲሚ ቢዴስ።

17

ኣሮኔ ጉፌ ፑርጫስ

1 ጎዳይ ሙሴስ ሂዘጊዴስ፡

2 «ኢሰራኤሌ አሳፔ ዛርኬፌ ዛርኬፌ ኮራፒኔይ ኢሲ ኢሲ ጉፌ ሺሺዲ ታማኔ ናምኡ ጉፌ ኢማና ማላ ኦይቻ፤ ሂሰታዳ ኢሳ ኢሳ ሱንላ ሄ ጉፌታ ቦላ ጸፋ።

3 ሌዌ ዛርኬታፔ ሺቂዳ ጉፌታ ቦላ ኣሮኔ ሱንላ ጸፋ፤ ኢሲ ኢሲ ዛርኬ ካሌሊዛዴስ ኢሲ ጉፌይ ሸቆ።

4 ሄይታካ ጌዴ ጋይቶቴላ ዲንካኔዛን ኤፋዳ ታ ኔና ሃሳይሲዛሶን ታቦታዛፔ ሲንላ ባጋራ ዋላ።

5 ሄሳፌ ጉዬ ታኒ ዶሪዛዴ ጉፌይ ፑርጫዲ ጨሊላና፤ ሄሳን ኢሰራኤሌ አሳይ ኡባ ዋዴ ኔ ቦላ ዙዙዋንታ ማላ ታ ዲጋና።»

6 ሄሳ ጊሻሰ ሙሴይ ሄሳ ኢሰራኤሌ አሳሰ ዮቲዴስ፤ ዴሬዛ ካሊዛይቲ ኢሶይ ኢሶይ ባ ጉፌ ጉፌ ኤከዲ ኢዛሰ ኢሚዴስ፤ ኢሲ ዛርኬ ጊሻሰ ኢሲ ኢሲ ጉፌ ጊዲሺን ኡባይ ኢሲ ቦላ 12 ጉፌይ ሸቂዴስ፤ ሄ ሸቂዳ ጉፌታ ጊዶን ኣሮኔ ጉፌይ ዴስ።

7 ሙሴይ ጉፌታ ኡባ ኤከዲ ጋይቶቴላ ዲንካኔዛ ጊዶን ጎዳ ጫቆ ቃላ ታቦታዛ ሲንላን ዋሊዴስ።

8 ዋንቴላ ጋላስ ሙሴይ ጌዳ ጋይቶቴላ ዱንካኔዛን ጌሊሺን ሌዌ ቆሞ ሱንፋን ሸቂዳ አርኔ ጉፌያ ጨሊሊዳር ቤኢዳስ፤ ቃሴካ ጨያዳ ካጺዳ ኦቾሎኔ አይፌ አይፊዳር ቤኢዳስ።

9 ሙሴይካ ጉፌታ ኡባካ ኤኪ ኤፊዲ ኢሰራኤሌ አሳ ቤሲዳስ፤ አሳይካ ሄሳ ኡባ ቤኢዲ ኢሲ ኢሲ ጐራፒኔቲ ባ ጉፌ ጉፌ ኤኪዳ።

10 ጎዳይ ሙሴስ፡ «አርኔ ጉፌዛ ዛራዳ ጫቆ ቃላ ታቦታፔ ሱንፋ ባጋራ ዋላ፤ ማካሊዛ ኢሰራኤሌ አሳይ ታ ቦላ ዙዙሚዛይሳ አጎንታ ኢጸኮ ኢሰቲ ሃይቃናይሳ ቤሲዛ ማላታ ጌዲ ኡቶ» ጌዳስ።

11 ሙሴይካ ጎዳይ ኢዛ አዛዚዳ ማላ ኦሊዳስ።

12 ኢሰራኤሌ አሳይ ሙሴስ፡ «ሃይሳ ማላ ጌዲኮ ኑኒ ዉሪካ ዉራናስ ዶስ!

13 ጋይቶቴላ ዱንካኔዛኮ ሸቂዳ አሲ ኡባይ ሃይቂዛ ጌዲኮ ኑኒካ ዉሪ ሃይቃናስ ዶስ ጉሴ?» ጌዳስ።

18

ቄሴታ ኦሶኔ ሌዌ ኦሶ

1 ጎዳይ አርኔስ፡ «ጋይቶቴላ ዱንካኔዛ ጌደን ኦሴቲዛ ሞሮ ኡባ ጊሻስ ኔኒኔ ኔ ናይቲ፡ ሌዌ ቆሞቲ አላፌቲላ ኤኪዳታ፤ ቄሴቲላ ኦሶን ፖሌቲዛ ሞሮ ጊሻስ ጌዲኮ ሄሳ አላፌቲላ ኤካናይ ኔናኔ ኔ ናይታ ጸላ።

2 ኔኒኔ ኔ ናይቲ ጋይቶቴላ ዱንካኔዛን ኦሊዛ ዋዴ ኢንቴና ኦሶን ማዳናስ ሌዌ ቆሞ ጌዲዳ ኔ ባጋታ ኤካ።

3 ኢሰቲ ኔ አላፌቲላ ጋርሳን ዲሼ ጋይቶቴላ ዱንካኔዛ ኦሶ ኦሊቶ፤ ጌደ ኦቲን ጌሻሶዛን ጎኤቲዛ ሚሻታኮ ያርሾ ያርሺዛሶ ሸቆፔቶ፤ ሄ ሸቂዛ ጌዲኮ ኔኒኔ ኢሰቲካ ኢሲ ቦላ ሃይቃና።

4 ኢሰቲ ኡባ ዋዴ ኢንቴናራ ኢሲፌ ኦሶኔ ጋይቶቴላ ዱንካኔዛ ጌደን ኢሰታስ ኢሜቲዳ ኦሶ ኡባ ባ አላፌቲላን ፖላናስ ቤሴስ፤ ጌደ ኦቲን ሌዌ ቆሞ ጌደንታ አይ አሲካ ኦላናስ ኢንቴኮ ሸቆፖ።

5 «ታ ሃንቆይ ቃሴካ ኢሰራኤሌ አሳ ቦላ ቆንጮንታ ማላ ጌሻሶዛኒኔ ያርሾ ያርሺዛሶዛን ኦሴቲዛ ኦሶዛ አላፌቲላ ፖላናይቲ ኢንቴናኔ ኢንቴ ናይታ ጸላ።

6 ኢንቴ ባጋ ጌዲዳ ሌዌ ዛርኬታ ኢሰራኤሌ አሳ ጋርሳፌ ኢንቴስ ዶሪዳ ኢሞታ ሂሰታ ኢሚዳይ ታና፤ ኢሰቲካ ጋይቶቴላ ዱንካኔዛ ጌደን ባስ ኢሜቲዳ ኦሶ ኦላና ማላ ታስ ዱማቲዳይታ።

7 ጊደ ኣቲን ያርሾ ያርሺዛሶዛኒኒ ማጋላሻፔ ጉዬ ባጋራ ኡባፌ ዲማቲዳ ጊደ ቆልኣን ኦሴቲዛ ቄሴቴላ ኦሶይ ኔሲኔ ኔ ናይታሰ ጸላ ቤሴሰ፤ ቄሴቴላ ኦሶዛካ ታ ኢንቴሰ ኢሞታ ሂሰታ ኢማዲሰ፤ ቄሴ ጊደንታ ኣይ ኣሲካ ሄ ሺቂኮ ሃይቃና» ጊደሰ።

ቄሴታሲኔ ለዌታሰ ኢሜቲዛ ጊሻ

8 ሃይሳፌ ጉዬ ጎዳይ ኣሮኔሰ፡ «ጹጌቶንታ ጮ ማላ ታሰ ሸቂዛ ያርሾ ኡባ ታ ኔሰ ኢሚዳይሳ ዩሻ ቆፓ፤ ሄሲካ ኔሲኔ ኔ ዛሬ ኡባሰ ጊሻ ጊዳና ማላ ታኒ ኢማዲሰ።

9 ታሰ ዳሮ ዲማቲ ሸቂዛ ኢሞታታፔ ታማን ጹጌቶንታ ያርሾይ ኔሲኔ ኔ ናይታሰ ጊሻ ጊዳና፤ ሄሲካ ካላ ያርሾ ኡባይ፡ ናጋራ ጊሻሰ ዋይኮ ቆሆ ጊሻሰ ሸቂዛ ያርሾ ኡባይ ኔሲኔ ኔ ናይታሰ ጊሻ ጊደ።

10 ኢንቴ ሄሳ ጌሻሶዛን ዲሼ ሚቴ፤ ሄሳካ ኣቴማሳይ ኡባይ ዋ፤ ኢዚካ ኬሂ ዲማቲዳዛ።

11 «ቃሴካ ኢሰራኤሌ ኣሳይ ታ ሲንላን ያኔ ሃ ቃሴሊ ያርሺዛ ያርሾይ ኡባይ ኢንቴሰ ጊደ፤ ሃይታንታ ታኒ ኔሰ፡ ኔ ማጫ ናይታሰ፡ ኔ ኣቴማ ናይታሲኔ ሲንላፌ ያና ዬሌታ ኡባሰ ኤቂ ዳና ማላ ኢንቴሰ ጊሻ ሂሰታ ኢማዲሰ፤ ኔሶ ኣሳፔ ጌሽ ጊዲዳይ ኦኒካ ማናሰ ዳንዳዬሰ።

12 «ኢሰራኤሌ ኣሳይ ታሰ ኢሚዛ ኦራላ ጋኪዛ ካላ ጸራፔ ዋጋራ ዛይቴ፡ ዋይኔ ኡሺኔ ካላ ቆሞ ኡባፌ ጸራ ታ ኢንቴሰ ኢማዲሰ።

13 ኢሰቲ ባ ጋዴፔ ታሰ ጎዳሰ ኢሚዛ ካላ ጸራይ ኢንቴሳ፤ ሄሳ ኢንቴሶ ኣሳን ጌሽ ጊዲዳ ኣሲ ኦኒካ ማናሰ ዳንዳዬሰ።

14 «ኢሰራኤሌ ኣሳፔ ታሰ ኢሜቲዳ ሚሺ ኡባይ ኢንቴሳ።

15 ኢሰራኤሌ ኣሳይ ታሰ ሺሺዛ ሜሄፔ ዋይኮ ኣሳፔ ባይራ ጊዲ ዬሌቲዳይ ኢንቴሳ፤ ጊደ ኣቲን ኣሳፔ ባይራ ጊዲ ዬሌቲዳይሳ ጊዲኮ ኢሰታ ሚሻን ዋዛና ቤሴሰ፤ ሄሳሶካ ጌሽ ጊደንታ ሜሄታፔ ኮይሮ ዬሌቲዳይሳ ሚሻን ዋዛናሰ ዳንዳዬታ።

16 ኢሲ ኣገና ናይታ ዋዛናሰ ጌሻሶዛን ኤሬቲዳ ሜዛኔ ሊኬን ኢቻሹ ሳቂሌ ቢራ ዋዛ ሚሽ ጨጊዲ ዋዛናሰ ዳንዳዬቲሰ።

17 «ሚዛፔ ዋይኮ ዶርሳፌ ዋይኮ ዳይሻፌ ባይራ ጊዲ ዬሌቲዳይሳ ዋዛፍቴ፤ ሄይቲ ሙሌካ ጌሽ ጊዲዳ ጊሻሰ ታሰ

ያርሾ ጊዲ ሺቃናስ ቤሴስ፤ ኢስታ ሱፋ ያርሾ ያርሺዛሶዛ ቦላ አራጪቱ፤ * ሃንዳዛካ ታና ሎኦ ሳዋ ሳዋና ማላ ታማን ጸጊቱ።

18 ያኔ ሃ ቃሴሊ ሺሺዛ ያርሾ ጊዲዲ ሺቁዛ አንጋሶ ማላኔ ኡሻቻ ሚሴ ማላ ኢስታ አሾዚ ኔስ ጊድ።

19 ኢስራኤል አሳይ ታስ ሺሺዛ ዱማ ዱማ ኢሞታታ ወርሳካ ታ አንቲስ፤ አንቲ አቱማ ናይታሲኔ አንቲ ማጫ ናይታስ ቡሮ ሲንፋፌ ያና ዋዴታን ኡባን ዋጋ ጊዲዲ አንቲስ ገሻ ጊዳና ማላ ታ አንቲስ ኢማዲስ፤ ሄሲካ ታኒ አንቲናራኔ አንቲ ዜሬፋታራ ጫቂቲዛ ላሜቶንታ ማጺኔ ጫቆ † ማላ» ጊዴስ።

20 ጎዳይ አሮኔስ፡ «ኔኒ ኔ ዜሬፋስ ላቲሳናስ ላታ ጋዴይ ኔስ ኢማቲና፤ ኢስታ ጊዶን ኔና ጋኪዛ ገሻይ አይኮይካ ዳና፤ ኔና ጋኪዛ ላታይ ታና ጸሳ» ጊዴስ።

21 ጎዳይ፡ «ኢስራኤል አሳይ ታስ ኤሂዛ አስራታይ ወሪ ለዌ ዛርኬታስ ገሻ ጊዶ ጋዳ ታ ኢማዲስ፤ ሄሲካ ኢስቲ ጋይቶቲፋ ዱንካኔ ጊዶን ኦሊዛ ኦሶዛ ዳሞዛ ጊድ።

22 ሃንኮ ኢስራኤል አሳይ ጊዲኮ ባ ቦላ ሃይቆ ቂጻቲ ጋሶንታ ማላ ናሞአንፋ ጌዴ ጋይቶቲፋ ዱንካኔዛኮ ሺቃናስ ቤሴና።

23 ሃይሳፌ ጉዬ ጋይቶቲፋ ዱንካኔዛ ጊዶን አላፌቲፋ ኤኪ ኦፋናስ ቤሲዛይ ለዌ ዛርኬታ ጸላ ጊዳና፤ ሄን ኦሴቲዛ ሞሮሰካ ኢስቲ ኦይሼታና፤ ሄሲካ ኢስታስ ና ና ጋካናስ ላሜቶንታ ዋጋ ጊዳና፤ ለዌታስ ጸንጾይ ‡ ኢስራኤል ዴሬን ዳና።

24 ኢስራኤል አሳይ ታስ ዱማ ያርሾ ኤሂዛ አስራታ ታኒ ኢስታስ ገሻ ሂስታ ኢማዲስ፤ ሄሳ ገሻስ ኢስታስ ኢስራኤል አሳ ጊዶን ጸንጾይ ዶንታ ማላ ዮታዲስ» ጊዴስ።

ሌዌታ አስራታ

25 ጎዳይ ሙሴስ ሂዝጊዴስ፡

26 «ኔኒ ሌዌታስ፡ ሳዳይ አንቲስ ገሻ ሂስቲ ኢማዛ አስራታ አንቲ ኢስራኤል አሳ ኩሼፔ ኤኪሼ አንቲካ አንቲ ባጋራ ሄ አንቲ ኤኪዳይሳፌ አስራታ ኬሲዲ ጎዳስ ዱማ ያርሾ ሂስቲ ሺሺቲ።

27 ሄሲ ሄ ዱማ ያርሾዚ ኢሲ ጎሻንቻይ ካፋ ጸራ ዋይኮ ዋይኔ ኡሹ አስራታ ኢማዛ ማላ ጊዲ አንቲስ ቆዴታና።

* 18:17 አራጪቱ፡ አራጪቲ ጊዛይሳ ኢሲ ኢሲ ባጋ ጋሞፋ ቃላን ፒስቶ ጌቲቲስ።

† 18:19 ማጺኔ ጫቆ፡ ማጺኔ ጫቆይ ኢስራኤል ቢታን ዲዛ ላሜቶንታ ጫቆታፔ ኢሳ ጊዲሺን ኑ ቃላን ሱፋ ጫቆ ጊዛይሳ ማላ ዋይኮ ሜርናስ ላሜቶንታ ጫቆ ማላ።

‡ 18:21 ለዌ 27:30-33፤ ዛሪ 14:22-29 ‡ 18:23 ጸንጾ፡ ጸንጾ ጉሲ ቡዙ ጋዴ ጉሳ።

28 ሄሳ ማላን አንቴካ ኢሰራኤል አሳፔ ኤኪዛ አሰራታ ኡባፌ ጎዳሰ ዱማ ያርሾ ሂሰቲ ሺሺቴ፤ አንቴ ጎዳሰ ሺሺዛ ያርሾዛ ቄሴ አሮኔስ አሟቴ።

29 አንቴ ሃ ኤኪዛ ሚሽ ኡባፌ ዶሬቲዳይሳኔ ሎኦ ጊዲዳይሳ ጎዳሰ ገሻ ሂሰቲ አሟቴ።

30 « ሳሻንቻይ ካላ አይፊቴኔ ዋይኔ ኡሻፌ ዶሬቲዳይሳ ታስ አሟዲ አቲዳይሳ ባስ ኤኪዛ ማላ አንቴካ ዶሬቲዳይሳ ታስ አሟዲ አቲዳይሳ አንቴስ ኤኪቴ።

31 ሄሲካ አንቴ ጋይቶቴላ ዱንካኔ ጊዶን ኦሊዛ ኦሶዛሰ ዋጋ ጊዲዳ ገሻሰ አቲዳይሳ አንቴ አንቴሶ አሳራ አዋንካ ዲዲ ማናሰ ዳንዳዬታ።

32 ዶሬቲዳዝ አንቴ ጎዳሰ ሺሺዳፔ ጉዬ አቲዳይሳ አንቴ ሚኮ አንቴሰ ናጋራ ጊዳና፤ ጊዶ አቲን ዶሬቲዳይሳ አዛፔ ሻኮንታ ሚዲ ዱማ ጊዲዳ ኢሰራኤል አሳ አሞታ ቱኒሶንታ ማላ ናጌቲቴ፤ ቱኒሲዛ ጊዲኮ አንቴ ሃይቃና ጋ» ጊዳሰ።

19

ጌሾ ሃሌ

1 ጎዳይ ሙሴሲኔ አሮኔስ ሂዝጊዳሰ፡

2 «ሃይሲ ታ አዛዚዳይሲ ዋጋሰ ዲዛ ማራ፤ ኢሰራኤል አሳይ አዚ ዋርጌ ሶላ ቃምባራይ ዋጂ ኤሮንታ ሶሬይ ባይንዳ አሲ ዘኦ ሚዛ ኡስ ኢሰራኤል አሳይ ኤሃና ማላ አሳሰ ዮታ።

3 ሄ ኡሳዮ ቄሴ ኤልኤዜሬስ አሟቴ፤ ሄ ኡሳዮ አሲ ዲዛሶፔ ጌዴ ካሬ ኬሲኮ ሄን አዛ ሲንላን ሹኬቴ።

4 ቄሴ ኤልኤዜሬይ አዚ ሱላፌ ጉላራ ኤኪዲ ባ ቢራጼ ዬራን ላፑንቶ ጌዴ ጋይቶቴላ ዱንካኔዛሰ ሲንላ ባጋራ ፒሰቶ።

5 ሄ ኡሳይ ጋልባይ፡ አሾይ፡ ሱሊኔ ቃንላ አሾይ ዉሪ ቄሴዛ ሲንላን ጽጌቶ።

6 ቄሴዚ ሊባኖሴ ዚጋ፡ ሂሶጴኔ ዘኦ ቃጪና ኤኪዲ ኡሳያ ጸጌቲዛ ታማዛን ዬጋ።

7 ሄሳፌ ጉዬ ባ ማይኦ ሜጮ፤ ባ ሶላካ ሃሌን ሜጮቲዲ ካሴ ባ ዲዛሶ ሲሞ፤ ጊዶ አቲን ኦማርሰ ጋካናሰ ዋጋይ ጊዛ ማላ ቱና ጊዲ ጋምኦ።

8 ሄ ኡሳዮ ጸጊዲዳይካ ባ ማይኦ ሜጮ፤ ባ ሶላካ ሃላን ሜጮቶ፤ አዚካ ኦማርሰ ጋካናሰ ቱና ጊዲ ጋምኦ።

9 «ሄሳፌ ጉዬ ጌሽ ጊዲዳ ሃራ አሲ ሄ ቢዲንላ ሺሺ ኤፊዲ አሳይ ዲዛሶፔ ጌዴ ኬሲዲ ጌሻሶሆን ዋላ፤ ሄንካ ኢሰራኤል

አሳይ ማጠቃለያ ገጽና ስህተት ላይ ሆኖ ማረጋገጥ ይቻላል፡፡

10 ቢዲዮ ሲገለጽ ላይ ሆኖ ማረጋገጥ ይቻላል፡፡ ገጽ አቲን አዲስ አማርኛ ወጪ ገጽና ስህተት ላይ ሆኖ ማረጋገጥ ይቻላል፡፡

አሃ ሶፕ ገጽ

11 «ሃይቁዳ አሳ አሃ ሶፕ አሳ ላይ ሆኖ ማረጋገጥ ይቻላል፡፡

12 ሃይቁዳ ላይ ሆኖ ማረጋገጥ ይቻላል፡፡ ገጽ አቲን አዲስ አማርኛ ወጪ ገጽና ስህተት ላይ ሆኖ ማረጋገጥ ይቻላል፡፡

13 ገጽ አቲን አዲስ አማርኛ ወጪ ገጽና ስህተት ላይ ሆኖ ማረጋገጥ ይቻላል፡፡ ገጽ አቲን አዲስ አማርኛ ወጪ ገጽና ስህተት ላይ ሆኖ ማረጋገጥ ይቻላል፡፡

14 «አሳይ ማረጋገጥ ይቻላል፡፡ አዲስ አማርኛ ወጪ ገጽና ስህተት ላይ ሆኖ ማረጋገጥ ይቻላል፡፡

15 ሃይቁዳ ላይ ሆኖ ማረጋገጥ ይቻላል፡፡ ገጽ አቲን አዲስ አማርኛ ወጪ ገጽና ስህተት ላይ ሆኖ ማረጋገጥ ይቻላል፡፡

16 አሳ ማረጋገጥ ይቻላል፡፡ ገጽ አቲን አዲስ አማርኛ ወጪ ገጽና ስህተት ላይ ሆኖ ማረጋገጥ ይቻላል፡፡

17 «አሳይ ማረጋገጥ ይቻላል፡፡ አዲስ አማርኛ ወጪ ገጽና ስህተት ላይ ሆኖ ማረጋገጥ ይቻላል፡፡

18 አሳ ማረጋገጥ ይቻላል፡፡ ገጽ አቲን አዲስ አማርኛ ወጪ ገጽና ስህተት ላይ ሆኖ ማረጋገጥ ይቻላል፡፡

19 ሃይቁዳ ላይ ሆኖ ማረጋገጥ ይቻላል፡፡ ገጽ አቲን አዲስ አማርኛ ወጪ ገጽና ስህተት ላይ ሆኖ ማረጋገጥ ይቻላል፡፡

20 «ቱኒዳዳይኔ ባና ጌሾንታዳይ ጌሾ ሃላ ባ ቦላ ጉሶንታ ኣጊዳ ጊሻሰ ኢዚ ቱኒዳ ማላ ጋሞኦ፤ ሄሳ ማላ ኣሲ ጌሻሶዛ ቱኒሲዛ ጊሻሰ ማባራ ጊዳፌ ሻኬቲ ከቶ።

21 ሃይሳ ሃ ዋጋ ቡሮፔ ያና ዩሌታሰ ኢንቴ ናጋናሰ ቤሴሰ፤ ጌሾሰ ጎኢዛ ሃላ ባ ቦላ ኣራጨዛ ኣሲ ባ ማይኦዛካ ሜጫናሰ ቤሴሰ፤ ሄ ሃላ ቦቹዳዳይ ኦማርሰ ጋካናሰ ቱና ጊዳ ጋሞኦ።

22 ጌሶንታ ኣሲ ቦቹዳ ሚሺ ኡባይ ቱና ጊዳ፤ ሄ ቱና ሚሻ ቦቹዳ ኣሲካ ኦማርሰ ጋካናሰ ቱና ጊዳ።»

20

ዛለፌ ፑልቲዳ ሃላ (ኬሳ 17:1-7)

1 ኮይሮ ኣጊናን ኢሰራኤሌ ኣሳይ ኩሜላ ጸኔ ባዘን ቃዴሴ ጌቲቲዛሶን ዱንካኒ ኡቲዳሰ፤ ማራማ ሃይቂን ሄን ሞጊዳ።

2 ኣሳይ ዱንካኒ ኡቲዳሶሆን ሃላ ባይንዳ ጊሻሰ ሙሴ ቦላኔ ኣሮኔ ቦላ ዴንዲዳሰ።

3 ዴሬዚ፡ «ኑኒ ካሴ ጋይቶቲላ ዱንካኔ ሲንላን ሃይቂዳ ኢሰራኤሌ ኣሳ ማላ ኢሰታላ ኑኒካ ሃይቂዳኮ ኑሰ ሎኦ ጊዳናሺን፤

4 ኢንቴ ጎዳ ማባራ ሃይሳ ሃ ባዘ ቢታ ኤሂዳይ ኑኒኔ ኑ ሜሄይ ሃይሳን ዉራና ማላ ኦላናሴ?

5 ኢንቴ ኑና ጊብጾፔ ኬሲዲ ሃይሳ ኣይኮይ ሞኮንታ ኢታ ባዘ ኑና ኣዛሰ ኤሂዴቲ? ሃይሳን ካሊ፡ ባላሴይ፡ ዋይኔ ኣይፌይኔ ኦሮማኔይ ዴና፤ ሃራይ ኣቶሺን ጋንጺ ኤኪዛ ሃላካ ዴና!» ጊዳ ሙሴራ ኦዩቲዳ።

6 ሙሴይኔ ኣሮኔይ ኣሳፔ ሻኬቲዲ ጌዴ ጋይቶቲላ ዱንካኔ ፔንጌ ቢዳ፤ ኢሰቲ ዱጌ ቢታን ጉፋኒ ዲሺን ጎዳ ቦንቾይ ኢሰታሰ ቆንጨዳሰ።

7 ጎዳይ ሙሴሰ ሂዝጊዳሰ፡

8 «ጫቆ ቃላ ታቦታ ሲንላን ዲዛ ጉፊዛ ኤኪዳ ኔኒኔ ኣሮኔይ ኩሜላ ማባራ ኢሲ ቦላ ሺሺቲ፤ ኔኒ ሄን ኩሜላ ዴራ ሲንላን ዲዛ ዛለዚ ሃላ ኢማና ማላ ዮታ፤ ኔኒ ሄሳላ ኦላዳ ዛለዛፔ ኢሰታሰ ሃላ ኬሳ፤ ሂሰቲኮ ኢሰቲኔ ኢሰታ ሜሄይ ሃላ ኡዪዲ ኣላና።»

9 ሙሴይ ጎዳይ ኢዛ ኣዛዚዳ ማላ ቢዲ ጋይቶቲላ ዱንካኔዛፔ ባ ጉፊዛ ኤኪ ዪዳሰ።

10 ኢዚኔ ኣሮኔይ ኩሜላ ማባራ ዛላዛ ሲንላን ሺሺዳፔ ጉዬ ሙሴይ ዳሬዛ፡ «ኢንቴኖ ማካላንቻቶ! ሃይሳ ሃ ዛላዛፔ ኑ ኢንቴሰ ሃሉ ኬሳኔ!» ጊደሰ።

11 ሄሳፌ ጉዬ ሙሴይ ባ ጉፌዛን ዛላዛ ናምኣ ዛሪ ሾጪደሰ፤ ዋልቃማ ሃሊ ዛላፌ ፑልቲደሰ፤ ዳሬዚኔ ሜሄይ ሃላ ኡዪደሰ።

12 ጊደ ኣቲን ጎዳይ ሙሴ ቦላኔ ኣሮኔ ቦላ፡ «ኢንቴ ኢሰራኤሌ ኣሳ ሲንላን ታ ዲማቴላ ማላ ታና ቦንቻናሰ ኣማኔቲቤኬታ፤ ሄሳ ገሻሰ ታ ኢንቴና ላቲሳና ጋ ጫቂዳ ዳሬዛ ሃይሳ ዳራ ካሌሊዲ ጌሌኬታ» ጊ ሃንቄቲደሰ።

13 ኢሰራኤሌ ኣሳይ ጎዳራ ኦዩቲዳሶይኔ ኢዚ ባ ዲማቴላ ቆንጪሲዳሶይ ማሪባ ጌቴቲዳ ገሻሰ ሃላይካ ማሪባ ሃሉ ጌቴቲ ሱሚደሰ።

ኤደሜ ኣሳኔ ኢሰራኤሌ ኣሳ

14 ሙሴይ ኤደሜ ካዋሰ ኪታ ጋላና ማላ ቃሰታኔ ኣሰ ቃዴሴፔ ዩዲደሰ፤ «ኔ ኢሻ ኢሰራኤሌይ፡ ሉ ቦላ ጋኪዳ ሜቶዛ ኡባ ኔኒ ሲያዳሳ፤

15 ቤኒ ኑ ኣዋቲ ዋኒ ዲጌ ገብጾ ዋዲዳኮኔ ኮኒካ ገብጾን ዳሮ ላይላታ ዋኒ ዋኒ ዲዳኮ ኔ ኤራሳ፤ ገብጾ ኣሳይ ካሴ ኑ ኣዋታ ገዲን ኑናካ ዳሮ ዋዪሲደሰ።

16 ኮኒካ ኢዚ ኑና ማዳና ማላ ጎዳኮ ዋሲደሰ፤ ኢዚካ ኑ ዋሶዛ ሲዩዲ ገብጾፔ ኑና ኬሳናሰ ባ ኪታንቻ ኑሰ ኪቲደሰ፤ ሄኮ ኮኒ ሃኢ ኔሰ ጳሳን ዲዛ ቃዴሴን ደሰ።

17 ሄሳ ገሻሰ ኮኒ ኔ ቢታራ ኣጂ ባና ማላ ኑሰ ኤሮ ጋርኪ! ኑና ገዲን ኑ ሜሄይካ ኦጌፔ ካሬ ኬዞኮ፤ ካላ ጊደ ገዲን ዋይኮ ዋይኔ ሚላ ጊደ ኑ ጌሎኮ፤ ኔ ሃላ ኦላፌካ ኡዮኮ፤ ኔ ዳሬፔ ኣቆና ጋካናሰ ኦጌፔ ካሬ ኬዞኮ፤ ጌሰ» ጊ ኪቲደሰ።

18 ኤደሜ ኣሳይ ገዲኮ፡ «ኢንቴ ኑ ዳሬራ ኣጂ ባና ማላ ኮዮኮ፤ ኢንቴ ኑ ዳሬ ጌላናሰ ፓጪኮ ኑ ኢንቴ ቦላ ዋራጃና» ገዲ።

19 ኢሰራኤሌ ኣሳይካ፡ «ኮኒ ዋና ኦጌዛፔ ኬዞኮ፤ ኑና ገዲን ዋይኮ ኑ ሜሄይ ኢንቴ ሃላፌ ኡዩኮ ኑ ኢንቴሰ ኢዛ ዋጋ ቃንጸና፤ ኑ ዋና ኮይዛይ ኢንቴ ዳሬዛራ ኣጂ ባናሳ» ገዲ ኢሰታሰ ማልሉ ኢሚዳ።

20 ኤደሜ ኣሳይ ገዲኮ፡ «ሄሲ ሃኔና! ኑ ኢንቴና ኣሊ ዩዶኮ!» ገዲ ሚኖ ኦላንቻታ ኤኪዲ ኢሰራኤሌ ኣሳ ኦላናሰ ኬዚዳ።

21 ኤደሜ ዳሬ ኣሳይ ባ ቢታራ ኣሊ ዩዶንታይሳ ኤሪዲ ኢሰራኤሌ ኣሳይ ባ ቢዛ ኦጌዛ ላሚዲ ሃራሶራ ቢደሰ።

ኣርኔ ሃይቆ

22 ኩሜላ ኢሰራኤል ማባራይ ቃዴሴፔ ዳንዲ ሆሬ ዙማኮ ጋኪዴሰ።

23 ሄ ዙማዚ ኤዶሜ ቆሳን ዴሰ፤ ጎዳይ ሄን ሙሴሲኔ ኣርኔሰ።

24 «ታኒ ኢሰራኤል ኣሳሰ ኢማና ጋዳ ካሴ ጫቂዳ ዴሬዮ ኣርኔይ ጌሌና፤ ኢንቲ ወሪካ ማሪባ ሃላ ኣቻን ታ ኣዛዘዛ ቦላ ማካሊዳ ጊሻሰ ኣርኔይ ሃይቃና።

25 ኣርኔኔ ኢዛ ናዛ ኤልኤዘሬ ኔናራ ኤካዳ ፑዴ ሆሬ ዙማ ቦላ ኬዛ።

26 ኣርኔይ ቁሴቴላሰ ማይኢዳ ማይኦዛ ቃራ ኤካዳ ኤልኤዘሬ ማይዛ፤ ኣርኔይ ሄን ሃይቃና» ጊዴሰ።

27 ሙሴይካ ጎዳይ ኢዛሰ ጊዳይሳ ኡባካ ኦሊዴሰ፤ ኩሜላ ማባራይ ኢሰታ ጸሊሺን ኢሰቲ ፑዴ ሆሬ ዙማ ቦላ ኬዚዳ።

28 ሙሴይካ ኣርኔ ቁሴቴላ ማይኦዛ ቃሪ ኤኪዲ ኤልኤዘሬ ማይዚዴሰ፤ ኣርኔይ ሄን ዙማ ሁኤን ሃይቁዴሰ፤ ሙሴይኔ ኤልኤዘሬይ ዙማ ቦላፌ ዲጌ ሰሚ ዋቂዳ።

29 ኣርኔይ ሃይቁዳይሳ ኩሜላ ዴሬዚ ሲዬዲ 30 ጋላሰ ጋካናሰ ኢዛሰ ሚሼቲዲ ዩኪዴሰ።

21

ካናኔ ኣሳ ጸኔቴላ

1 ኢዛሰ ዲሳሶይ ኔጌቤ ጊዲዳ ካናኔ ዴሬ ካዋ ኣራዴይ ኢሰራኤል ኣሳይ ኣታራሜ ባጋራ ዩዛይሳ ሲዬዲ ኢሰታ ቦላ ኦላ ዴንሊዲ ኢሰታፌ ኣማርዳይታ ዲኢዴሰ።

2 ሄ ዋዴ ኢሰራኤል ኣሳይ፡ «ኦኒ ሃይሳ ዴሬዛ ጸናና ማላ ኔ ኦና ማዲኮ ኢሰታ ጊዲን ዋይኮ ኢሰታ ካታማታ ናሞኣንሶ ዴንዶንታ ማላ ኦሊዲ ኦ ኢሰታ ሙሌራ ዲፒ ሂሰታና» ጊዲ ጎዳሰ ኣዲኒዳ።

3 ጎዳይ ኢሰታ ዋሳ ሲዬዲ ማዲዳ ጊሻሰ ኢሰቲ ካናኔ ኣሳ ጸኒ ኦይኪዳ፤ ሄሳ ጊሻሰ ኢሰራኤል ኣሳይ ኢሰታኔ ኢሰታ ካታማ ሙሌራ ዲፒ ሂሰቲ ቆይሲዳ፤ ኢሰቲ ወሪ ወሪዳይሳ ኤራናሰ ሄሳ ሄ ጋዴዛ፡ «ሆርማ» ጊ ሱንሊዳ።*

ጸርቂማላፔ ኦሴቲዳ ሾሽ

20:28 ኬሳ 29:29፤ ታይ 33:38፤ ዛሬ 10:6 21:1 ታይ 33:40 * 21:3
ሆርማ ጉሲ ኢብራቂታ ቃላራ፡ «ጎሜ ዋይኮ ቃንጌላ ዋይኮ ቱና ሚሽ» ጉሳ።

4 ኢስራኤል አሳይ ኤደሜ ዴሪ ዩዩ አዲሲ ባናስ ቆፒዳ ሆሪ ዙማፔ ዴንዲዲ ጌዴ ዞኑ አባኮ ኤፊዛ ኦጌዛራ ቢዳ፤ ጌዶ አቲን ኢስቲ ቡሮ ኦጌን ዲሺን ዴሪዛፔ ዳንዳያይ ወሪዴስ።

5 ጎዳ ቦላኔ ሙሴ ቦላ ኢታ ቃላ ኬሲዲ፤ «ሃሊኔ ካሊ ባይንዳሶ ሃይሳ ባዞ ቢታን ኑ ሃይቃና ማላ ኑና ጊብጾፔ ኣይሰ ኬሲዴቲ? ሃይሲ ሃ ኢታ ካሳይ ኑና ሳሌሊዴስ» ጌዳ።

6 ሄሳፌ ጉዬ ጎዳይ ኢታ ማርዘራ ዲዛ ሾሽ ዴሪዛ ጌዶ ዬዲዴስ፤ ሄ ሾሻይ ዱኪን ኢስራኤል አሳፔ ዳርይ ሃይቂዴስ።

7 ዴሪዘካ ሙሴኮ ቢዲ፤ «ጎዳ ቦላኔ ኔ ቦላ ኑ ኢታ ቃላ ሃሳይዳ ጊሻስ ኑኒ ቆሂዶስ፤ ሃኢካ ሃይቲ ዱኪዛ ሾሻቲ ኑፔ ኪቻና ማላ ኔኒ ኑስ ጎዳ ዎሳርኪ!» ጌዳ፤ ሙሴይካ ዴሪሰ ዎሲዴስ።

8 ሄ ዎዴ ጎዳይ ሙሴስ፤ «ኔኒ ጸርቂማላ ሾሽ ቆጸ ኬሳዳ ቱሳ ማላ አዲሳ ማሳ ቦላ ካቃ፤ ሾሺ ዱኪዳ አሲ ዉሪካ ሄሳ ቤኢዲ አታና» ጌዴስ።

9 ሙሴይካ ጸርቂማላፔ ሾሽ ሜዲዲ ቱሳ ማላ አዲሳ ማሳ ቦላ ቃጺዴስ፤ ሾሺ ሳጺዳ አሲ ኡባይ ሄ ጸርቂማላ ሾሻ ቶቁ ጌ ዴሊዳይ ዴሊዳይ ፓጺዴስ።

ኤሬፔ ዴንዲዲ ሞኣቤ ቡስ

10 ኢስራኤል አሳይ ባ ዲዛሶፔ ዴንዲ ቢዲ ኦቦቴን ዴንካኒ ኡቲዴስ።

11 ሄፔ ዴንዲዲ ሞኣቤፔ አርሼይ ሞኪዛ ባጋራ ዲዛ ኢዬ-አባሪሜ ባዞን ዴንካኒ ኡቲዴስ።

12 ሄፔ ዴንዲ ቢዲ ዛራዴ ሾባን ኡቲዴስ።

13 ሄፔካ ዴንዲ ቢዲ አሞሬታ ዴሬራ ካንሊ ቢዛ ባዞ አርኖኔ ሻፋፔ ሄ ፒንፋን ዲዛ ቢታን ዴንካኒ ኡቲዳ፤ አርኖኔ ሻፋዚ ሞኣቤ ዴሬሲኔ አሞራ ዴሬዛስ ጌዶ ጳሳን ዴስ።

14 ሄሳ ጋሶን ጎዳይ ካሌሊን ኦሌቲዳ ኦላ ጊሻስ ዮቲዛ ታሪኬ ማጻፋዛን፤ «ሱፋ ሄራኒኔ ሾባታን ዲዛ ዋሄቤ ካታማን አርኖኔን ሃሊ ባይንዳ ሻፋን፤

15 ቢዲ ኤሬ ካታማኔ ሞኣቤ ጳስ ጋካናስ ካንሊ ቢዛ ዞዜታ» ጌቲቲዴስ።

16 ሄፔ ዴንዲዲ ቢኤሬ ቢዳ፤ ሄሲካ ጎዳይ ሙሴስ፤ «ዴራ ኢሲ ቦላ ሺሻ፤ ታኒ ኢስታስ ሃላ ኢማና» ጌዲ ዮቲዳ ሃላ ኦላ።

17 ሄ ዎዴ ኢስራኤል አሳይ ሃይሳ፤ «ሃይሶ ፑልቶዞ ፑልታ፤

እንቴካ እዛሰ ዩጸቴ።

18 ካዎቲ ባ ካዎቲፋ

ጉፊን ቦኪዳ፤

ዳናቲ ባ ጉፊን ዚቂሲዳ፤

ሃፋ ኦላሰ ዩጸቴ» ገዳ።

ሄ ባዘዛፔ ዳንዲዲ ጌዴ ማታኔ ቢዳ።

19 ማታኔፔካ ጌዴ ናሃልኤሌራ ካንሊዲ ጌዴ ባሞቲ ቢዳ።

20 ባሞቲፔ ዳንዲዲ አሞኔ ዴሬን ዲዛ ሾባ ቢዳ፤ ሄ ሾባይካ ፒዝጋ ዙማፔ ዳንኤ ባጋራ ባዘዛ ገናን ዴሰ።

ካዎ ሲሆኔ ጸኔቱላ

(ዛሬ 2:26—3:11)

21 ሄሳፌ ጉዬ ኢሰራኤሌ አሳይ አሞሬ ዴሬ ካዎ ሲሆኔሰ ቃሰታኔ ዩዲዲ፤

22 «ኦኒ ኔ ቢታራ አፂ ባና ማላ ኑና አላ ዩዳርኪ! ኦኒኔ ኑ ማሄይ ኦጌፔ ካሬ ኬዘኮ፤ ጌዴ ኔ ካላ ገደ ገዲን ዎይኮ ኔ ዎይኔ ሚላ ጋርሰ ኑ ጌሎኮ፤ ኔ ሃፋ ኦላፌ ኤኪ ኡዮኮ፤ ኦኒ ኔ ዴሬራ አፂ ባና ጋካናሰ ኦጌፔ ሹርኢ ጎኮ» ገዴሰ።

23 ሲሆኔይ ገዲኮ ኢሰራኤሌ አሳይ እዛ ቢታራ አፂ ባና ማላ ኮዬቤና፤ ሃራፔካ እዚ ባሰ ዲዛ ኦላ አሳ ሺሺ ኤኪዲ ያሃጼ ባዘ ዎፂዴሰ፤ ኢሰራኤሌ አሳራካ ኦላ ኦይኬቲዴሰ።

24 ኢሰራኤሌ አሳይ ገዲኮ ኢሰታ ጸኒዴሰ፤ አርናኔ ሻፋፔ ደሚዲ አሞኔ ዴሬ ጳሰ ገዲዳ ያቦቄ ሻፋ ጋካናሰ ዲዛሶዛ ኦይኪዳ፤ ገደ አቲን አሞኔ አሳይ ባ ዛዎ ሚኒ ናጊዛ ገሻሰ ሄ ጌሊቤቲና።

25 ኢሰራኤሌ አሳይ ሂሰቲዲ አሞሬ ዴሬ ቢታን ዲዛ ካታማታ ሃሴቦኔኔ ሄ ሄራን ዲዛ ጉላ ካታማታካ ኦይኪዲ ዲንካኒ ኡቲዳ።

26 ሃሴቦኔይ አሞሬታ ካዎ ሲሆኔይ ካዎቲዳ ካታማ፤ እዚካ ካሴ ሞአቤን ካዎቲዳ ካዎዛራ ኦሌቲዲ አርናኔ ሻፋ ጋካናሰ ዲዛ ቢታ ኡባ ኢሰታፌ ዎላ ኤኪዴሰ።

27 ጊንጾ ጊግሲዲ ዩጸዛይቲ ሄሳ ገሻሰ ዩጸሺ

«ሃሴቦኔኮ ሃ ዩቲ!

ሃና ካታማያ ገሞቤቱ!

ሲሆኔ ካታማያ

ኦሶ ደሜቱ።

28 ሃሴቦኔፔ ታማይ ኬዚዴሰ፤

ላጮይካ ሲሆኔ

ካታማፔ ኬዚዴሰ፤

ሞአቤ ዳሬን
ኤሬ ጌቴቴዛሶዛ ሳይሲዳሰ፤
አርኖኔ ቦላ ጌዜ ቢታን ዲዛ
ሃላቃታካ ዲፒ ሂሰቲዳሰ።

- 29 ሃኔ ሞአቤ ኔሰ አዬ አና!
ኢንቴኖ ካሞሼሰ
ጎይኒዛይቶ!
ኢንቴ ዲፒ ገ ሳያና፤
ኢንቴ አቱማ
ናይታ ቤቴሰ፤
ኢንቴ ማጫ ናይታካ
ዲኤቴላሰ አሞሬ ካዎ
ሲሆኔሰ አሉ ኢሚዳሰ።

- 30 ሄሳ ገሻሰ ኢሰታ ዜሬላይ
ሙሌራ ሳይዳሰ፤
ሃሴቦኔፔ ቢዲ
ዲቦኔ ጋካናሰ
ኖፋፔ ቢዲ
ሜዳባ ጋካናሰ ዲዛ
ኡባ ፒሰኪ
ሂሰቲ ላሊደሰ» ገዳ።

- 31 ሄሳ ገሻሰ ኢሰራኤሌ አሳይ አሞሬ ዳሬን ዲንካኒ ኡቴዳሰ።

- 32 ሙሴይካ ኢያዜሬ ቢዲ ጸሞሳና አሰ ዬዲዳሰ፤ ኢሰራኤሌ
አሳይካ ሄ ካታማኖኔ ኢዚ ሄራን ዲዛ ቁሪ ካታማታ ኦሊ ኦይኪዳ፤
ካሴ ሄን ዲዛ አሞሬ አሳታ ጎዲዳ።

ካዎ አጌ ጸኔቴሰ

- 33 ሄሳፌ ጉዬ ኢሰራኤሌ አሳይ ጉዬ ሲሚዲ ጌዳ ባሳኔ
ኤፊዛ ኦጌዛራ ቢዳ፤ ባሳኔ ካዎ አጌይ ኤዲራኤን ኢሰታራ ኦላ
ኦይኬታናሰ ባ ኦላንቻታ ኡባ ኤኪ ኬዚዳሰ።

- 34 ጎዳይ ሙሴሰ፤ «ሃይሳ አዳዛሰ ባቦፋ! ኢዛ አሳኔ ኢዛ
ዳሬዛ ታ ኔሰ አላ ኢማና፤ ካሴ ሃሴቦኔን ዳኢሼ አሞሬታ ሃሪዛ
ካዎ ሲሆኔ ቦላ ኔ ኦሶይሳሶ ሃይሳ ቦላካ ኦላ» ገዳሰ።

- 35 ሄሳ ገሻሰ ኢሰራኤሌ አሳይ አጌ፤ ኢዛ ናይታኔ ኢዛ ዳራ
ኡባ ዲፒ ሂሰቲዲ ቢታ ባሰ ኤኪዳሰ።

22

ባላቄኔ ባላማ

¹ ሄሳፌ ጉዬ ኢስራኤል አሳይ ዳንዲዲ ኢያርኮ ገናራ ዮርዳኖሴ ሻፋፔ አርሼይ ሞኪዛ ባጋራ ዲዛ ሞክቤ ዳምባን ዲንካኒ ኡቲዴስ።

² ኢስራኤል አሳይ አሞሬታ ቦላ ኦሊዳይሳ ኡባ ጸፖራ ና ባላቄይ ሲዩዴስ።

³ ኢስራኤል አሳይ ኬሂ ዳሮ ገዲዳ ገሻስ ሞክቤ አሳይ ኬሂፔ ባቢዴስ።

⁴ ሞክቤቲ ሚዲያማ ጨማታስ፡ «ቦራይ ማታ ሚ ሳይሲዛ ማላ ሃ ማቲ አሳይ ኑ ዩሾን ዲዛ ኡባ ዲፒ ሂስቲ ሳይሳና» ገዳ።

ሄ ዋዴ ሞክቤ ካዋ ጸፖራ ና ባላቄይ፡

⁵ አማዋ ቢታን ኤፊራዲሴ ሻፋ ማታን ፓቶሬ ካታማን ዲዛ ቢኦሬ ና ባላማኮ ቃስታኔ ኪቲዲ፡ «ቤያ! ገብጼ ቢታፌ ኬዚዳ ኢሲ ዳሬይ ቢታ ማይኢዴስ፤ ሄ ዳሬዚ ኑ ማታን ዲንካኒ ኡቲዴስ።

⁶ ኢስቲ ኑፔ ኬሂ ዋልቃማ ገዲዳ ገሻስ ዋዜ ኔና ሁ! ሃ ያዳ ታስ ኢስታ ቃንጋርኪ! ኔ ቃንጊዛ ገዲኮ ታ ኢስታ ጸናዳ ቢታፌ ኬሳናኮ ኦኔ ኤሪዛይ? አይስ ገኮ ኔኒ አንጂዳዴይ አንጄቲዛይሳ፡ ኔ ቃንጊዳዴይ ቃንጌቲዛይሳ ታ ኤራይስ» ገዴስ።

⁷ ሂስቲን ሞክቤ ጨማቲኔ ሚዲያማ ጨማቲ ቃንጊሳናስ ኤኪ ቢዳ ሚሻ ባላማስ ኢሚዲ ባላቄ ኪታ ዮቲዳ።

⁸ ባላማይ ኢስታስ፡ «ኢንቲ ሃች ሃን አቂኮ ጎዳይ ታስ ዮቲዳይሳ ኡባ ታ ኢንቲስ ዋንቶ ማላዶ ዮታና» ገዴስ፤ ሂስቲን ሞክቤ ጨማቲ ባላማ ማታን አቂዳ።

⁹ ጸሲ ባላማኮ ዩዲ፡ «ሃይቲ ኔናራ ዲዛ አሳቲ አይ አሴ?» ገዲ ኦይቺዴስ።

¹⁰ ባላማይካ ጸሳስ፡ «ሞክቤ ካዋ ጸፖራ ና ባላቄይ፡

¹¹ ረገብጸፔ ኬዚዳ ዳሬይ ቢታ ዩ ማይኢዴስ፤ ኔኒ ያዳ ታስ ኢስታ ቃንጊዛ ገዲኮ ታ ኢስታ ኦላ ጸናዳ ቢታፌ ኬሳናኮ ኦኔ ኤሪዛይ!» ገ ኪቲዳ አሳታ» ገ ዛሪዴስ።

¹² ጸሲ ቃሴ ባላማ፡ «ኔኒ ሃይታ ሃ አሳታራ ቦፓ፤ ኢስራኤል ዳሬይ አንጄቲዳ ዳሬ ገዲዳ ገሻስ ኔኒ ኢስታ ቃንጎፋ» ገዴስ።

13 ዋንቴላ ጋላስ ማላዶራ ባላሜይ ዴንዲዲ ባላቄይ ኪቲዳ ጨማታስ፥ «ታኒ ኢንቴናራ ቦንታ ማላ ጎዳይ ዲጊዳ ጊሻስ ኢንቴ ቢታ ሲሚቲ» ጊዴስ።

14 ሂስቲን ሞክሴ ጨማቲ ባላቄኮ ሲሚዲ ባላሜይ ኢስታራ ዮንታ ኢዲዳይሳ ኢዛስ ዮቲዳ።

15 ሄሳፌ ጉዬ ዛሪዲካ ባላቄይ ካሴ ኪቲቲዳይታፔ ኣፂ ቦንፔቲዳኔ ቆዳን ዳሮ ጨማታ ባላሜኮ ኪቲዴስ።

16 ኢስቲካ ባላሜኮ ቢዲ፥ «ጺፖራ ና ባላቄይ ኔና፥ ሳኒ ታኮ ዮንታ ማላ ኣይ ሚሺካ ኔና ቲቆፎ!

17 ታ ኔስ ኢዛ ኩሼ ዛራና፤ ኔ ታና ኦይቺዳ ኡባ ታ ኔስ ኢማና፤ ሄሳ ጊሻስ ሃ ዴሬዛ ያዳ ኔ ታስ ቃንጋና ማላ ታ ኔና ሾባይስ!፤ ጊዴስ» ጊ ዮቲዳ።

18 ጊዶ ኣቲን ባላሜይ ኢስታስ፥ «ባላቄይ ባ ካዋቴላ ኬላን ዲዛ ቢራኔ ዋርቃ ኡባ ኢዚ ታስ ኢሚዛኮካ ጎዳይ ታና ኣዛዚዳ ኣዛዘዛ ሜንላዳ ታኒ ታፔ ኣይ ሚሺካ ጉጃናስ ዋይኮ ፓጪንቻናስ ዳንዳይኬ።

19 ጎዳይ ታስ ዮቲዛ ሃራ ሚሺ ዲኮ ታ ኤራናሼ ጋካናስ ኢንቴካ ካሴይታሶ ሃቻ ኦማርስ ሃን ኣቂቲ» ጊዴስ።

20 ሄ ጋላሳ ኦማርስ ጸሲ ባላሜኮ ዪዲ፥ «ሃ ኣሳቲ ኔና ጾይጋና ዪዳ ጊሻስ ዴንዳዳ ኢስታራ ባ፤ ጊዲኮካ ታ ኔስ ዮቲዛዝ ጸላ ኦላ» ጊዴስ።

ባላሜኔ ኢዛ ሃሬዮ

21 ሂስቲን ዋንቴላ ጋላስ ባላሜይ ባ ሃሬ ኮሪ ቶጊ ኤኪዲ ሞክሴ ሃላቃታራ ቢዴስ።

22 ባላሜይ ባ ሃሬ ቶጊ ኤኪዲኔ ባ ኣይሌታፔ ናሞኣታ ካሌሊዲ ቢሺን ጎዳ ሃንቆይ ኢዛ ቦላ ታማ ማላ ኤጺ ኬዚዴስ፤ ሂስቲን ጎዳ ኪታንቻይ ኢዛ ቲቃናስ ኦጌ ቦላ ኣፂ ኤቂዴስ።

23 ሃሬያ ጎዳ ኪታንቻይ ጊላ ማሻ ኦይኪዲ ኤቂዳይሳ ቤያዳ ኦጌፔ ሃራሶ ኬዛዱስ። ባላሜይ ሃሬዮ ኦጌን ዛራናስ ኢታ ሾቶ ሾጪዴስ።

24 ሂስቲን ጎዳ ኪታንቻይ ናሞኡ ባጋራ ዋይኔይ ቶኬቲዛሶሆፔ ጊዶን ያ ባጋራኔ ሃ ባጋራ ጊምቤይ ጊምቤቲ ኡቲዳ ኡንኦሶን ኤቂዴስ።

25 ሃሬያ ጎዳ ኪታንቻዛ ቤኢዳ ማላ ጊምቤዛኮ ሺቃዳ ባላሜ ቶሆዛ ጊምቤዛራ ዳራጸዱስ፤ ሂስቲን ባላሜይ ሃሬዮ ናሞኣንሶ ቡካ ኦይኪዴስ።

26 ሄሳፌ ጉዬ ጎዳ ከታንቻይ ጌዴ ሲንፊ አፂ ቢዲ ናሞኡ ባጋራ አፂዛሶይ ባይንዳ ጸንፋ ኦጌን ኤቂደሰ።

27 ሃሬያ ጎዳ ከታንቻዛ ቤአዳ ባላሜይ ቶጊ ዲሺን ቢታን ኢቻዲሰ፤ ሄሳ ጊሻሰ ባላሜይ ባ ጉፌራ ኢዞ ቡኪዴሰ።

28 ሄ ዋዴ ጎዳይ ሃሬይሰ ሃሳያናሰ ዶና ዶዬን ኢዛ ባላሜሰ፡ «ታ ኔሰ አይ ኢታ ኦላዲና? ሄሹቶ ኔ ታና አይሰ ሾጫዲ?» ጋዲሰ።

29 ባላሜይካ ኢዚሰ፡ «ኔ ታና ኬሃ ካኢዳ ጊሻሳ! ታ ኩሼን ማሻይ ዲዛኮ ታ ኔና ዋጶ ዋጳናሺን!» ጊዴሰ።

30 ሃሬያካ ባላሜሰ፡ «ሃኖ ጋካናሰ ኔ ቶጊዛ ታ ኔ ሃሬዮ ጊዲኪና! ሃይሳፌ ካሴ ሃኒሶ ሃና ኤራዚና?» ጋዲሰ።

ባላሜይ ኢዚሰ ዛሪዲ፡ «ሙሌካ ሃይሳሶ ሃና ኤራካ» ጊዴሰ።

31 ሄ ዋዴ ጎዳይ ባላሜ አይፌታ ዶዬን ጎዳ ከታንቻይ ጊላ ማሻ ሾዲ ኦይኪዲ ኦጌን ኤቂዳይሳ ቤኢዲ ባላሜይ ቢታ ቦላ ጉፋኒዴሰ።

32 ጎዳ ከታንቻዚ ኢዛሰ፡ «ኔ ሃሬዮ አይሰ ሄሹቶ ሾጫዲ? ታኒ ያዳ ኔ ኦጌ ጎርዲዳይ ኔ ቢዛ ኦጌዚ ጌላ ጊዲዳ ጊሻሰ ኔና ዛሪናሳ።

33 ኔ ሃሬያ ታና ቤአዳ ሄሹቶ ታ ሲንፋፌ ባቃታዲሰ፤ ኢዛ ባቃቶንታኮ ታ ኢዞ አጋዳ ኔና ዋጳይቻናኮሺን» ጊዴሰ።

34 ባላሜይ ጎዳ ከታንቻሰ ዛሪዲ፡ «ቱሙካ ታ ናጋራ ኦላዲሰ፤ ኔ ታና ቱቃናሰ ኦጌ ቦላ ኤቂዳይሳ ታ ኤራቤኬ፤ ሃኢካ ኔ ታ ቡሳ ዶሶንታ ጊዲኮ ታኒ ጉዬ ታሶ ሲማና» ጊዴሰ።

35 ጎዳ ከታንቻይ ባላሜሰ፡ «ኔ ሃ አሳታራ ባ ሺን ታኒ ኔሰ ዮቲዛይሳ ጸላ ዮታ» ጊዴሰ፤ ሂሰቲን ባላሜይ ባላቄይ ከቲዳ ሃላቃታራ ቢዴሰ።

ባላቄይ ባላሜ ሞኮ

36 ባላቄይ ባላሜይ ዪዛይሳ ሲዪዲ ኢዛ ሞካናሰ ሞኢቤ ባዞን አርኖኔ ሻፋ አቻን ዲዛ ኤሬ ካታማ ቢዴሰ።

37 ባላቄይ ባላሜ፡ «ኮይሮ ታ ኔኮ ከቲዳ አሳታራ አዛሰ ዮንታ ኢጸዲ? ታ ኔና ቦንቸንታ አሰ ሚሳቲኔ?» ጊ ኢዛ ኦይቺዴሰ።

38 ባላሜይካ ባላቄሰ፡ «ጊዲኮካ ሃኢ ታኒ ኔኮ ያዲሰ፤ ሃኢካ ታሰ አይ ዋልቃይ ዲዜ? ታ ሃሳያና ዳንዳይዛይ ጸሲ ታሰ ዮቶሮ ጸላ» ጊዴሰ።

39 ሄሳ ጊሻሰ ባላሜይ ባላቄራ ጌዴ ቂሪያቴ ሁጾቴ ካታማ ቢዴሰ።

40 ባላቄይ ሄን ሜሄ ሹኪሲዲ ሄ አሾዛፔ ጉል ሄን ባናራ ዲዛ ዴሬ ካሌሊዛይታሲኔ ባላሜሰ ኢሚዴሰ።

41 ዋንቲላ ጋላሰ ማላዶ ባላቄይ ባላሜ ኢሰራኤሌ አሳፔ ባጋይ ቤቲዛሶ ፑዴ ባሞቲ ባኣሌ ጌቲቲዛ ዙማ ቦላ ኬሲዴሰ።

23

ባላሜይ ዮቲዳ ኮይሮ ቲንቢቲ

1 ባላሜይ ባላቄ፥ «ኔ ታሰ ሃይሳን ላፑን ያርሾ ያርሻናሶታ ኦላ፤ ቃሴካ ላፑን ኮርማ ቦራታኔ ላፑን ዶርሳ ሳርሾታ ታሰ ሃ ኤካ ያ» ጌዴሰ።

2 ባላቄይ ባላሜይ ኢዛሰ ዮቲዳ ማላ ኦሊዴሰ፤ ኢሰቲ ናሞኣይ ያርሾ ያርሺዛሶሆታ ቦላ ኢሲ ኢሲ ኮርማ ቦራኔ ኢሲ ኢሲ ሳርሾ ያርሾ ሺሺዳ።

3 ሄሳፌ ጉዬ ባላሜይ ባላቄሰ፥ «ጸሲ ሃ ታኮ ያናኮኔ ዮንታኮ ታኒ ጌዴ ባዳ ኤራና ጋካናሰ ኔኒ ሃይሳን ጸጌቲዛ ያርሾዛ አቻን ኤቃሻ፤ ጎዳይ ታሰ ቆንጪሲኮ ሄሳ ታ ኔሰ ዉርሳ ዮታና» ጌዴሰ፤ ሄሳፌ ጉዬ ባላሜይ ባርካ ፑዴ ጶቃሶ ኬዚዴሰ።

4 ሄን ጸሲ ኢዛራ ጋይቲዴሰ፤ ባላሜይካ፥ «ታኒ ላፑን ያርሾ ያርሺዛሶሆታ ገሊሳዲሰ፤ ያርሾ ያርሺዛሶሆታ ኢሳ ኢሳ ቦላ ኢሲ ኢሲ ኮርማ ቦራኔ ኢሲ ኢሲ ሳርሾ ያርሻዲሰ» ጌዴሰ።

5 ጎዳይካ ባላሜይ ባላቄሰ ዮታናሰ ቤሲዛ ኪታ ኢዛሰ ዮቲዳፔ ጉዬ ባላቄኮ ሲሚ ባና ማላ ዮቲዴሰ።

6 ኢዚካ ጉዬ ሲሚ ቢሺን ባላቄይ ሞኣቤ ኣይሲዛ ዳናታ ኡባራ ኢሲፌ ሄ ጸጌቲዛ ያርሾዛ አቻን ኤቁዳ ማላ ዴሚዴሰ።

7 ሄሳፌ ጉዬ ባላሜይ ሃሳያ ዶሚዲ፥

«ሞኣቤ ካዋ ባላቄይ

ኣርሼይ ሞኪዛ ባጋራ ዲዛ

ዙማቲ ዲዛ ኣራሜፔ

ታና ጴይጌ ኤሂዴሰ፤

ኢዚ ታና፥

ኖ ያዳ ኢሰራኤሌ አሳ

ታሰ ዶቃርኪ!

ኢሰቲ ሳያና ማላ

ታሰ ኢሰታ ቃንጋርኪ!» ጌዴሰ።

8 ሂሰቲን ታኒ ጸሲ

ቃንጎንታዴ ዋሰታ ቃንጎ?

ጸሲ ሂሎንታዴ

ታኒ ዋስታ ሂሎ?
 9 ታኒ ኢስታ ሃይታ
 ጌታ ዛላታ ቦላ
 ዳሼ ዳማይስ፤
 ጶቃ ዙማታ ቦላ ዳሼ
 ታ ኢስታ ጸላይስ፤
 ኢስቲ ባርካ ዲዛ ካዋቴል፤
 ኢስቲ ባና
 ሃራ ካዋቴላራ ጋሊ
 ቆዶንታይሲ ታስ ቤቴስ።

10 ጉዲላ ማላ ጮሪዳ
 ያቆቤ ዜሬላ
 ቆዲ ዳንዳያናይ ኦኔ?
 ዎይኮ ኢስራኤሌስ ጨገዛካ
 ቆዲ ካንፋናይ ኦኔ?
 ጸሎ ኣሳታ ሃይቆ
 ታ ሃይቃና፤
 ታ ዉርሴላይካ
 ኢስታ ዉርሴላ ማላ ጊዶ» ጊዴስ።

11 ባላቄይ ባላሜስ፡ «ሃይሲ ኔ ታ ቦላ ኦሊዳይሲ ኣዜ? ታኒ
 ኔና ሃ ኤሂዳይ ኔ ታ ሞርኬታ ቃንጋናሳ፤ ኔኒ ጊዲኮ ኢስታ ኣንጆ
 ኣንጆዳሳ ኣቲን ቃንጋቤካ» ጊዴስ።

12 ባላሜይካ ዛሪዲ፡ «ጎዳይ ታስ ቆንጨሲዳይሳ ጸላ ታ
 ዮታናስ ቤሴኔ?» ጊዴስ።

ባላሜይ ዮቲዳ ናምኣንሶ ቲንቢቴ

13 ባላቄይ ባላሜስ፡ «ኢስራኤሌ ኣሳ ኩሜላ ጊዶንታ ኢስታፊ
 ጉላቲ ኔስ ቤቴዛሶ ጌዴ ሃራሶ ታናራ ኢሲፊ ባዳ ኔ ኢስታ ሄን
 ታስ ቃንጋርኪ!» ጊዴስ።

14 ሄሳፊካ ፑዴ ፒዝጋ ዙማ ሁኤን ዲዛ ጸፊሜ ዳምባ
 ኤፊዴስ፤ ሄንካ ላፑን ያርሾ ያርሺዛሶ ጊግሲዲ ኢሲ ኢሲ
 ያርሺዛሶዛ ቦላ ኢሲ ኢሲ ኮርማ ቦራኔ ቆርሾ ያርሺዴስ።

15 ባላሜይ ባላቄስ፡ «ኔኒ ሃይሳ ጸጌቲዛ ያርሾዛ ማታን ኤቃሻ፤
 ታኒ ጎዳራ ጋይታና ጌዴ ባይስ» ጊዴስ።

16 ጎዳይካ ባላሜራ ሄን ጋይቲዴስ፤ ኢዚ ዮታና ኪታ ኢዛስ
 ዮቲዲ ኔኒ ባላቄኮ ሲማ ባዳ ሃይሳ ሃ ኪታ ኢዛስ ዮታ።

17 ኢዚ ሲሚ ቢሺን ባላቄይ ሞኣቤ ዴሬዛ ካሌሊዛይታራ ሄ
 ጸጌቲዛ ያርሾዛ ማታን ኤቄዳ ማላ ዴሚዴስ፤ ባላቄይካ ጎዳይ
 ኢዛስ ኣይ ዮቲዳኮ ኢዛ ኦይቺዴስ።

18 ባለሚያካ ኢዛሰ ሃሳያ ደሚሽ፥
«ጸፖራ ና ባላቄ!
ሃ ሺቃ!

ታኒ ኔሰ ዮቲዛይሳ ሲያ።
19 ጸሲ አሳ ማላ ዋርዶቴና፤
ኢዛ ቆፋይ
አሳ ቆፋ ማላ ላሜቴና፤
ኢዚ ባ ኢሚዳ ሂዶታ
ኡባ ፖሌሰ፤
ኢዚ ባ ዮቲዳ
ኡባ ኦፊሰ።

20 ኢዚ ታሰ
ታ አንጃና ማላ ዮቲዳሰ፤
ጸሲ አንጃዳ ቃላ
ታኒ ላማናሰ ዳንዳይኬ።

21 ያቆቤ ዜሬላ ቦላ
ሜቶይ ጋኬና፤
ኢሰራኤል አሳ ቦላካ
ዋዬይ ጋኮንታይሲ
ታሰ ቤቴሰ፤
ኅዳይ ኢሰታራ ዳሰ፤
ጸሲ ካዎ ጊዲዳይሳ
ኢሰቲ ቆንጩን ዮቴቴሰ።

22 ጸሲ ኢሰታ
ጊብጾፔ ኬሲዳሰ፤
ኢዚ ኢሰታሰ
ሜንላ ማላ ቃይጫና።

23 ያቆቤ ናይታ ቦላ
ኣይ ቢታይ፥
ኢሰራኤል ቦላ
ኣይ ሙሬኖይካ ኦፊና፤
ሄኮ ሃኢ ያቆቤሲኔ
ኢሰራኤሌሰ፥
<ጸሲ ኢሰቲ ኣይ ኦሊዳኮ
ኣኔ ጸሊቴ!> ጌቴታና።

24 ኢሰራኤል ኣሳይ
ማጫ ጋሞ ማላ ዳንዳና፤
ባ ሻንካቲ ኤሂዳይሳ ሞንታ፥
ሱላካ ኡዮንታ ዲሽ

ሼምፖንታ ጋሞ ማላ
ዴንዳና» ጊ ዮቲዴስ።

25 ሄሳፌ ጉዬ ባላቄይ ባላሜስ፥ «ኔኒ ኢሰራኤል ኣሳ ቃንጎንታ
ኢጲዳ ማላ ኢስታ ኣንጀካ ኣንጀፋ!» ጊዴስ።

26 ባላሜይካ፥ «ታኒ ካሴ ኔስ ጎዳይ ታስ ዮቶሮ ጸላ ታ ኦፋና
ጋዳ ዮታቤኪና?» ጊዴስ።

ባላሜይ ዮቲዳ ሄሻንሶ ቲንቢቲ

27 ባላቄይካ፥ «ሃ ያ ኣኔ ሃይሳፌ ሃራሶ ቦስ፤ ኦኔ ኤሪዛይ
ኔኒ ሄን ዳዳ ሃይሳ ዴሬዛ ታስ ቃንጋና ማላ ጸሲ ኔስ ኤሮ ጎንታ
ኣጌና» ጊዴስ።

28 ሄሳ ጊሻስ ባላቄይ ባላሜ ጌዴ ባዞ ጊናራ ዲዛ ፔኦሬ ዙማ
ሁኤ ኤኪ ኬዚዴስ።

29 ባላሜይካ ኢዛ፥ «ሃይሳን ታስ ላፑን ያርሾ ያርሺዛሶ ጊጊሳ፤
ላፑን ኮርማ ቦራታኔ ላፑን ቆርሾታ ሃ ታስ ኤካ ያ» ጊዴስ።

30 ባላቄይካ ባላሜይ ኢዛስ ዮቲዳ ማላ ኦሒዴስ፤ ያርሾ
ያርሺዛሶዛ ቦላ ኢሲ ኢሲ ኮርማ ቦራኔ ኢሲ ኢሲ ቆርሾ ያርሾ
ሺሺዴስ።

24

1 ባላሜይካ ጎዳይ ኢሰራኤል ኣሳ ኣንጃናስ ዶሲዳይሳ ኤሪዳ
ዋዴ ካሴ ኢዚ ኦሒዛይሳ ማላ ሙሬኖ ኦሶ ኦፋናስ ኮዪቤና፤ ባ
ሲንላካ ዴጌ ባዞ ዛሪዴስ።

2 ኢሰራኤል ኣሳይ ባ ቆሞን ቆሞን ማራራ ዴንካኒ ኡቲዳይሳ
ቤኢዴስ፤ ጸሳ ኣያናይ ኢዛ ቦላ ዋዲዴስ፤

3 ሂስቲን ኢዚ ቲንቢቲ ሃሳያ ዶሚዲ፥

«ቢኦሬ ና ባላሜይ

ሃሳይዛ ቲንቢቲ ቃላይ፥

ኢዛ ኣይፌቲካ ዶዬቲዳዴይ፥

4 ጸሳ ቃላ ሲዪዛዴይ

ኢዚ ኩንዲ ዲሺን

ኢዛ ኣይፌቲ ዶዬቲን

ኡባ ዳንዳይዛ ጸሳ ኣጃታ

ቤኢዛዴ ኪታይ ሃይሳ።

5 ያቆቤ ኔ ዴንካኔቲ

ኢሰራኤል ኔ ዲዛሶቲ

ኣይ ማላ ሎኦ?

6 ኢስቲካ ሚጨቲዳ

ዙሌታ ማላ፤

ቃሴካ ሻፋ ደናን ዲዛ
 እታኪልቴሶሆታ ማላ፤
 ጎዳይ ቶኪዳ
 ጎዳሬ ኡላ ማላ፤
 ዎይኮ ሻፋ ደናን ዲዛ
 ሊባኖሴ ዚጋ ማላ።

7 ኢራይ ኡባ ዎዴ
 ኢሰታሰ ቡኪዛ ገሻሰ
 ኢሰታ ሃሊ ኩሚ ፓላሃሰ፤
 ዜሬላ ዎዴ ኢሰታሰ
 ገዲዛ ሃሊ ዴሰ፤
 ኢሰታ ካዎይ አጋጌፔ
 አጼላ ገዳና፤
 ኢሰታ ካዎቴላ
 ጶቁ ጶቁ ጋና።

8 ኢሰታ ገብጾፔ ኬሲዳ ጸሲ
 ኢሰታሰ ሜንላ ማላ ኦሌታና፤
 ኢሰታ ሞርኬ ገዲዳ
 ካዎቴላታ ኢዚ
 ፑዜሬላ ዩጋና፤
 ኢዚ ኢሰታ
 ሜቁላታ ሊቂሳና፤
 ኢሰታ ዎንዳፊታካ
 ሜንላሬላ ዩጋና።

9 ሃይሲ ካዎቴላይ
 ጋሞ ማላ ዛማዲ ኡቴዴሰ፤
 ማጫ ጋሞ ማላካ
 ዙጊ ኡቴዴሰ፤
 ኢሰቲ ዛማዲ ኡቴዳሶሆፔ
 ኢሰታ ዴንላና
 ዳንዳይዛይ ኦኔ?

ኔና አንጂዛዴይ አንጂቶ፤
 ኔና ቃንጊዛዴይካ
 ቃንጌቶ» ገዴሰ።

10 ባላቂይ ሃንቆን ባ ኩሺ ባቂዲ ባላሜሰ፤ «ታኒ ኔና ታ
 ሞርኬታ ቃንጋናሰ ዴይጋዲሰ፤ ገደ ኣቲን ኔኒ ኢሰታ ሄሹቶ
 አንጂዳሳ።

11 ሃኢ ጊዲኮ ኤሶን ጌዴ ኔሶ ባ! ታ ኔሶ ዳሮ ሚሽ ኢማና
ጋ ቃላ ጌላዲስ፤ ጊደ ኣቲን ኔ ሄ ሚሻ ዴሞንታ ማላ ጸሲ
ጎርዲዴስ» ጊዴስ።

12 ባላሚይ ባላቄስ ዛሪዲ፥ «ኔኒ ታኮ ከቲዳ ኣሳታሰ፥

13 ላላቄይ ባስ ዲዛ ቢራኔ ዋርቃ ኡባ ኢዚ ታስ ኢሚዛኮካ
ታኒ ታ ሼኔን ኢታ ጊዲን ዋይኮ ሎኦ ኦፋናስ ጎዳ ቃላፔ ኣፋናስ
ዳንዳይኬ፤ ታኒ ዮታናይ ጎዳይ ታስ ዮቶሮ ጸላ፡ ጋዳ ካሴ ታ
ኢስታስ ዮታቤኪና?» ጊዴስ።

ባላሚይ ዮቲዳ ኦይዳንላ ቲንቢቲ

14 ዉርሴፋን ባላሚይ ባላቄስ፥ «ሃኢ ታኒ ጌዴ ታ ዴሬ ሲማ
ባይስ፤ ጊደ ኣቲን ታ ባናፔ ካሴታዳ ኢስራኤሌ ኣሳይ ኔ ዴሬ
ኣሳ ቦላ ጋፋናይሳ ኔሶ ቆንጪሳናስ ኮያይስ» ጊዴስ።

15 ሄሳፌ ጉዬ ኢዛስ ቲንቢቲ ዮቶ ደሚዲ፥
«ኢዛ ኣይፌይ ዶዬቲዳዴይ፥

ቢኦሬ ና ባላሚይ
ዮቲዛ ቲንቢቲ ቃላይ ሃይሳ፤

16 ጸሳ ቃላ ሲዪዛዴ፥
ኢዚ ኩንዲ ዲሺን
ኢዛ ኣይፌቲ ዶዬቲን
ዋልቃማ ጸሳፌ
ኤራቴላ ዴሚዳዴ፥
ኡባ ዳንዳይዛ ጸሳ ኣጁታ
ቤኢዛዴ ከታይ ሃይሳ።

17 ታኒ ኢዛ ቤኣይስ፤
ጊደ ኣቲን ሃኢ ጊዴና፤
ታ ኢዛ ጸላይስ፤
ጊዲኮካ ሃኢ ማታን ጊዴና፤
ጸሊንቴይ ያቆቤፔ
ቤታና፤
ካዋቲላ ጉፌይ
ኢስራኤሌፔ ኬዛና፤
ሞኣቤ ዜሬላኔ
ሴቴ ዜሬላታ ኡባ
ዲፒ ሂስቲ ፋይሳና።

18 ኤዶሚይ ጸኔታና፤
ኢዛ ሞርኬ ሴይሬይካ
ኢዛስ ሃሬታና፤
ኢስራኤሌ ዴሬይ

ጸኖይ ጸኖሽን ዳና።
 19 ያቆቤፔ ዳሬ ኣይሲዛዳይ ኬዛና፤
 ኢዚ ካታማ ጊደን
 ኣቲዳይታ ፒቲ ጳይሳና» ጊዳሰ።

ወርሴላን ባላሜይ ሃሳይዳ ሃሳያ
 20 ሄሳፌ ጉዩ ባላሜይ ጌዳ ኣማሌቄ ዛሪ ዳሊዲ፥
 «ኣማሌቄይ ኡባፌ ኣጲዛ
 ዋልቃማ ካዋቲል፤
 ጊደ ኣቲን ኢዚ ወርሴላን
 ሜርናሰ ጳያና» ጊ
 ቲንቢቲ ዮቲዳሰ።

21 ጌዳ ቄናዌ ዳሬ ኣሳኮ ሲሚ ዳሊዲ፥
 «ኔ ዱሳሶይ
 ኣማኔቲዳሶ ሚሳቲኮካ፥
 ኔ ኬላይ ዛላፌ ዋጮቲ
 ኬዳቲዳ ጊዲኮካ፥

22 ኢንቴኖ ቄናዌ ዳሬቶ!
 ኣሶሬይ ኢንቴና ጸኒዲ
 ዲኢ ኤፊዛ ዋዳ
 ኢንቴ ዉሪ ዉራና» ጊ
 ቲንቢቲ ዮቲዳሰ።

23 ወርሴላን ባላሜይ፥
 «ጸሲ ሃይሳ ኦሊሽን
 ኦኔ ሸምፖራ ፓጻ ዳናይ?

24 ኦላሰ ዋራጂዛ ኣሳይ
 ማርካቤራ ቆጲሮሴፔ ያና፤
 ኢሰቲካ ኣሶሬኔ
 ኤቦሬ ጳይሳና፤
 ኢሰቲካ ባ ሁኤሰ
 ሜርናሰ ጳያና» ጊ
 ቲንቢቲ ዮቲዳሰ።

25 ሄሳፌ ጉዩ ባላሜይ ዳንዲዲ ጌዳ ባ ዳሬ ቢዳሰ፤
 ባላቄይካ ባሶ ሲሚዳሰ።

25

ሞኣቤ ኣሳ ባሌሶ

1 ኢስራኤል አሳይ ሺጸሜ ሾባን ዲዛ ዋዴ አዳቲ ሄን ዲዛ ሞኣቤ ዴሬ ማጫሳታራ ላይማቲዳ፤

2 ሄ ሞኣቤ ማጫሳቲ ኤቃ ጸሳታስ ያርሺዛ ያርሾ ካላፌ ማና ማላ ኢስራኤል አሳ ጾይጊን ኢስቲካ ሄ ካላፌ ሚዲ ኤቃ ጸሳስ ጎይኒዳ።

3 ኢስራኤል አሳይ ባኣሊ-ፔኦሬ ጌቲቲዛ ኤቃ ጸሳስ ጎይኒዳ ጊሻስ ጸሲ ኢስታ ቦላ ሃንቄቲዴስ።

4 ጎዳይ ሙሴስ፡ «ኢስራኤል አሳ ቦላ ኤጺዳ ታ ሃንቆይ ዶቻና ማላ ኢስራኤል አሳ ካሌጢዛይታ ኡባ ኤካዳ ሴታ ጋላስ ሱሊዛ አዋን ዴሬዚ ቤኢሺን ካቃ ዋቋ» ጊዴስ።

5 ሙሴይካ ኢስራኤል አሳ ቦላ ፐርዲዛ ዳናታስ፡ «ኢንቲ ኢሶይ ኢሶይ ኢንቲ ዛርኬፌ ዛርኬፌ ባኣሊ-ፔኦሬ ጌቲቲዛ ኤቃ ጸሳዛስ ጎይኒዳ አስ ኡባ ዋቋቲ» ጊዲ ኣዛዚዴስ።

6 ሙሴይኔ ኩሜላ ማባራይ ጋይቶቲላ ዱንካኔ ፔንጌን ሺቂዲ ዩኪሺን ኢስራኤል አሳ ጋርሳፌ ኢሳዴይ ኢሲ ሚዲያሚ ማጫሳዮ ኤኪዲ ዴራ ሲንላራ አቋ ጌዴ ባሶ አሳኮ ቢዴስ።

7 ቄሴ ኣርኔስ ናዛ ናይ፡ ኤልኤዜሬ ና ፊኒሃሲ ሄሳ ቤኢዲ ካሴ ባ ኡቲዳሶሆፕ ፑሱኩ ጊ ዴንዲዲ ቶሆራ ኤኪዲ ዴሬዛ ጊዴፌ ኬዚ ቢዴስ።

8 ሄ ኣዴዚኔ ማጫሳያ ኢዛን ዲዛ ዱንካኔን ጌሊዴስ፤ ናሞኣታካ ኢሲ ቦላ ቶራራ ጫዲ ዋቋዴስ፤ ሂሰቲን ኢስራኤል አሳ ቦላ ዪዳ ቦሻይ ሲሚዴስ።

9 ቦሻይ ሲማና ጋካናስ ሲንላን ሃይቂዳ አሳይ 24,000 ጊዲዴስ።

10 ጎዳይ ሙሴስ ሂዝጊዴስ፡

11 «ቄሴ ኣርኔስ ናዛ ና፡ ኤልኤዜሬ ና ፊኒሃሲ ኢስራኤል አሳ ጊዶን ታኒ ታ ቦንሻስ ኤቄቲዛ ማላ ኢዚ ኤቄቲዳ ጊሻስ ኢስታ ቦላ ታ ሃንቄቲዳ ሃንቆይ ዶቹዴስ፤ ሄሳ ጊሻስ ታኒ ታ ሃንቆዛን ኢስራኤል አሳ ቋይሳቤኬ።

12 ሄሳ ጋሶን ታኒ ኢዛስ ሜርና ሳርቲላ ጫቆ ቃላ ጌሊዳይሳ ኔ ኢዛስ ዮታ።

13 ኢዚ ባ ጎዳ ቦንሻስ ኤቄዳ ጊሻሲኔ ዴራ ናጋራ ኢዚ ወርሲዳ ጊሻስ ኢዚኔ ኢዛ ዜሬላቲ ኡባይ ሜርናስ ቄሴ ጊዳና።»

14 ሄ ሚዲያሚ ማጫሳይራ ኢሲፌ ሃይቂዳ ኢስራኤል ኣዴዛ ሱንጢ ሳሉ ና ዚሚሬ ጌቲቲስ፤ ኢዚካ ሲሞና ዛርኬታስ ኮራፒኔ።

15 ሄ ማጫሳያ ኮዚቦ ጌቲታወስ፤ ኢዚ አዋይ ጶሬ ጌቲቲስ፤ ኢዚካ ባናራ ኢሲፌ ዲዛ ኣማርዳ ሚዲያሚ ቆሞታስ ኮራፒኔ።

- 16 ጎዳይ ሙሴስ ሂዝጊደስ፤
 17 «እነቱ ሚዲያሜ አሳ ሞርኬ ማላ ቆዲዲ ዲፒ ሂስቲ ዳይሲቱ።
 18 ጋሶይካ ኢስቲ ፔኦሬን አንቱ ቦላ ጌኔ ኦሊዳ ጊሻሲኔ ሄን ዋዲዳ ቦሻ ጌዶን ሃይቂዳ ኢስታ ሃላቃ ናዮ ኮዜቢ ባጋራ ባሌሊዲ አንቱ ቦላ ሞርኬቲላ ኦሶ ኦሊዳ ጊሻሳ።»

26

ኢስራኤል አሳስ ናሞኣንሶ ቆዴቲሳ

- 1 ሄ ቦሻዚ አጊዳፔ ጉዬ ጸሲ ሙሴሲኔ ቄሴ ኣሮኔ ና ኤልኤዜሬስ፤
 2 «ኩሜላ ኢስራኤል ማባራን ኢሳዴ ኬላን ኬላን ኢስታሰ ላይሊ 20 ኩሚዳይታኔ ሄሳፊካ ቦላራ ጊዲዲ ዋታዳሬቲላን ኦላናሰ ዳንዳይዛ አቱማ ናይታ ኡባ ቆዲቲ» ጊደስ።
 3 ሙሴይኔ ቄሴ ኤልኤዜሬይ ዮርዳኖሴ ሻፋ ማታን ኢያርኮ ጊናራ ዲዛ ሞኣቤ ዳምባን ዳሬዛ ሺሺዲ፤
 4 «ጎዳይ ሙሴስ አዛዚዳ ማላ ናሞኡ ታሙ ላይሊኔ ሄሳፊካ ቦላራ ዲዛ አሳ ኡባ ቆዲቲ» ጊደ።
 5 ጊብጼ ዳሬፔ ኬዚዳ ኢስራኤል አሳይ ሃይሳፊ ካሊዛይታ፤
 6 ያቆቤስ ባይራ ናዛ ኦርቤሌ ዛርኬፊ ዩሌቲዳይቲ ሄኖኬኔ ኢዛ ዜሬላታ፤ ፓሉኔ ኢዛ ዜሬላታ፤
 7 ሄጺሮሜኔ ኢዛ ዜሬላታ፤ ካርሜኔ ኢዛ ዜሬላታ።
 8 ኦርቤሌ ዛርኬፊ ቆዴቲዳይቲ 43,730።
 9 ፓሉ ናይ ኤልያቤ፤
 10 ኤልያቤ ናይቲ ናሙኤሌ፤ ዳታኔኔ አብራሜ፤ ዳታኔይኔ አብራሜይ ዳሬዛን ደሬቲዳይታ ጊዲ ኡቲዲ ቆሬራኔ ኢዛ ካሊዛይታራ ዙፔቲዲ ጎዳ ቦላ ማካሊዲ ሙሴኔ ኣሮኔ ፓጪዳ።
 11 ኢስታካ ቢታያ ዶዬታዳ ቆሬራ ኢሲ ቦላ ጋላ ሚታዲሰ፤ ኢስቲካ ሃይቂን ሳሎፔ ዋዲዳ ታማይ 250 አሳ ጹጊደስ፤ ሂስቲን ኢስታ ቃጸዬቲሊ ሃራ አሳስ ማላታ ጊዲደስ።
 12 ቆሬ ዜሬላቲ ጊዲኮ ሃይቂቤቲና።
 13 ሲሞና ዛርኬፊ ዩሌቲዳይቲ ናሙኤሌኔ ኢዛ ዜሬላታ፤ ያሚኔኔ ኢዛ ዜሬላታ፤ ያኪኔኔ ኢዛ ዜሬላታ፤
 14 ዛራሄኔ ኢዛ ዜሬላታ፤ ሳኦሌኔ ኢዛ ዜሬላታ፤
 15 ሲሞና ዛርኬታፔ ቆዴቲዳይቲ 22,200 አዳታ።

- 15 ጋዴ ዛርኬፌ ዩሉቲዳይቲ ጸረኔን ኢዛ ዜሬላታ፡ ሃጌን ኢዛ ዜሬላታ፡ ሹኔን ኢዛ ዜሬላታ፡
- 16 ኦሲናን ኢዛ ዜሬላታ፡ ኤሬን ኢዛ ዜሬላታ፡
- 17 ኦርዴን ኢዛ ዜሬላታ፡ ኦርኤሌን ኢዛ ዜሬላታ፡
- 18 ጋዴ ዛርኬታፔ ቆዴቲዳይቲ 40,500 ኦዴታ፡
- 19 ዩሁዳ ዛርኬፌ ዩሉቲዳይቲ፡ ኤራን ኦናን፤ ኢስቲ ካናን ቢታን ሃይቂዳ፡
- 20 ሃንጐ ኦቲዳ ዩሁዳ ዛርኬፌ ዩሉቲዳይቲ ሴሎሜን ኢዛ ዜሬላታ፡ ፓሬሴን ኢዛ ዜሬላታ፡ ዛራሄን ኢዛ ዜሬላታ፡
- 21 ፓሬሴ ዜሬላቲ ሄጸሮሜን ኢዛ ባጋታ፡ ሃሙሌን ኢዛ ዜሬላታ፡
- 22 ዩሁዳ ዛርኬፌ ቆዴቲዳይቲ 76,500 ኦዴታ፡
- 23 ዩሳኮሬ ዛርኬፌ ዩሉቲዳይቲ ቶላ ኢዛ ዜሬላታ፡ ፑዋን ኢዛ ዜሬላታ፡
- 24 ያሹቤን ኢዛ ዜሬላታ፡ ሸሚሮን ኢዛ ዜሬላታ፡
- 25 ዩሳኮሬ ዛርኬታፔ ቆዴቲዳይቲ 64,300 ኦዴታ፡
- 26 ዛቢሎን ዛርኬፌ ዩሉቲዳይቲ፡ ሴሬዴን ኢዛ ዜሬላታ፡ ኤሎን ኢዛ ዜሬላታ፡ ያሂሌኤሌን ኢዛ ዜሬላታ፡
- 27 ዛቢሎን ዛርኬፌ ቆዴቲዳይቲ 60,500 ኦዴታ፡
- 28 ዮሴፌ ዛርኬፌ ዩሉቲዳይቲ፡ ሚናሴን ኢዛ ዜሬላታ፡ ኤፍሬሜን ኢዛ ዜሬላታ፡
- 29 ሚናሴ ናይታ ዜሬላ ማኪሬይ ጋላኦዴ ዩሊዴስ፤
- 30 ጋላኦዴ ናይቲ ኤዜሬን ኢዛ ዜሬላታ፡ ሄሌቄን ኢዛ ዜሬላታ፡
- 31 ኦሲራኤሌን ኢዛ ዜሬላታ፡ ሴኬሜን ኢዛ ዜሬላታ፡
- 32 ሻሚዳን ኢዛ ዜሬላታ፡ ሄፌሬን ኢዛ ዜሬላታ፡
- 33 ሄፌሬ ና ጸሎፋዴይ ማጫ ናይታ ጸላ ዩሊዴስ፤ ሄይቲካ ማሂሎ፡ ኖኦ፡ ሆጊሎ፡ ሚልኮን ቲርጾ ጌቲቲቲስ፡
- 34 ሚናሴ ቆዋታፔ ቆዴቲዳይቲ 52,700 ኦዴታ፡
- 35 ኤፍሬሜ ዛርኬፌ ዩሉቲዳይቲ፡ ሹቱላን ኢዛ ዜሬላታ፡ ቤኬሬን ኢዛ ዜሬላታ፡ ታሃንን ኢዛ ዜሬላታ፡
- 36 ሹቱላ ና ኤራንን ኢዛ ዜሬላታ፡
- 37 ኤፍሬሜ ዛርኬታፔ ቆዴቲዳይቲ 32,500 ኦዴታ፤ ዮሴፌ ዛርኬፌ ባ ባጋን ባጋን ቆዴቲዳይቲ ሃይታንታ፡
- 38 ቢኒያሜ ዛርኬፌ ዩሉቲዳይቲ፡ ቤላን ኢዛ ዜሬላታ፡ ኦሽቤሌን ኢዛ ዜሬላታ፡ ኦሂራሜን ኢዛ ዜሬላታ፡
- 39 ሻፋሜን ኢዛ ዜሬላታ፡ ሁፋሜን ኢዛ ዜሬላታ፡
- 40 ቤላ ዛርኬፌ ኦራዴን ኢዛ ዜሬላታ፤ ናኢማንን ኢዛ ዜሬላታ፡
- 41 ቢኒያሜ ዛርኬፌ ቆዴቲዳይቲ 45,600 ኦዴታ፡

- 42 ዳኔ ዛርኬታፔ ዩሉቲዳይቲ፥ ሹሃሜኔ ኢዛ ዜሬላታ፥
 43 ሹሃሜ ዜሬላታ ቆዳይ 64,400 ኣዳታ።
 44 ኣሴሬ ዛርኬታፔ ዩሉቲዳይቲ ዩሚኔኔ ኢዛ ዜሬላታ፥
 ዩሺዊኔ ኢዛ ዜሬላታ፥ ባሪሄኔ ኢዛ ዜሬላታ፥
 45 ባሪሄ ናይታፔ ሄቤሬኔ ኢዛ ዜሬላታ፥ ማልኪኤሌኔ ኢዛ
 ዜሬላታ፥
 46 ኣሴሬሰ ሴራሆ ጌቲቲዛ ማጫ ናይ ዳዉስ።
 47 ኣሴሬ ዛርኬታፔ ቆዳይቲ 53,400 ኣዳታ።
 48 ኒፍታሌሜ ዛርኬፌ ዩሉቲዳይቲ፥ ያሂጾሌኔ ኢዛ ዜሬላታ፥
 ጉኔኔ ኢዛ ዜሬላታ፥
 49 ዩዲሬኔ ኢዛ ዜሬላታ፥ ሸሌሜኔ ኢዛ ዜሬላታ፥
 50 ኒፍታሌሜ ዛርኬታፔ ቆዳይቲ፥ 45,400 ኣዳታ።
 51 ኩሜል ቆዳይቲ ኢሰራኤል ኣቱማሳይ 601,730 ጊዲዴስ።
 52 ጎዳይ ሙሴስ ሂዝጊዴስ፥
 53 «ቢታዮ ኢስታ ሱንላ ሱንላ ቆዳ ማላ ዛርኬታስ ጸንጾ
 ጊዳና ማላ ሻካ ሻካዳ ኢማ።
 54 ቆዳን ዳሪዛ ዛርኬታስ ኣሳ ኢማ፤ ቆዳን ጉዲዛይታስ ጽንላ
 ኢማ፤ ቢታ ጊሾይ ኣሳ ቆዳ ጮራቱላ ማላ ጊዶ።
 55 ጊዲኮካ ጊሾዚ ሳማን ጊዶ፤ ሳማዚካ ዩጌታናይ ኢዛዴ
 ዛርኬን ዛርኬና።
 56 ሳማዚ ዩጌታናይ ቆዳን ዳር ዜሬላታ ጊዶኒኔ ቆዳን ጉላ
 ዜሬላታ ጊዶን ጊዶ።»
 57 ለዌ ዛርኬፌ ዩሉቲዳይቲ ጌርሾኔኔ ኢዛ ዜሬላታ፥ ቃኣቴኔ
 ኢዛ ዜሬላታ፥ ሜራሬኔ ኢዛ ዜሬላታ፥
 58 ቃሴካ ሊቢና ዜሬላታ፥ ኬብርኔ ዜሬላታ፥ ማሂሌ ዜሬላታ፥
 ሙሺ ዜሬላታ፥ ቆሬ ዜሬላታ፥ ቃኣቴይ ኣሚራሜ ማኤ።
 59 ኣሚራሜይ ጊብጾን ዩሉቲዳ ለዌ ናዮ ዮካቤዶ ማቾ
 ኤኪዴስ፤ ኢዛካ ኣርኔኔ ሙሴ ጌቲቲዛ ናምኡ ኣቱማ ናይታኔ
 ማራሞ ጌቲቲዛ ኢሲ ማጫ ና ዩላዱስ።
 60 ኣርኔስ ናዳቤ፥ ኣቢሁ፥ ኤልኤዜሬኔ ኢታማሬ ጌቲቲዛ
 ኣይዱ ኣቱማ ናይቲ ዴቴስ።
 61 ናዳቤይኔ ኣቢሁይ ጾሳ ሲንላን ቤሶንታ ታማ ሺሺዳ ጊሻስ
 ቦሻን ሃይቂዳ።
 62 ኢስታስ ላይላይ ኢሲ ኣጊናኔ ኢዛፔ ቦላራ ጊዲዳ
 ለዌ ዛርኬፌ ኣዳታ ቆዳይ 23,000 ጊዲዴስ፤ ሄይቲካ ሃንኮ

ኢስራኤል አሳፔ ዱማ ማዘጋባን ጸፊቲ ኡቲዳ፤ ጋሶይካ ኢስታስ ኢስራኤል ዳሬን ጸንጾስ ገዲዛ ኣይኮ ጋዴይ ኢሜቶንታይሳሳ።

63 ሙሴይኔ ኤልኤዜሬይ ኢያርኮ ገናራ ዮርዳኖሴ ሻፋ ማታን ዲዛ ሞኣቤ ዴምባን ኢስራኤል ኣሳ ቆዲዳ ዎዴ ኢስቲ ጸፊ ኦይኪዳ ኢስራኤል ኣሳ ቆዲይ ሃይሳፊ ቦላን ዲዛይታ።

64 ሙሴይኔ ኣሮኔይ ኮይሮ ሲና ባዞን ዴራ ቆዲዳ ዎዴ ቆዴቲዳ ኣቱማሳፔ ሸምፖራ ፓጻ ኣቲዳይ ባዎ።

65 ሄሲ ሄሳፉ ሃኒዳይ ጎዳይ ካሴ ኢስታስ፡ «ኢስቲ ወሪካ ባዞ ቢታን ሃይቃና!» ገዲ ገሻሳ፤ ገዲ ኣቲን ዮፊኔ ና ካሌቤይኔ ናቂ ና ኢያሶይ ኣታፊ ኡባይካ ሃይቂዳ።

27

ጲሎፋዴ ማጫ ናይታ

1 ዮሴፊይ ሚናሴ ዬሊዴስ፤ ሚናሴይ ማኪሬ ዬሊዴስ፤ ማኪሬይ ጋላኣዴ ዬሊዴስ፤ ጋላኣዴይ ሄፌሬ ዬሊዴስ፤ ሄፌሬይ ጲሎፋዴ ዬሊዴስ፤ ጲሎፋዴስ ማሂሎ፡ ኖኦ፡ ሆጊሎ፡ ሚልኮኔ ቲርጾ ጌቲቲዛ ማጫ ናይቲ ዴቲስ።

2 ኢስቲካ ጋይቶቲፋ ዱንካኔዛ ፔንጌኮ ቢዲ ኩሜፋ ማባራኔ ዴሬዛ ካሌሊዛይቲ ዲዛሶን ሙሴኔ ኤልኤዜሬ ሲንፋን ኣጲ ኤቂዲ፡

3 «ኦ ኣዎይ ኢሲ ኣቱማ ናካ ዬሎንታ ባዞ ቢታን ሃይቂዴስ፤ ኢዚ ጎዳ ቦላ ማካሊዳ ቆሬ ካሊዛይታራ ኢሲፊ ዙፔቲቤና፤ ገዲ ኣቲን ኢዚ ባ ናጋራ ጋሶን ሃይቂዴስ።

4 ሂስቲን ኢዚ ኣቱማ ና ዬሎንታ ኣጊዳ ጋሶን ጸላ ኦ ኣዎ ሱንሊ ኢስራኤል ኣሳ ገደፊ ቁጩቲ ጳያናስ ቤሲዜ? ሄሳ ገሻሰ ኦስ ቤሲዛ ጸንጾ ጋዴ ኦ ኣዎ ዳቦታ ገደን ኢሚቲ» ገዲ።

5 ሙሴይ ኢስታ ኦይሻ ጎዳ ሲንሐ ሺሺዴስ።

6 ጎዳይካ ኢዛስ ሂዝጊዴስ፡

7 «ጲሎፋዴ ማጫ ናይቲ ኦይቺዳ ኦይሻይ ሊኬ፤ ሄሳ ገሻሰ ኔ ኢስታ ኣዎ ዳቦታ ገደን ኢስታስ ጸንጾ ጋዴ ኢማ፤ ካሴ ኢስታ ኣዎ ጋዴይ ጌዴ ኢስታስ ኢሚቶ።

8 ኣቱማ ና ዬሎንታ ሃይቂዳዴይ ዲኮ ኢዛ ማጫ ናይ ሄ ኢዛስ ዲዛዝ ላታናስ ዳንዳይዛይሳ ኢስራኤል ኣሳ ኤሪሳ።

9 ኢዛስ ማጫ ናይካ ባይንዳዝ ገዲኮ ኢዛስ ዲዛዝ ኢዛ ኢሻቲ ላቲቶ።

10 ኢሻይካ ዶንታ ኣጊኮ ኢዛ ኣዎ ኢሻቲ ላቲቶ።

11 ኢዛሰ አዋ አሻይ ደንታ አገኮ ኢዛሰ ማታቲዛ ዳቦይ ኢዛ አቆታ ላቲዲ ጎኤታናሰ ዳንዳዬሰ፤ ታኒ ጎዳይ ኔና አዛዚዳ ማላ ኢሰራኤል ዴሬ አሳይ ሃይሳ ሃ ዋጋዛ ባሰ ኤቂ ዲዛ ዋጋ ሂሰቲ ናጎ።»

ኢያሶ ዶሬቴል
(ዛሬ 31:1-8)

12 ጎዳይ ሙሴስ፡ «ኔኒ ፑዴ አባሪሜ ዙማታ ቦላ ኬዛዳ ታኒ ኢሰራኤል አሳሰ ኢማናሰ ቆፒዳ ቢታ ኡባ ዩሻ ዴላ።

13 ኔኒ ኢዛ ቤደዳፔ ጉዬ ኔ አሻ አርኔይ ሃይቆይሳሶ ኔዛ ሃይቃና፤

14 ኢንቴ ናምኣቲካ ጸኔ ጌቴቲዛ ባዞን ታ አዛዞ ቦላ ማካሊዴታ፤ ኩሜላ ማባራይ ማሪባ ሃላ አቻን ዲሼ ታ ቦላ ማካሊዳ ዋዴ ኢንቴ ኢሰራኤል አሳ ሲንላን ታ ዲማቴላ ማላ ታና ቦንቻናሰ አማኔቲቤኬታ» ጌዴሰ፤ [ማሪባይ ጸኔ ባዞን ቃዴሴን ዲዛ ፑልቶ ሃላ።]

15 ሙሴይካ ጎዳኮ ሂዝጊ ዋሲዴሰ፡

16 «አሰ ኡባሰ ዴኦ አሚዳ ጎዳዉ! ሃይሳ ዴራ ሄሚዛ አሰ ኔኒ ዶራ፤

17 ጋሶይካ ሃይሳ ኔ ዴሬዚ ሄሚዛይ ባይንዳ ዉዴ ማላ ጊደንታ ማላ ኢዚ ዴራ ኬሲዛዴኔ ጌልሊዛዴ፡ ዴሬዛካ ካሌሊዛዴ ጊደና።»

18 ጎዳይካ ሙሴስ፡ «ሎኦ ኣያናይ ኢዛን ዲዛ ናዌ ና ኢያሶ ኔኮ ኤካዳ ኔ ኩሼ ኢዛ ቦላ ዋላ።

19 ቄሴዛ ኤልኤዜሬ ሲንላኒኔ ኩሜላ ኢሰራኤል አሳ ሲንላን ኔ ኢዛ ኤሳዳ ኢዚ ኔ ኦላ ዶሬቲዳይሳ አሳ ኤሪሳ።

20 ኩሜላ ኢሰራኤል ማባራይ ኢዛሰ አዛዜታና ማላ ኔሰ ዲዛ ማታፔ ኢዛሰ ሻካ አማ።

21 ቄሴ ኤልኤዜሬይ ኡሪሜን ጎዳ ሼኔ ሻኪ ኤሪዛ ጊሻሰ ኢዚ ኢያሶ ማዳና፤ ሄሳ ጊሻሰ ኢያሶይኔ ኩሜላ ኢሰራኤል ማባራይ ኤልኤዜሬ አዛዞን ኬዛናኔ ጌላና» ጌዴሰ።

22 ሙሴይካ ጎዳይ ኢዛ አዛዚዳ ማላ ኦሊዴሰ፤ ኢያሶካ ኤፊዲ ቄሴ ኤልኤዜሬ ሲንላኒኔ ኩሜላ ኢሰራኤል አሳ ሲንላን ኤሲዴሰ።

27:14 ዛሬ 3:23-27፤ 32:48-52 27:17 1ካዋ 22:17፤ ሂዚ 34:5፤ ማቶ 9:36፤ ማር 6:34 27:18 ኬሳ 24:13 27:21 ኬሳ 28:30፤ 1ሳሜ 14:41፤ 28:6

23 ጎዳይ ኢዛ ኣዛዚዳ ማላ ሙሴይ ባ ኩሼ ኢያሶ ቦላ
ዋሉዲ ኢዛ ባሶሆዛን ደሪዴሰ።

28

ጋላስ ጋላስ ሺቂዛ ያርሾ
(ኬሳ 29:38-46)

1 ጎዳይ ሙሴስ፡

2 «ኔኒ ኢስራኤል ኣሳስ፡ «ኢዛ ሳዎይ ቱኑ ጊ ታና ኡፋይሳና
ማላ ጽጌቲዛ ካፋ ያርሾ ዎዴን ዎዴን ናጊዲ ኢስቲ ታስ ሺሻና
ማላ ኔ ኢስታ ኣዛዛ» ጋ ዮታ።

3 ቃሴካ ኢስታስ፡ «ታማን ጽጌቲዲ ታስ ሺቃና ያርሾይ ሃይሳፌ
ካሊዛይሳ፤ ኢስታ ቦላ ዎሶይ ባይንዳ ላይሳ ጊዲዛ ናምኡ ቆርሾ
ላቃታ ጋላስ ጋላስ ሺቂ ጽጌቲዛ ያርሾስ ሺሺቲ።

4 ኢሲ ላቃ ማላዶ ናምኣንሶዛ ኦማርሳ ዎዴ ሺሺቲ።

5 ኢሲ ኢሲ ላቃራ ኢሲ ኪሎ ጊዲዛ ሊቆ ቋሌ ኢሲ ሊቲሮ
ጊዲዛ ዎጋራ ዛይቲን ሙኑቂቲዲ ካፋ ያርሾ ጊዲ ሺቆ።

6 ሄሲካ ጋላስ ጋላስ ሺቂዛ ጽጌቲዛ ያርሾ፤ ሄሳ ማላ ያርሾ
ሳዎይ ታና ጎዳ ኡፋይሲዛ ያርሾ ጊዲዲ ኮይሮ ሲና ዙማ ቦላ
ሺቃና ማላ ዎጋይ ዎቋዴሰ።

7 ኮይሮ ላቃዛራ ሺቂዛ ኡሻ ያርሾይ ኢሲ ሊቲሮ ጊዲዛ ሚኖ
ኡሹ ጌሻሶዛን ጎዳስ ጉሲቲ።

8 ኦማርሳ ዎዴ ናምኣንሶ ላቃዛ ኮይሮይሳዛ ኡሻ ያርሾዛ
ጉጂዲ ሺሺቲ፤ ሄሳ ሳዎይካ ጎዳ ኡፋይሲዛ ካፋ ያርሾ ጊዳና።

ሳምባታ ጋላሳ ያርሾ

9 « ሳምባታ ጋላስ፡ ላይሳ ጊዲዳ ዎሶይ ኢስታ ቦላ ባይንዳ
ናምኡ ቆርሾ ላቃታ፡ ኡሻ ያርሾራኔ ናምኡ ኪሎ ጊዲዛ ሊቆ
ቋሌ ዎጋራ ዛይቲን ሙኑቂዲ ካፋ ያርሾ ሂስቲ ሺሺቲ።

10 ሃይሲ ሃ ያርሾዚ ኡሻ ያርሾዛ፤ ጋላስ ጋላስ ጽጌቲዛ
ያርሾዛ፤ ሳምባታ ጋላስ ጋላስ ሺቂዛ ሃራ ጽጌቲዛ ያርሾ።

ኣጊናን ኣጊናን ሺቂዛ ያርሾ

11 « ኣጊናን ኣጊናን ኮይሮ ጋላስ ጋላስ ኢስታ ቦላ ዎሶይ
ባይንዳ ናምኡ ሚርሳታ፡ ኢሲ ቆርሾኔ ላይሳ ኩሚዳ ላፑን ቆርሾ
ላቃታ ጎዳስ ጽጌቲዛ ያርሾ ሂስቲ ሺሺቲ።

12 ኢሲ ኢሲ ሚርጎራ ካላ ያርሾስ ሄሹ ከሎ ጊዲዛ ሊቆ ጳሌ ዋጋራ ዛይቴን መኑቂዲ ሺሺቴ፤ ቃሴ ጳርሾዛራ ካላ ያርሾስ ናምኡ ከሎ ጊዲዛ ሊቆ ጳሌ ዋጋራ ዛይቴን መኑቂ ሺሺቴ፤

13 ኢሲ ኢሲ ጳርሾ ላቃራ ካላ ያርሾስ ኢሲ ከሎ ጊዲዛ ሊቆ ጳሌ ዋጋራ ዛይቴን መኑቂ ሺሺቴ፤ ሄ ጸጌተዛ ያርሾታ ኡባ ሳዎይ ጎዳ ኡፋይሲዛ ካላ ያርሾ ጊዲ ሺቆ።

14 ኢሲ ኢሲ ሚርጎራ ናምኡ ሊቲሮ ጊዲዛ ዎይኔ ኡሹ፤ ጳርሾዛራ ኢሲ ሊቲሮኔ ሳይሶ ጊዲዛ ዎይኔ ኡሹኔ ኢሲ ኢሲ ላቃራ ኢሲ ሊቲሮ ጊዲዛ ዎይኔ ኡሹ ያርሾስ ሺሺቴ፤ ሄሲካ ኣጊናን ኣጊናን ላይሳ ኩሜሳ ሸቂዛ ጸጌተዛ ያርሾ።

15 ጋላስ ጋላስ ጸጌተዛ ያርሾኔ ኢዛራ ሸቂዛ ኡሻ ያርሾዛ ቦላ ዴይሻ ኦርጌ ናጋራ ጊሻስ ያርሾ ጊዳና ማላ ጎዳ ሲንሳ ሺሺቴ።

ፓዚጋ ባኣሌኔ ኡኬላ ባኣሌ

(ሌቄ 23:5-14)

16 « ሳዳስ ፓዚጋ ባኣሌ ኮይሮ ኣጊናይ ጌሊዳ ታማኔ ኦይዳንሉ ጋላስ ቦንቺቴ።

17 ሃ ኣጊናይ ጌሊዳ ታማኔ ኢቻሻንሉ ጋላሳፌ ዶሚዲ ኡኬላ ባኣሌ ቦንቺቴ፤ ሄ ጋላሳፌ ቢዲ ላቸን ጋላስ ጋካናስ ኡኬሳ ሚቴ።

18 ባኣሌዛስ ኮይሮ ጋላስ ጎይናናስ ሸቂቴ፤ ሄ ጋላስ ኣይ ኦሶካ ኦሶፍቴ።

19 ኢሰታ ቦላ ዎሶይ ባይንዳ 2 ሚርጎታ፡ ኢሲ ጳርሾኔ ላይሳ ኩሚዳ ላቸን ጳርሾ ላቃታ ጸጌተዛ ያርሾ ሂስቲ ጎዳስ ሺሺቴ።

20 ኢሲ ኢሲ ሚርጎራ ካላ ያርሾስ ሄሹ ከሎ ጊዲዛ ሊቆ ጳሌ ዋጋራ ዛይቴን መኑቂዲ ሺሺቴ፤ ቃሴ ጳርሾዛራ ካላ ያርሾስ ናምኡ ከሎ ጊዲዛ ሊቆ ጳሌ ዋጋራ ዛይቴን መኑቂ ሺሺቴ።

21 ኢሲ ኢሲ ጳርሾ ላቃራ ካላ ያርሾስ ኢሲ ከሎ ጊዲዛ ሊቆ ጳሌ ዋጋራ ዛይቴን መኑቂ ሺሺቴ።

22 ቃሴካ ናጋራ ዉርሳናስ ዴይሻ ኦርጌ ናጋራ ያርሾስ ሺሺቴ።

23 ሄይቲ ዉሪካ ሺቃናይ ኡባ ዎዴ ማላዶ ማላዶ ጸጌቲ ሸቂዛ ያርሾራ ኢሲፌ ሸቆቶ።

24 ጎዳ ሳዎ ቱኑ ጊዲ ኡፋይሲዛ ካላ ያርሾ ላቸን ጋላስ ኩሜሳ ኢሲ ማላን ሺሺቴ፤ ሄሳካ ጋላስ ጋላስ ሸቂዛ ጸጌተዛ ያርሾ ቦላኔ ኡሻ ያርሾ ቦላ ጉጂዲ ሺሺቴ።

25 ላፑንሉ ጋላስ ጎይናናስ ሸቂቱ፤ ሄ ጋላስ ኣይ ኦሶካ ኦሶፍቱ።

ካላ ሺሾ ባኣሌ
(ሌዌ 23:15-22)

26 « ሳካ ሺሾን ባኣሌ ቦንቺዛ ኮይሮ ጋላስ ኣንቲ ኦራሉ ጋኪዛ ካላፌ ጸራ ጎዳስ ሺሺዛ ጋላስ ጎይናና ሸቂቱ፤ ኣቲን ሃራ ኣይ ኦሶካ ኦሶፍቱ።

27 ናምኡ ሚርጎታ፥ ኢሲ ጳርሾኔ ላይላ ኩሚዳ ላፑን ጳርሾ ላቃታ ሳዎ ቱኑ ጊዲ ጎዳ ኡፋይሲዛ ጸጌተዛ ያርሾ ሺሺቱ።

28 ኢሲ ኢሲ ሚርጎራ ካላ ያርሾስ ሄሹ ኪሎ ጊዲዛ ሊቆ ጳሌ ዋጋራ ዛይቲን ሙኑቂዲ ሺሺቱ፤ ቃሴ ጳርሾዛራ ካላ ያርሾስ ናምኡ ኪሎ ጊዲዛ ሊቆ ጳሌ ዋጋራ ዛይቲን ሙኑቂ ሺሺቱ፤

29 ኢሲ ኢሲ ጳርሾ ላቃራ ካላ ያርሾስ ኢሲ ኪሎ ጊዲዛ ሊቆ ጳሌ ዋጋራ ዛይቲን ሙኑቂ ሺሺቱ።

30 ቃሴካ ናጋራ ዉርሳናስ ዴይሻ ኦርጌ ናጋራ ያርሾስ ሺሺቱ።

31 ሄሳ ሄ ያርሾዛ ኡባ ኡሻ ያርሾራ፥ ሄ ጋላስ ሸቂ ጸጌተዛ ያርሾዛኔ ካላ ያርሾዛ ቦላ ጉጂዲ ሺሺቱ፤ ሄ ያርሾ ሜሄቲ ዋሶይ ባይንዳይታ ጊዲዳይሳ ሻኪ ኤሪቱ።

29

ኦራላ ላይሊ ጌሊሺን ቦንቺዛ ባኣሌ
(ሌዌ 23:23-25)

1 « ላፑንሉ ኣጊናይ ጌሊዳ ኮይሮ ጋላስ ጎይናናስ ሸቂቱ፤ ሄ ጋላስ ኣይ ኦሶካ ኦሶፍቱ፤ ሄ ጋላሳይ ዛይቲዛ ጋላሳ።

2 ኢስታ ቦላ ዋሶይ ባይንዳ ኢሲ ሚርጎ፥ ኢሲ ጳርሾኔ ላይላ ኩሚዳ ላፑን ጳርሾ ላቃታ ሳዎይ ቱኑ ጊዲ ጎዳ ኡፋይሲዛ ጸጌተዛ ያርሾ ያርሺቱ።

3 ኢሲ ሚርጎዛራ ካላ ያርሾስ ሄሹ ኪሎ ጊዲዛ ሊቆ ጳሌ ዋጋራ ዛይቲን ሙኑቂዲ ሺሺቱ፤ ቃሴ ጳርሾዛራ ካላ ያርሾስ ናምኡ ኪሎ ጊዲዛ ሊቆ ጳሌ ዋጋራ ዛይቲን ሙኑቂ ሺሺቱ።

4 ኢሲ ኢሲ ጳርሾ ላቃራ ካላ ያርሾስ ኢሲ ኪሎ ጊዲዛ ሊቆ ጳሌ ዋጋራ ዛይቲን ሙኑቂ ሺሺቱ።

5 ቃሴካ ናጋራ ዉርሳናስ ዴይሻ ኦርጌ ናጋራ ያርሾስ ሺሺቱ።

6 እንቲ ሃይሳ ሃ ያርሾዛ ጋላስ ጋላሲኔ ኣጊናን ኣጊናን ኮይሮ ጋላስ ሸቂ ጸጌቲዛ ያርሾዛ፤ ካላ ያርሾዛኔ ኡሻ ያርሾዛ ቦላ ጉጂዲ ሺሺቲ፤ ሄይታንቲካ ሳዎ ቱኑ ጊዲ ጎዳ ኡፋይሲዛ ጸጌቲዛ ያርሾታ።

ናጋራ ወርሶ ባኣሌ (ሌዌ 23:26-32)

7 « ሳፑንሳ ኣጊናይ ጌሊዳ ታማንሳ ጋላስ ጎይናናስ ሸቂቲ፤ ሄ ጋላስ ጸሚቲ፤ ኦሶካ ኦሶፍቲ።

8 ኢስታ ቦላ ዋሶይ ባይንዳ ኢሲ ሚርጎ፤ ኢሲ ጳርሾኔ ላይሳ ኩሚዳ ሳፑን ጳርሾ ላቃታ ሳዎይ ቱኑ ጊዲ ጎዳ ኡፋይሲዛ ጸጌቲዛ ያርሾ ያርሾቲ።

9 ኢሲ ሚርጎዛራ ካላ ያርሾስ ሄሹ ኪሎ ጊዲዛ ሊቆ ጳሌ ዋጋራ ዛይቲን ሙኑቂዲ ሺሺቲ፤ ቃሴ ጳርሾዛራ ካላ ያርሾስ 2 ኪሎ ጊዲዛ ሊቆ ጳሌ ዋጋራ ዛይቲን ሙኑቂ ሺሺቲ።

10 ኢሲ ኢሲ ጳርሾ ላቃራ ካላ ያርሾስ ኢሲ ኪሎ ጊዲዛ ሊቆ ጳሌ ዋጋራ ዛይቲን ሙኑቂ ሺሺቲ።

11 ናጋራ ወርሳናስ ሸቂዛ ያርሾስ፤ ካላ ያርሾፌ፤ ኡሻ ያርሾፌኔ ጋላስ ጋላስ ሸቂ ጸጌቲዛ ያርሾፌ ሃራ ዴይሻ ኦርጌ ጉጂዲ ሺሺቲ።

ዳሴ ባኣሌ (ሌዌ 23:33-44)

12 « ሳፑንሳ ኣጊናይ ጌሊዳ ታማኔ ኢቻሻንሳ ጋላስ ጎይናናስ ሸቂቲ፤ ሄ ጋላስ ኣይ ኦሶካ ኦሶፍቲ፤ ሳፑን ጋላስ ጋካናስ ጎዳስ ዳሴ ባኣሌ ቦንቺቲ።

13 ሃ ኮይሮ ጋላስ ኢስታ ቦላ ዋሶይ ባይንዳ 13 ሚርጎታ፤ ናሞኡ ጳርሾታኔ ላይሳ ኩሚዳ ታማኔ ኦይዱ ጳርሾ ላቃታ ሳዎ ቱኑ ጊዲ ጎዳ ኡፋይሲዛ ጸጌቲዛ ያርሾ ሂስቲ ሺሺቲ።

14 ኢሲ ኢሲ ሚርጎራ ካላ ያርሾስ 3 ኪሎ ጊዲዛ ሊቆ ጳሌ ዋጋራ ዛይቲን ሙኑቂዲ ሺሺቲ፤ ቃሴ ኢሲ ኢሲ ጳርሾራ ካላ ያርሾስ 2 ኪሎ ጊዲዛ ሊቆ ጳሌ ዋጋራ ዛይቲን ሙኑቂ ሺሺቲ።

15 ኢሲ ኢሲ ጳርሾ ላቃራ ካላ ያርሾስ ኢሲ ኪሎ ጊዲዛ ሊቆ ጳሌ ዋጋራ ዛይቲን ሙኑቂ ሺሺቲ።

16 « ናጋራ ወርሳናስ ሸቂዛ ያርሾስ፥ ካላ ያርሾፌ፥ ኡሻ ያርሾፌኔ ጋላስ ጋላስ ሸቂ ጸጌቲዛ ያርሾፌ ሃራ ዳይሻ ኦርጌ ጉጂዲ ሺሺቲ።

17 « ናምኣንሉ ጋላስ ኢስታ ቦላ ኣይ ዋሶይ ባይንዳ 12 ሚርጎታ፥ 2 ጳርሾታኔ ላይሴ ኩሚዳ 14 ጳርሾ ላቃታ ሺሺቲ።

18 ሚርጎታራ፥ ጳርሾታራኔ ጳርሾ ላቃታራ ኢሲፌ ሸቂዛ ካላ ያርሾዛኔ ኡሻ ያርሾዛ ካሴ ዋጋን ዋጂዳ ቆዳ ማላ ያርሺቲ።

19 ናጋራ ወርሳናስ ሸቂዛ ያርሾስ፥ ካላ ያርሾፌ፥ ኡሻ ያርሾፌኔ ጋላስ ጋላስ ሸቂ ጸጌቲዛ ያርሾፌ ሃራ ዳይሻ ኦርጌ ጉጂዲ ሺሺቲ።

20 « ነሄሻንሉ ጋላስ ኢስታ ቦላ ዋሶይ ባይንዳ ታማኔ ኢሲ ሚርጎታ፥ ናምኡ ጳርሾታኔ ላይሴ ኩሚዳ ታማኔ ኦይዲ ጳርሾ ላቃታ ሺሺቲ።

21 ሚርጎታራ፥ ጳርሾታራኔ ጳርሾ ላቃታራ ኢሲፌ ሸቂዛ ካላ ያርሾዛኔ ኡሻ ያርሾዛ ካሴ ዋጋን ዋጂዳ ቆዳ ማላ ያርሺቲ።

22 ናጋራ ወርሳናስ ሸቂዛ ያርሾስ፥ ካላ ያርሾፌ፥ ኡሻ ያርሾፌኔ ጋላስ ጋላስ ሸቂ ጸጌቲዛ ያርሾፌ ሃራ ዳይሻ ኦርጌ ጉጂዲ ሺሺቲ።

23 « ኦይዳንሉ ጋላስ ኢስታ ቦላ ዋሶይ ባይንዳ ታሙ ሚርጎታ፥ ናምኡ ጳርሾታኔ ላይሴ ኩሚዳ ታማኔ ኦይዲ ጳርሾ ላቃታ ሺሺቲ።

24 ሚርጎታራ፥ ጳርሾታራኔ ጳርሾ ላቃታራ ኢሲፌ ሸቂዛ ካላ ያርሾዛኔ ኡሻ ያርሾዛ ካሴ ዋጋን ዋጂዳ ቆዳ ማላ ያርሺቲ።

25 ናጋራ ወርሳናስ ሸቂዛ ያርሾስ፥ ካላ ያርሾፌ፥ ኡሻ ያርሾፌኔ ጋላስ ጋላስ ሸቂ ጸጌቲዛ ያርሾፌ ሃራ ዳይሻ ኦርጌ ጉጂዲ ሺሺቲ።

26 « ኢቻሻንሉ ጋላስ ኢስታ ቦላ ዋሶይ ባይንዳ ኡዲፋን ሚርጎታ፥ ናምኡ ጳርሾታኔ ላይሴ ኩሚዳ ታማኔ ኦይዲ ጳርሾ ላቃታ ሺሺቲ።

27 ሚርጎታራ፥ ጳርሾታራኔ ጳርሾ ላቃታራ ኢሲፌ ሸቂዛ ካላ ያርሾዛኔ ኡሻ ያርሾዛ ካሴ ዋጋን ዋጂዳ ቆዳ ማላ ያርሺቲ።

28 ናጋራ ወርሳናስ ሸቂዛ ያርሾስ፥ ካላ ያርሾፌ፥ ኡሻ ያርሾፌኔ ጋላስ ጋላስ ሸቂ ጸጌቲዛ ያርሾፌ ሃራ ዳይሻ ኦርጌ ጉጂዲ ሺሺቲ።

29 « ሐሰቱንላ ጋላስ ኢስታ ቦላ ዋሶይ ባይንዳ ኦስቸን ሚርጎታ፥ ናምኡ ጳርሾታኔ ላይሰ ኩሚዳ ታማኔ ኦይዱ ጳርሾ ላቃታ ሺሺቲ።

30 ሚርጎታራ፥ ጳርሾታራኔ ጳርሾ ላቃታራ ኢሲፌ ሸቂዛ ካላ ያርሾዛኔ ኡሻ ያርሾዛ ካሴ ዋጋን ዋጲዳ ቆዳ ማላ ያርሺቲ።

31 ናጋራ ዉርሳናስ ሸቂዛ ያርሾስ፥ ካላ ያርሾፌ፥ ኡሻ ያርሾፌኔ ጋላስ ጋላስ ሸቂ ጸጌቲዛ ያርሾፌ ሃራ ዳይሻ ኦርጌ ጉጂዱ ሺሺቲ።

32 « ሐሰቱንላ ጋላስ ኢስታ ቦላ ዋሶይ ባይንዳ ላቸን ሚርጎታ፥ ናምኡ ጳርሾታኔ ላይሰ ኩሚዳ ታማኔ ኦይዱ ጳርሾ ላቃታ ሺሺቲ።

33 ሚርጎታራ፥ ጳርሾታራኔ ጳርሾ ላቃታራ ኢሲፌ ሸቂዛ ካላ ያርሾዛኔ ኡሻ ያርሾዛ ካሴ ዋጋን ዋጲዳ ቆዳ ማላ ያርሺቲ።

34 ናጋራ ዉርሳናስ ሸቂዛ ያርሾስ፥ ካላ ያርሾፌ፥ ኡሻ ያርሾፌኔ ጋላስ ጋላስ ሸቂ ጸጌቲዛ ያርሾፌ ሃራ ዳይሻ ኦርጌ ጉጂዱ ሺሺቲ።

35 « ሐሰቱንላ ጋላስ ኢሲ ቦላ ጎይናናስ ሸቂቲ፤ ሄ ጋላስ ኣይ ኦሶካ ኦሶፍቲ።

36 ኢስታ ቦላ ዋሶይ ባይንዳ ኢሲ ሚርጎ፥ ኢሲ ጳርሾኔ ላይሰ ኩሚዳ ላቸን ጳርሾ ላቃታ ሳዋ ቱኑ ጊዱ ጎዳ ኡፋይሲዛ ጸጌቲዛ ያርሾ ሂሰቲ ሺሺቲ።

37 ሚርጎታራ፥ ጳርሾታራኔ ጳርሾ ላቃታራ ኢሲፌ ሸቂዛ ካላ ያርሾዛኔ ኡሻ ያርሾዛ ካሴ ዋጋን ዋጲዳ ቆዳ ማላ ያርሺቲ።

38 ናጋራ ዉርሳናስ ሸቂዛ ያርሾስ፥ ካላ ያርሾፌ፥ ኡሻ ያርሾፌኔ ጋላስ ጋላስ ሸቂ ጸጌቲዛ ያርሾፌ ሃራ ዳይሻ ኦርጌ ጉጂዱ ሺሺቲ።

39 « ሐንቲስ ዋጲዳ ባኣሌ ጋላሳታን ጎዳስ ሸሺቲ፤ ሄሲዛ ኢንቲ ኣዲኔቲዱ ሸሺዛ ያርሾፌኔ ኢንቲ ኢንቲ ደሳን ሸሺዛ ያርሾፌ ጸጌቲዛ ሃራ ያርሾ፥ ካላ ያርሾ፥ ኡሻ ያርሾኔ ኢሲፌቲላ ያርሾ ሸሺቲ» ጋ።»

40 ሙሴይካ ጎዳይ ኢዛ ኣዛዚዳ ማላ ኢሰራኤሌ ኣሳስ ዮቲዴስ።

30

ኣዲና ጊሻስ ኢሜቲዳ ዋጋ

1 ሙሴይ ኢሰራኤሌ ኣሳ ካሌሊዛ ኮራፒኔታስ፥ «ጎዳይ ኣዛዚዳ ኣዛዘይ ሃይሳፌ ካሊዛይሳ፥

2 ኢሲ ኣሲ ጎዳሰ ኢሲ ሚሽ ኦፋናሰ ኣዲኔቲኮ ዋይኮ ኢሳዴይ ጫቂ ጌፒዲ ባና ባርካ ባ ቃላን ቃቺኮ ኢዚ ባ ጌሊዳ ቃላ ኡባ ፖላና ቤሴሰ ኣቲን ባ ጌዲይሳ ኣጋናሰ ቤሴና።

3 «ኢሲ ጌላኦያ ባ ኣዋ ሶን ዳሼ ጎዳሰ ኢሲ ሚሽ ኦፋናሰ ኣዲኔቲኮ ዋይኮ ጫቃ ጌፓዳ ባና ባርካ ባ ቃላን ቃቺካ ጌዲኮ።

4 ኢዚ ኣዋይ ሄሳ ሰዪዲ ኢዞ ዲጎንታ ኣገኮ ኢዛ ባ ኣዲኔቲዳይሳ ዋይኮ ባ ጫቃ ጌፒዳ ቃላዛ ፖላናሰ ቤሴሰ።

5 ኢዚ ኣዋይ ሄ ዮኦዛ ሰዪዲ ኢዞ ዲገዛ ጌዲኮ ኢዛ ኣዲኔቲዳ ኣዲናይ ዋይኮ ኢዛ ጫቃ ጌፒዳ ቃላይ ኢዚሰ ጎሜ ጌዴና፤ ጋሶይካ ኢዚ ኣዋይ ኢዞ ዲገዳ ጌሻሰ ጎዳይ ኢዞ ማራና።

6 «ኣዚና ጌሎንታ ማጫሲ ኣኬካዳ ዋይኮ ኣኬኮንታ ኣዲና ኣዲኔታ ኡታዳ ዋይኮ ጫቃ ጌፓዳ ባና ባርካ ባ ቃላን ቃቺ ዋላዳ ኣዚና ጌሊኮ።

7 ኢዛ ጌሊዳ ኣዚናዚ ሄ ዮኦዛ ሰዪዲ ኢዞ ዲጎንታ ኣገኮ ኢዛ ባ ጌዲይሳ ኡባ ፖላናሰ ቤሴሰ።

8 ኢዚ ኣዚናይ ሄ ዮኦዛ ሰዪዲ ኢዞ ዲገዛ ጌዲኮ ኢዛ ኣዲኔቲዳ ኣዲናይ ዋይኮ ኢዛ ጫቃ ጌፒዳ ቃላይ ኢዚሰ ጎሜ ጌዴና፤ ጋሶይካ ኢዚ ኣዚናይ ኢዞ ዲገዳ ጌሻሰ ጎዳይ ኢዞ ማራና።

9 «ኣዚናይ ሃይቁዳ ማጫሲ ዋይኮ ኣዚናይ ኣንጂ ዪዲዳ ማጫሲ ኢሲ ሚሽ ኦፋናሰ ኣዲኔቲኮ ዋይኮ ጫቃ ጌፓዳ ባና ባርካ ባ ቃላን ቃቺዳ ጌዲኮ ኢዛ ባ ጌሊዳ ቃላ ፖላናሰ ቤሴሰ።

10 «ኣዚና ጌሊዳ ማጫሲ ኢሲ ሚሽ ኦፋናሰ ኣዲኔቲኮ ዋይኮ ጫቃ ጌፓዳ ባና ባርካ ባ ቃላን ቃቺዳ ጌዲኮ።

11 ኢዛ ጌሊዳ ኣዚናዚ ሄ ዮኦዛ ሰዪዲ ኢዞ ዲጎንታ ኣገኮ ኢዛ ባ ጌዲይሳ ኡባ ፖላናሰ ቤሴሰ።

12 ኢዚ ኣዚናይ ሄ ዮኦዛ ሰዪዲ ኢዞ ዲገዛ ጌዲኮ ኢዛ ኣዲኔቲዳ ኣዲናይ ዋይኮ ኢዛ ጫቃ ጌፒዳ ቃላይ ኢዚሰ ጎሜ ጌዴና፤ ጋሶይካ ኢዚ ኣዚናይ ኢዞ ዲገዳ ጌሻሰ ጎዳይ ኢዞ ማራና።

13 ኢዚ ኣዚናይ ኣይ ኣዲና ዋይኮ ጫቃ ጌፓዳ ባና ባርካ ቃቺዳ ቃላ ዲጋናሰ ዋይኮ ፖሊሳናሰ ኢዛሰ ማታይ ዴሰ።

14 ኢዚ ኣዚናይ ሄ ዮኦዛ ሰዪዳ ማላ ዋንቴላ ጋላሰ ኣይኮካ ቃቶንታ ጮኡ ገኮ ኢዛ ባ ጌዲይሳ ኡባ ፖላናሰ ቤሴሰ፤ ሄ ዮኦዛ ሰዪዳ ማላ ኣይኮካ ቃቶንታ ጮኡ ገኮ ሄሲ ኢዚ ኤር ጌዲይሳ ቆንጪሴሰ።

15 ጊደ ኣቲን ኢዚ ኣዚናይ ጋምኢዲ ሄ ኢዚ ኣዲናዛ ዲጊዛ ጊዲኮ ኣላፊቲፋን ኦይሼታናይ ኢዛ» ጊደስ።

16 ጌላኦይኔ ጌሊዳ ማጫሲ ኣዲና ኣዲኔቲኮ ዋይኮ ጫቃ ጌፓዳ ባርካ ባና ባ ቃላን ቃቺዳ ጊዲኮ ኢዚ ኣዋስ ዋይኮ ኢዚ ኣዚናስ ዲዛ ኣላፊቲፋኔ ማታ ጊሻስ ጎዳይ ሙሴስ ኢሚዳ ዋጋይ ሃይሳ።

31

ሚዲያሜ ዴሬ ቦላ ዴንዲዳ ኦላ

1 ጎዳይ ሙሴስ፡

2 «ሚዲያሜ ኣሳይ ኢስራኤሌ ኣሳ ቦላ ጋሊዳ ቆሆዛ ጊሻስ ኔኒ ሚዲያሜ ኣሳ ሃሎ ኬሳ፤ ሄሳ ኦሊዳፔ ጉዬ ኔኒ ሃይቃና» ጊደስ።

3 ሄሳ ጊሻስ ሙሴይ ዴሬዛስ፡ «ሚዲያሜ ኣሳይ ጎዳ ቦላ ካሴ ኦሊዳ ቆሆዛ ጊሻስ ኢንቲ ሃሎ ኬሳናስ ኦላስ ጊጌቲቲ።

4 ኢስራኤሌ ኣሳ ዛርኬፌ ዛርኬፌ ኢሲ ኢሲ ሺ ኣቱማስ ዶሪዲ ጌዴ ኦላስ ዬዲቲ» ጊደስ።

5 ሄሳ ጊሻስ ኢስራኤሌ ዛርኬታፔ ኢሲ ኢሲ ሺ ኣስ ኬሲ ኢሚን 12,000 ኣሲ ኦላስ ጊዴቲዲ ጊጌቲዴስ።

6 ሙሴይካ ኢሲ ኢሲ ዛርኬፌ ኢሲ ኢሲ ሺ ኣሲ ቄሴ ኤልኤዜሬ ና ፊኒሃሴ ካሌፉን ኦላስ ዬዲዴስ፤ ፊኒሃሲካ ጌሻሶዛፔ ዲማ ሚሻታኔ ኦላስ ዴንፌሊዛ ዛዬታ ባ ኩሼን ኦይኪዲ ቢዴስ።

7 ኢስቲካ ጎዳይ ሙሴ ኣዛዚዳ ማላ ሚዲያሜ ኣሳ ኦሊዲ ኣቱማሳ ሙሊራ ዋዲዳ።

8 ሃይቀዳይታ ጊደን ሚዲያሜ ካዋ ኢቻሻቲ ኤዋይ፡ ኤሬቀሚይ፡ ጸሬይ፡ ኡሬይኔ ኤሬባኤይ ዴቲስ፤ ቢኦሬ ና ባላሚካ ማሻን ዋዲዳ።

9 ኢስራኤሌ ኣሳይ ሚዲያሜ ማጫሳታኔ ጉላ ናይታ ዲኢዲ ኢስታ ሚሄታኔ ኢስታ ኣቆታ ኡባ ፒቲ ኤኪዴስ።

10 ኢስቲ ዲዛ ካታማታኔ ኢስቲ ዲዛ ጉታታ ኡባ ታማን ጸጊዳ።

11 ኢስታ ኣሳ፡ ሚሃኔ ዲኢዳ ሚሽ ኡባ ኤኪዳ።

12 ዮርዳኖሴ ሻፋፔ ሄ ፒንፋ ጊናራ ዲዛ ሞኣቤ ዴምባን ዲንካኒ ኡቲዳ ሙሴኮ፡ ቄሴ ኤልኤዜሬኮኔ ኩሚፋ ኢስራኤሌ ማባራኮ ኤሂዳ።

13 ሙሴይ ቄሴ ኤልኤዘሬይን ማባራ ካሌሊዛይቲ ኦላ አሳ ሞካናሰ ጌዴ ኬዚዳ።

14 ሙሴይ ጌዲኮ ኦላሶፔ ሃ ሲሚዛ ኦላ አሳ አዛዚዛ ሻላቃታ ቦላን ማቶ ሃላቃታ ቦላ ሃንቄቲዴሰ።

15 ኢዚካ ኢሰታስ፥ «ሃይሳ ማጫሰ ኡባ አዛሰ ዋዶንታ ሼምፖራ ፓጻ አገዴቲ?

16 ኑኒ ካሴ ፔኦሬን ዲሺን ሃይቲ ባላሜ ዞሬ ኤኪዲ ኢሰራኤሌ አሳይ ባ ጎዳፔ ሃካና ማላን ቦሻን ወራና ማላ ኦሊዳይ ኢሰታ ጌዴቲ።

17 ሄሳ ገሻሰ አቱማ ናይታ ኡባኔ አዴራ ጋይቲዳ ማጫሳታ ኡባ ዋዶቲ።

18 ጌዶ አቲን አዴራ ጋይቲ ኤሮንታ ጌላኦታ ዋዶንታ ኢንቴሰ አሺፔ።

19 «ኢንቴ ጋርሳን አሰ ዋዶዳዴይ ዋይኮ አሃ ቦቺዳ አሲ ወሪካ ላፑን ጋላሰ ጋካናሰ አሲ ዲዛሶፔ ሃራሶን ጋምኦ፤ ሄቫንሳ ጋላሲኔ ላፑንሳ ጋላሰ ኢንቴናኔ ኢንቴ ዲኢ ኤሂዳ ማጫሳታ ጌሺፔ።

20 ሄሳፉካ አይ ማይኦ ዋይኮ ጋልባፌ፥ ዴይሻ ኢሰኬፌኔ ማላፌ ኦሴቲዳ ሚሽ ኡባ ጌሺፔ» ጌዴሰ።

21 ቄሴ ኤልኤዘሬይ ኦላፔ ሲሚዳ አቱማሳሰ፥ «ጎዳይ ሙሴሰ አሚዳ ዋጋቲ ሃይሳፌ ካሊዛይታ፤

22 ዋርቃይ፥ ቢራይ፥ ጳርቄማላይ፥ ቢራታይ፥ ቆርቆሮይኔ ኢርሳሴይ፤

23 ሄሳፉካ ታማይ ኢሰታ ቆሆንታይቲ ታማ ጌዶራ አዲዲ ጌያናሰ ቤሴሰ፤ ታማ ዳንዳዮንታ አይ ሚሺካ ካሴ ዋዶዳ ዋጋ ማላ ጌሾሰ ገጌቲዳ ሃላን ጌሺፔ።

24 ኢንቴ ኢንቴ ማይኦ ላፑንሳ ጋላሰ ሜጪፔ፤ ሄሳፌ ጉዬ ኢንቴ ጌሽ ጌዲዛ ገሻሰ ሲሚዲ ካሴ ኢንቴ ዳንካኒ ዲዛሶ ጌላናሰ ዳንዳዬታ» ጌዴሰ።

ዲኢ ኤሂዳይሳ ጌሺፔላ

25 ጎዳይ ሙሴሰ ሂዝጌዴሰ፤

26 «ኔኒ ቄሴ ኤልኤዘሬይኔ ዴራ ካሌሊዛ ኮራፒኔታራ ጌዲዲ ዲኤቲ ዩዳ አሳኔ ሜሃ ቆዲፔ።

27 ናምኡ ኬሲ ሻኪዲ ባጋ ኦላሶ ቢዳ ዋታዳራታሰ አቶይሳ ሃንኮ ማባራሰ አሚፔ።

28 ዋታዳራታ ገሻፔ ዲኤቲዳ አሳፔ፥ ሚዛታፔ፥ ሃሬታፔ ዶርሳታፔኔ ዴይሻታፔ ኢቻሹ ጴታፔ ኢሲኖ ታሰ ጎዳሰ ዱማ አሞታ ሂሰቲ ሻኪፔ።

29 ሄ አንቲ ታስ ጎዳስ ሻኪዳይሳ ታ ጊሻዛ ቄሴ ኤልኤዘሬስ አሟቱ።

30 ሂንኮ ማባራስ አሟቲዳ ጊሻፔ፥ ኣሳፔ፥ ሚዛፔ፥ ዶርሳታፔ፥ ዴይሻታፔ፥ ሃሬታፔ ኢቻሽ ታማፌ ኢሲኖ ጋይቶቴላ ዱንካኔን ኣላፌቴላን ኦሊዛ ለዌታስ አሟቱ።»

31 ሙሴይኔ ኤልኤዘሬይ ጎዳይ ኢስታ ኣዛዚዳይሳ ኡባ ኦሊዳ።

32 ዋታዳራቲ ባንታስ ኤኪሺን ኣቲዳይሲ፥ 675,000 ዶርሳታኔ ዴይሻታ፥

33 ላፑን ታማኔ ናምኡ ሺ ሚዛታ፥

34 ኡሱፑን ታማኔ ኢሲ ሺ ሃሬታ፥

35 ሄሹ ታማኔ ናምኡ ሺ ኣዴ ኤርንታ ጌላኦታ።

36 ዲኤቲ ዩዳይሳፌ ባጋይ ኦሌቲ ዩዳይታስ አሟቲዳስ፤ ሄሲካ 337,500 ዶርሳታ።

37 ኢስታፌ 675 ጎዳስ ዱማ አሞታ ጌቲቲ ሻኬቲዳይታ።

38 ሚዛቲ 36,000፤ ኢስታፌ ጎዳስ ዱማ አሞታ ጌዲ ሻኬቲዳይቲ ላፑን ታማኔ ናምኡ።

39 ሃሬቲ 30,500፤ ኢስታፌ ጎዳስ ዱማ አሞታ ጌዲ ሻኬቲዳይቲ ኡሱፑና።

40 ኣዴ ኤርንታ ጌላኦቲ 16,000፤ ኢስታፌ ጎዳስ ዱማ አሞታ ጌዲዲ ሻኬቲዳይቲ ሄሹ ታማኔ ናምኡ።

41 ሄሳ ጊሻስ ሙሴይ ጎዳይ ኢዛ ኣዛዚዳ ማላ ጎዳስ ዱማ አሞታ ሂስቲ ሻኪዳይሳ ቄሴ ኤልኤዘሬስ አሟደስ።

42 ሃንኮ ኢስራኤሌ ማባራ ጊሻይ ኦላስ ኪቴቲዳ ዋታዳራታ ጊሻራ ኢሲ ጌና።

43 ሄሲካ 337,500 ዶርሳታኔ ዴይሻታ፥

44 ሄሹ ታማኔ ኡሱፑን ሺ ሚዛታ፥

45 ሄሹ ታሙ ሺያኔ ኢቻሹ ጾቱ ሃሬታ፥

46 ታማኔ ኡሱፑን ሺ ኣዴ ኤርንታ ጌላኦታ።

47 ሄሳ ጊሻስ ሙሴይ ኢቻሽ ታማፌ ኢሲኖ ጎዳይ ኢዛ ኣዛዚዳ ማላ ጋይቶቴላ ዱንካኔን ኣላፌቴላን ኦሊዛ ለዌ ዛርኬታስ አሟደስ።

48 ሄሳፌ ጉዬ ኦላ ኣሳ ኣዛዚዳይቲ ሻላቃቲኔ ማቶ ሃላቃቲ ሙሴኮ ሺቂዳ፥

49 «ኦኒ ኔ ኦሳንቻቲ ኑፔ ጋርሳራ ኣዛዘቲዛ ዋታዳራታ ኡባ ቆዲደስ፤ ኢስታፌ ኢሶይካ ፓጪቤና፤

50 ሄሳ ጊሻስ ኑኒ ኢሶይ ኢሶይ ኤኪዳ ዋርቃ አሌቆታ፥ ቶሆ ገሞታ፥ ኩሼ ሳጋዮታ፥ ቢራዴ ሚዲጋታ፥ ሃይላ ጉቲቻታ፥ ቆዴን አዲዛ ማጨፋራታ ኡባ ኑ ናጋራ ወርሳናስ ጎዳስ ያርሾ አማናስ ኤኪ ዪደስ» ጊዳ። *

51 ሙሴይን ቄሴ ኤልኤዜሬይ ዋርቃፊ ኦሴቲዳ አሌቆታ ኡባ ኤኪዳ።

52 ሻላቃታፔኔ ማቶ ሃላቃታፔ ኤኪዳ ሙሴይን ቄሴ ኤልኤዜሬይ ጎዳስ አሞታ ሂስቲ ሺሺዳ ዋርቃ አሌቆቲ 16,750 ሳቂሌ ጊዲዳስ። †

53 ጋርሳራ ዲዛ ዎታዳራቲ ጊዲኮ ባ ዲኢዳይሳ ባስ ባስ ኤኪ ቢዳ።

54 ሄሳ ጊሻስ ሙሴይን ቄሴ ኤልኤዜሬይ ሻላቃታፔኔ ማቶ ሃላቃታፔ ኤኪዳ ዋርቃ አሌቆታ ጎዳ ሲንሳን ኢስራኤሌ ዳራ ሃሳኢሳና ማላ ጌዴ ጋይቶቲላ ዲንካኔዛኮ ኤኪ ቢዳ።

32

ዮርዳኖሴ ሻፋፔ ኣርሼይ ሞኪዛ ባጋራ ዲዛ ዛርኬታ
(ዛሬ 3:12-22)

1 ኦርቤሌ ዛርኬታሲኔ ጋዴ ዛርኬታስ ኬሂ ዳሮ ሜሄይ ዳስ፤ ኢያዜሬ ዳሬይን ጋላኣዴ ዳሬይ ሜሄስ ዳሮ ሎኦ ጊዲዳይሳ ቤይዳ።

2 ሄሳ ጊሻስ ኢስቲ ሙሴኮ፥ ቄሴ ኤልኤዜሬኮኔ ሃንኮ ማባራ ካሌሊዛይታኮ ቢዳ።

3-4 «ጎዳይ ኢስራኤሌ አሳን ጸኒሲዳ አጻሮቲ ዳሬይ፥ ዲቦኔ ዳሬይ፥ ኢያዜሬ ዳሬይ፥ ኒሞራ ዳሬይ፥ ሃሴቦኔ ዳሬይ፥ ኤልኤሌ ዳሬይ፥ ሲቢማ ዳሬይ፥ ኔቦ ዳሬይን ባኦኔ ዳሬይ ሜሄስ ሎኦ፤ ኑስካ ዳሮ ሜሄይ ዳስ።

5 ኢንቴ ኑስ ሎኦ ቆፒኮ ሃይሳ ሃ ዳሬዛ ኑስ ኢንቴ ኦሳንቻታስ ዳናሶ ሂስቲ አሚቲ ኣቲን ኑኒ ዮርዳኖሴ ፒናና ማላ ኦፋፍቲ» ጊዳ።

6 ሙሴይካ ኢስታስ፥ «ኢንቴ ኢሻቲ ኦላስ ቢሺን ኢንቴ ሃን ኣታናስ ኮዬቲ?

* 31:50 ማጨፋራ ጌቲተዛይሲ ቤኒ ዋዴ ማጫሳቲ ሴሎስ ቆዴን አሊ ማይኢዛ ቢራፔ፥ ዋርቃፊ፥ ጻርቂማላፔኔ ዴማ ዴማ ሚሻታፔ ኦሴቲዳ አሌቆ ሚሻ። † 31:52 16,750 ሳቂሌ ጊዛይሲ ኪሎን ሚዛኔቲሺን 200 ኪሎ ጊራሚ ጊዳና።

7 ኢስራኤል አሳይ ዮርዳኖሴ ፒኒዲ ጎዳይ ኢስታሰ አሚዳ ዴሬዛ ጌሎንታ ማላ ኢንቲ አሳ ሂደታ አዛሰ ቃንጸሴቲ?

8 ሃኖ ቢታዮ ጸሞሳና ማላ ቃዴሴ ባሪኔፔ ታኒ ካሴ ኢንቲ አዋታ ዬዲን ሃይሳሶካ ኦሊዳ።

9 ኢስቲ ኤሽኮሌ ሾባ ጋካናሰ ቢዲ ሄ ቢታዮ ጸሞሴ ጼሊዳ፤ ጊዶ ኣቲን ሄፔ ሰሚዲ ኢስራኤል አሳይ ጎዳይ ኢስታሰ አሚዳ ዴሬዛ ጌሎንታ ማላ ሂደታ ቃንጸሴዳ።

10-11 ሄ ጋላሰ ጎዳይ ኬሂ ሃንቄቲዲ፥ «ኢስቲ ኩሜላ ዋዚናፔ ታና ካሎንታ ኢጲዳ ጊሻሰ ጊብጾፔ ኬዚዳ አሳፔ ላይላይ ናሞኡ ታሙ ኩሚዳይቲኔ ሄሳፌ ቦላራ ጊዲዳይቲ ኡባይ ታኒ ኣብራሃሜሰ፥ ዩሳቃሲኔ ያቆቤሰ አማና ጋዳ ካሴ ጫቂዳ ቢታ ኢስቲ ሙሊካ ጌሎንታ ማላ ጫቃዲሰን ጊዴሰ።

12 ሃይሴ ጎዳይ ጫቂ ቃቺዳ ቃላዚ ጎዳ ኩሜላ ዋዚናፔ ካሊዳ ቄናዜ ዴሬ አሰ ዮፊኔ ና ካሌቤፔኔ ናዌ ና ኢያሶፔ ኣቲን ሃንኮ አሳ ኡባካ ቦቹሰ።

13 ጎዳይ ኢስራኤል ዴሬዛ ቦላ ሃንቄቲዳ ጊሻሰ ሄ ኢዛ ሃንቄሊዳ ዬሌታቲ ኡባይ ዉራና ጋካናሰ ኢስቲ ባዘ ቢታን ኦይዱ ታሙ ላይሳ ቶይላታና ማላ ኦሊዴሰ።

14 ኢንቲኖ ናጋራንቻ ዬሌታቶ! ጎዳይ ኢስራኤል ዴሬ ቦላ ጉጂ ሃንቄታና ማላ ሃኢካ ኢንቲ ኢንቲ አዋታዶ ኦሌታ።

15 ኢንቲ ኦርቤሌ ዛርኬቲኔ ጋዴ ዛርኬቲ ጎዳ ካሎንታ ኢጲኮ ኢዚ ሃ ዴራ ኡባ ባዘን ኣጋጋና፤ ኢስታ ቦላ ጋኪዛ ሜቶ ኡባን ኢንቲ ኦይሼታና» ጊዴሰ።

16 ኢስቲካ ሙሴኮ ሸቂዲ፥ «ኦኒ ኑ ሜሄታሰ አቆሶ፥ ኑ ማቹታሲኔ ኑ ናይታሰ ዱሳሶ ኦላና ኮዮሰ።

17 ጊዶ ኣቲን ኑ ባጋ ኢስራኤል አሳይ ባሰ ዱሳሶ ጊዲዳ ቢታዮ ጌሊዲ ኡታና ጋካናሰ ኑ ኡባፌ ሲንላቲ ኦላሰ ኬዛናሰ ጊኔቲ ኡቲዶሰ፤ ኦኒ ሄሳ ፖሊዲ ሲማና ጋካናሰ ኑ ናይቲኔ ኑ ማቹቲ ሃይሳ ሃ ዴሬዛን ዲዛ አሳፔ ኢስታ ቦላ ቆሆይ ጋኮንታ ማላ ገሞቤቲዳ ካታማን ሂርጋይ ባይንዳ ዲሼቶ።

18 ኢስራኤል አሳይ ኡባይ ባሰ ባሰ ጊጌቲዳ ቢታ ኤካና ጋካናሰ ኦኒ ኦሶ ሲሞኮ።

19 ኦኒ ኑ ጊሻ ዮርዳኖሴፔ ኣርሼይ ሞኪዛ ባጋራ ኤኪዳ ጊሻሰ ፒንላፌ ኢስታ ጋኪዛ ጊሻፔ ኑ ኣይኮካ ኤኮኮ» ጊዳ።

20 ሙሴይካ ኢስታሰ፥ «ሃይሴ ኢንቲ ጊዳይሴ ቱሙ ጊዲኮ ኢንቲ ጎዳ ሲንላን ኦላ ባናሰ ኢንቲ ጊጌቲዳ ጊዲኮ።

21 ቃሴካ ጎዳይ ባ ሞርኬታ ባ ሲንፋፌ ዩዳሊ ኬሳና ጋካናሰ
ኢንቲ ኡባቲካ ጎዳ ሲንፋን ኦላሰ ገገቲዳይታ ገዲዲ ዮርዳኖሴ
ሻፋ ፒኒኮ፡

22 ቢታያካ ጎዳሰ ሃሬቲዳፔ ጉዬ ኢንቲ ሲማና ዳንዳይታ፤ ሄ
ዎዴ ኢንቲ ጎዳሲኔ ኢሰራኤል ኣሳሰ ኦፋናሰ ቤሲዛ ኣላፊቴሐ
ፖሊዳፔ ጉዬ ሃራ ኣይኮካ ኦይሼቲኬታ፤ ሄሳፌ ጉዬ ሃ ቢታያ
ኢንቲሰ ጸንጾ ገዲና።

23 «ኢንቲ ኢንቲ ገዲ ቃላ ናጎንታ ኣገኮ ኢንቲ ጎዳ ቆሄታ፤
ኢንቲ ናጋራ ገሻሰ ቁጻቴይ ኢንቲ ቦላ ጋካናይሳ ኤሪቴ።

24 ሄሳ ገሻሰ ኢንቲ ማቹታሲኔ ኢንቲ ናይታሰ ዱሳሶ፡ ኢንቲ
ሜሄታሰካ ኣቆሶ ኦሊቲ፤ ኢንቲ ጫቆ ጌሊዳ ቃላካ ፖሊቲ» ገዴሰ።

25 ጋዴ ዛርኬቲኔ ኦርቤሌ ዛርኬቲ ሙሴሰ፡ «ኦኒ ኔ ኦሳንቻቲ
ኔኒ ኦ ጎዳይ ኦና ኣዛዚዳይሳ ኦ ኦፋና።

26 ኦ ማቹቲ፡ ኦ ናይቲኔ ኦ ሜሄቲ ሃይሳን ጋላኣዴ ካታማታን
ጋሞኤቶ።

27 ገዴ ኣቲን ኦኒ ኔ ኦሳንቻቲ ኦላ ኦሌታናሰ ገጸቲዳይቲ
ወሪካ ጎዳ ሲንፋን ኦሌታናሰ ኦ ጎዳይ ኔኒ ኦና ኣዛዚዛ ማላ
ጌዴ ሄ ፒንሐ ኦ ፒናና» ገዴ።

28 ሄሳ ገሻሰ ሙሴይ ቁሴ ኤልኤዜሬሰ፡ ናዌ ና ኢያሶሲኔ
ኢሰራኤል ማባራ ካሌሊዛ ኮራፒኔታሰ ኢሰታ ገሻሰ፡

29 «ጋዴ ዛርኬቲኔ ኦርቤሌ ዛርኬቲ ዮርዳኖሴ ፒኒዲ ጎዳ
ሲንፋን ኦላሰ ገገቲዲ ኢሰቲ ኢንቲና ማዲን ቢታያ ኢንቲ ኩሼን
ጌሊዛ ዎዴ ጋላኣዴ ኢንቲ ኢሰታሰ ጸንጾ ሂሰቲ ኢሚቲ።

30 ኢሰቲ ኢንቲናራ ዮርዳኖሴ ሻፋ ፒኒ ቢዲ ኦሌቶንታ ኣገኮ
ኢሰቲካ ኢንቲናራ ኢሲፌ ካናኔፔ ገሼቲ ኤኬቶ» ገዴሰ።

31 ጋዴ ዛርኬቲኔ ኦርቤሌ ዛርኬቲ፡ «ኦኒ ኔ ኦሳንቻቲ ጎዳይ
ኦና ኣዛዚዳይሳ ኡባ ኦፋና።

32 ኦ ኦላሰ ጎዳ ሲንሐ ጌዴ ካናኔ ፒናና፤ ኦ ላታና ቢታይ
ገዲኮ ዮርዳኖሴ ሻፋፔ ሃ ፒንፋን ኣርሼይ ሞኪዛ ባጋና» ገ
ዛሪዳ።

33 ሄሳ ገሻሰ ሙሴይ ኣሞሬ ዴሬ ካዎ ሲሆኔይ ሃሪዛ ዴሬታኔ
ባሳኔ ዴሬ ካዎ ኣጌይ ሃሪዛ ዴሬን ዲዛ ካታማታ፡ ኢሰታ ዩሹን
ዲዛ ካታማታኔ ዴሬታ ኡባ ኦርቤሌ ቆሞታሰ፡ ጋዴ ቆሞታሲኔ
ሚናሴ ቆሞታፔ ባጋይታሰ ኢሚዴሰ።

34 ጋዴ ቆሞቲ፡ ዲቦኔ፡ ኣጸሮቲ፡ ኣሮኤሬ፡

35 ኣጸሮቲ-ሶፋኔ፡ ኢያዜሬ፡ ዮጊባሃ፡

- 36 ቤተ-ኒሚሬኔኔ ቤተ-ሃራኔ ዩዩ ኣቋናሰ ገምቤ ገምቤዳ፤ ባ ማህታሰካ ኣቆሶ ኬጺዳ።
- 37 ኦርቤሌ ዛርኬቲ ሃሴቦኔ፥ ኤልኤሌ፥ ቂሪያታይማ ካታማታ ዛሪ ገምቤዳ።
- 38 ሄሳልካ ጉዬፔ ኢስታሰ ሱንላይ ላማቲዳ ኔቦ፥ ባኣሊ-ሜኦኔኔ ሴባማ ካታማታ ዛሪ ገምቤዳ፤ ሄ ካታማታ ኡባታሰ ኦራፋ ሱንላ ሱንላዳ።
- 39 ሚናሴ ና ማኪሬ ዜሬፋቲ ጋላኣዴ ኦሊ ኦይኪዲ ካሴ ሄን ዲዛ ኣሞሬ ኣሳታ ዬዴሊ ኬሲዳ።
- 40 ሄሳ ገሻሰ ሙሴይ ጋላኣዴ ዴሬ ሚናሴ ና ማኪሬ ዜሬፋታሰ ኢሚዴሰ፤ ኢስቲካ ባንታሰ ሄን ዲሳሶ ኦሊዳ።
- 41 ሚናሴ ዛርኬፌ ገዲዳ ያኢሬይ ኢሲ ኢሲ ጉታታን ማቶ ጋሊዲ ባሰ ኤኪዴሰ፤ ኢስቲካ፡ «ሃቦት-ያኢሬ»* ገ ሱንላዴሰ።
- 42 ኖባሄይ ቃሴ ቁናቴኔ ኢዛ ዩሾን ዲዛ ጉታታ ኦሊ ኦይኪዲ ባ ሱንላን፥ «ኖባሄ» ገ ሱንላዴሰ።

33

ኢስራኤል ኣሳይ ገብጾፔ ሞኣቤ ጋካናሰ ቢዳ ታሪኽ

- 1 ኢስራኤል ኣሳይ ባ ዛርኬን ዛርኬን ሻኬቲ ሻኬቲ ሙሴይኔ ኣሮኔይ ካሌሊን ገብጾፔ ኬዚዳፔ ጉዬ ዲማ ዲማ ዎዴ ኢስቲ ዲንካኒ ኡቲዳሶሆቲ ሃይሳፌ ካሊዛይታ፤
- 2 ኢስቲ ዲማ ዲማ ዎዴ ዲንካኒ ኡቲዳሶሆታ ሱንላ ጎዳይ ኣዛዚዳ ማላ ሙሴይ ጸፊዴሰ።
- 3 ኢስራኤል ኣሳይ ኮይሮ ኣገናይ ጌሊዳ 15 ጋላሰ ፓዚጋ ባኣሊፔ ዎንቴሰ ገብጾ ኣሳይ ኡባይ ኢስቲ ጸሊሺን ያዮንታ ኤራሚሴ ካታማ ዩጊ ኬዚዴሰ።
- 4 ሄ ዎዴ ገብጾ ኣሳይ ኢስታ ገደፌ ጎዳ ቦሻን ሃይቂዳ ባይራታ ባይራታ ሞጎን ዴቴሰ፤ ሄ ዎዴ ጎዳይ ኢስታ ኤቃ ጸሳታ ቦላካ ፒርዲዴሰ።
- 5 ኢስራኤል ኣሳይ ኤራሚሴፔ ዴንዲ ቢዲ ሱኮቴን ዲንካኒ ኡቲዴሰ።
- 6 ሱኮቴፔ ዴንዲዲ ባዞ ጋጸ ቦላ ዲዛ ኤታሚን ዲንካኒ ኡቲዴሰ።
- 7 ኤታሚፔ ዴንዲዲ ባኣሊ-ጸፎኔፔ ኣርሼይ ሞኪዛ ባጋራ ዲዛ ፒሃሂርቴ ሲሚዲ ሚገደሌ ሄራን ዲንካኒ ኡቲዴሰ።

* 32:41 ሃቦት-ያኢሬ፡ ሃቦት-ያኢሬ ጉሲ ያኢሬ ጉታታ ጉሳ።

- 8 ፒሃሂሮቲፔ ዴንዲዲ ዞኦ ኣባ ፒኒዲ ኤታሜ ባዞ ቢዴሰ፤
ኤታሜ ባዞን ሄዡ ጋላሰ ጋካናሰ ቢዲ ማራ ጋኪ ዴንካኒዴሰ፤
- 9 ማራፔ ዴንዲዲ ታማኔ ናሞኡ ሃላ ፑልቶቲኔ ላፑን ታሙ
ታሚሬ ሚላቲ ዲዛሶ ኤላሜ ጋኪ ዴንካኒ ኡቲዴሰ።
- 10 ኤላሜፔ ዴንዲዲ ዞኦ ኣባ ማታን ዴንካኒ ኡቲዴሰ።
- 11 ዞኦ ኣባ ማታፔ ዴንዲዲ ሲና ባዞን ዴንካኒ ኡቲዴሰ።
- 12 ሲና ባዞሬ ዴንዲዲ ዱፊቃን ዴንካኒ ኡቲዴሰ።
- 13 ዱፊቃፔ ዴንዲዲ ኣሉሼን ዴንካኒ ኡቲዴሰ።
- 14 ኣሉሼፔ ዴንዲዲ ኡሻ ሃሊ ባይንዳሶን ኤራፊዲሜን
ዴንካኒ ኡቲዴሰ።
- 15 ኤራፊዲሜፔ ዴንዲዲ ሲና ባዞን ዴንካኒ ኡቲዴሰ።
- 16 ሲና ባዞሬ ዴንዲዲ ኪብሮቲ-ሃታኣቤን ዴንካኒ ኡቲዴሰ።
- 17 ኪብሮቲ-ሃታኣቤፔ ዴንዲዲ ሃጺሮቲን ዴንካኒ ኡቲዴሰ።
- 18 ሃጺሮቲፔ ዴንዲዲ ኤሬቲማን ዴንካኒ ኡቲዴሰ።
- 19 ኤሬቲማፔ ዴንዲዲ ኤሬሞን-ፔሬዜን ዴንካኒ ኡቲዴሰ።
- 20 ኤሬሞን-ፔሬዜፔ ዴንዲዲ ሊቢናን ዴንካኒ ኡቲዴሰ።
- 21 ሊቢናፔ ዴንዲዲ ኤሪሳን ዴንካኒ ኡቲዴሰ።
- 22 ኤርሳፔ ዴንዲዲ ቃሃላቲን ዴንካኒ ኡቲዴሰ።
- 23 ቃሃላቲፔ ዴንዲዲ ሼፌሬ ዙማን ዴንካኒ ኡቲዴሰ።
- 24 ሼፌሬ ዙማፔ ዴንዲዲ ሃራዳን ዴንካኒ ኡቲዴሰ።
- 25 ሃራዳፔ ዴንዲዲ ማቂሃሎቲን ዴንካኒ ኡቲዴሰ።
- 26 ማሃሎቲፔ ዴንዲዲ ታሃቲን ዴንካኒ ኡቲዴሰ።
- 27 ታሃቲፔ ዴንዲዲ ታራን ዴንካኒ ኡቲዴሰ።
- 28 ታራፔ ዴንዲዲ ሚቲቃን ዴንካኒ ኡቲዴሰ።
- 29 ሚቲቃፔ ዴንዲዲ ሃሼሞኔን ዴንካኒ ኡቲዴሰ።
- 30 ሃሼሞኔፔ ዴንዲዲ ሞሴሮቲን ዴንካኒ ኡቲዴሰ።
- 31 ሞሴሮቲፔ ዴንዲዲ ቤኒ ያቂኔን ዴንካኒ ኡቲዴሰ።
- 32 ቤኒ ያቂኔፔ ዴንዲዲ ሆራ-ሃጊዲጋን ዴንካኒ ኡቲዴሰ።
- 33 ሆራ-ሃጊዲጋፔ ዴንዲዲ ዮጵባቲን ዴንካኒ ኡቲዴሰ።
- 34 ዮጵባቲፔ ዴንዲዲ ኣብሮኔን ዴንካኒ ኡቲዴሰ።
- 35 ኣብሮኔፔ ዴንዲዲ ኤጲዮን-ጋቢሬን ዴንካኒ ኡቲዴሰ።
- 36 ኤጲዮን-ጋቢሬፔ ዴንዲዲ ጲኔ ባዞን ዲዛ ቃዴሴን ዴንካኒ
ኡቲዴሰ።
- 37 ቃዴሴፔ ዴንዲዲ ኤዶሜ ዴሬ ጳሳን ዲዛ ሆሬ ዙማን
ዴንካኒ ኡቲዴሰ።
- 38 ቄሴ ኣሮኔይ ጎዳ ኣዛዞን ፑዴ ሆሬ ዙማ ቦላ ኬዚዴሰ፤
ሄን ኢሰራኤሌ ኣሳይ ጊብጾፔ ኬዚዳ ኦይዱ ታማንላ ላይላን

ኢቻሻንሉ ኣገናይ ጸሪዳ ኮይሮ ጋላስ ሃይቂዳስ።

³⁹ ኣሮኔይ ሆሬ ዙማ ቦላ ሃይቂዳ ዋዴ ኢዛ ላይላይ ጸታኔ ናምኡ ታማኔ ሄሻ።

⁴⁰ ካናኔ ቢታን ኔጌቤን ዲዛ ካናኔ ኣስ ኣራዴ ካዎይ ኢስራኤሌ ኣሳይ ዪዛይሳ ሲዪዳስ።

⁴¹ ዴሬዚካ ሆሬ ዙማፔ ዴንዲዲ ጸለሞናን ዲንካኒ ኡቲዳ።

⁴² ጸለሞናፔ ዴንዲዲ ፓኖኔን ዲንካኒ ኡቲዳስ።

⁴³ ፓኖፔፔ ዴንዲዲ ኦቦቴን ዲንካኒ ኡቲዳስ።

⁴⁴ ኦቦቴፔ ዴንዲዲ ሞኣቤ ቆሳን ዲዛ ኢዬ-ኣባሪሜን ዲንካኒ ኡቲዳስ።

⁴⁵ ኢዬ-ኣባሪሜፔ ዴንዲዲ ዲቦን-ጋዴን ዲንካኒ ኡቲዳስ።

⁴⁶ ዲቦን-ጋዴፔ ዴንዲዲ ኣልሞን-ዲቢላታዬን ዲንካኒ ኡቲዳስ።

⁴⁷ ኣልሞን-ዲቢላታዬፔ ዴንዲ ኔቦ ማታን ዲዛ ኣባሪሜ ዙማታ ቦላ ዴንካኒ ኡቲዳስ።

⁴⁸ ኣባሪሜ ዙማታፔ ዴንዲዲ ኢያርኮፌ ዮርዳኖሴ ፒንላን ዲዛ ሞኣቤ ዴምባን ዲንካኒ ኡቲዳስ።

⁴⁹ ሄን ዮርዳኖሴ ማታን ሞኣቤ ዴምባን ቤቲ-ያሺሞቴፔ ቢዲ ኣቤሊ-ሹቲሜ ጋካናስ ዲንካኒ ኡቲዳስ።

ዮርዳኖሴ ፒኒዲ ኦላናስ ቤሲዛ ዎጋ

⁵⁰ ኢያርኮ ገናራ ዮርዳኖሴ ፒንላን ሞኣቤ ዴምባን ኢስቲ ዲሺን ኢስራኤሌ ዴሬዛስ ዮታና ማላ ጎዳይ ሙሴስ ሃይሳፌ ካሊዛ ዎጋ ኢሚዳስ።

⁵¹ ኔኒ ኢስራኤሌ ኣሳስ፥ «ኢንቴ ካናኔ ዴሬ ጌላናስ ዮርዳኖሴ ፒኒዛ ዎዴ፥

⁵² ሄ ቢታን ዲዛ ኣሳ ኡባ ኢንቴ ሲንላፌ ጎዲ ኬሲቴ፤ ሹቻፌኔ ቢራታፔ ኦሴቲዳ ኢስታ ኤቃ ጸሳታ ሜንፌሬሊ ዬጌቴ፤ ሄሳሶካ ቆቃሶሆታን ዲዛ ኢስቲ ጎይኒዛሶታካ ላሊቴ።

⁵³ ታኒ ሄ ቢታዮ ኢንቴስ ኢሚዳ ጊሻስ ላቲዲ ኢንቴ ኢዚን ዲቴ።

⁵⁴ ቢታዮ ኢንቴ ዛርኬን ዛርኬን ጊሼቲ ኤኪቴ፤ ቆዳን ዳሪዛ ዛርኬስ ዳልጋ ጋዴ ኢሚቴ፤ ቆዳን ጉጺዛ ዛርኬታስ ጽንላ ጋዴ ኢሚቴ፤ ኢሶይ ኢሶይ ባ ዛርኬን ዛርኬን ቢታዮ ኣይ ጊዲንካ ሳማይ ጋሊዳ ማላ ባስ ላታ ጋዴ ሂስቲ ኤኮ።

⁵⁵ «ካሴ ሄ ቢታን ዲዛ ኣሳታ ኡባ ጎዲ ኬሶንታ ኢስታፌ ሻኪ ኣሺኮ ኢስቲ ኢንቴ ኣይፌ ጫዲ ቶይሲዛ ፒልቁ ማላ ጊዳና፤

ሚሊ ጫዲዛ አገንጣ ማላ ጊዲዲ ኢስቲ ኢንቴና ዋዩሳና፤ ኢንቴ ዲዛ ዴሬዛን ኢስቲ ኡባ ዋዴ ኦላ ዴንላ ዴንላ ኢንቴና ማቶላና።
 56 ኢንቴ ሄሳሶ ኦሶንታ አገሪ ታኒ ኢስታ ዳይሳና ጋ ቆፖይሳ ኢንቴ ቦላ ዛራ ፖላና» ጊዴስ።

34

ካናኔ ዴሬ ዩሾን ዲዛ ዴሬታ

- 1 ጎዳይ ሙሴስ ሂዝጊዴስ፤
- 2 «ኢስራኤል አሳ፡ ታኒ ኢንቴስ ኢሚዛ ካናኔ ቢታዮ ኢንቴ ቢዲ ጌሊዛ ዋዴ ኢዚ ዩሾን ዲዛ ዴሬቲ ሃይሳፌ ካሊዛይታ፤
- 3 ዴጌሃ ባጋራ ጸኔ ባዞፌ ዴንዲዲ ኤዶሜ ባዞ አቻራ ካንላ ቢዲ አርሼይ ሞኪዛ ባጋራ ሃይቆ አባፌ ዴጌሃ ባጋ ጸራ ቦላራ ደሚዲ፤
- 4 አቅራቢሜ ፑርዴራ ካንላ አዲዲ ጸኔ ጋኪዲ ዴጌሃ ባጋራ ቃዴሴ ባሪኔ ጋኬስ፤ ሄሳፌ ሃጸራ-አዳሬ ካንላዲ አጸሞኔ ጋኬስ።
- 5 አጸሞኔፔ ዶሚዲ ሃላ ባይንዳ ጊብጾ ሻፋታራ ዩዩ አዲዲ ሜዲቴራኔ አባን ኤቄስ።
- 6 « አርሼይ ወሊዛ ባጋራ ሜዲቴራኔ አባይ ዛዋ ጊዳና።
- 7 « ፑዴሃ ባጋራ ዲዛ ዛዋይ ሜዲቴራኔ አባፌ ቢዲ ኡሬ ዙማ ጋኬስ።
- 8 ኡሬ ዙማፔ ቢዲ ሃማቴራ አዲ ቢዲ ጸዳዴ ጋኬስ።
- 9 ጌዴ ዚፒርኔ ፒኒዲ ሃጸራ-ኤናኔ ጋኪ ኤቄስ፤ ሃይሴ ኡባይ ኢንቴስ ፑዴሃ ባጋራ ዲዛ ዛዋ ጊዳና።
- 10 « አርሼይ ሞኪዛ ባጋራ ሃጸራ-ኤናኔፔ ቢዲ ሻፋሜ ጋካናስ ማላታ ዋላቴ።
- 11 ዛዋዚ ሻፋሜፔ ዶሚዲ አዩኔፔ አርሼይ ሞኪዛ ባጋራ ኤሬቢላ ካንላ አዲዲ ጋሊላ አባፌ አርሼይ ሞኪዛ ባጋራ ዲዛ ዘዜታራ ካንላዲ፤
- 12 ዮርዳኖሴ ሻፋ ዋዴስ፤ ሄራ ቢዲ ወርሴላዚ ሃይቆ አባ * ጊዳና፤ ሃይቲ ኢንቴ ቢታዮ ዩዩ አዲዛ ዛዋታ ጊዳና፤ ጋዳ አዛዛ።»
- 13 ሙሴይ ኢስራኤል አሳ፡ «ሳማ ዩጊዲ ኢንቴ ላታና ማላ ኡዴፋን ዛርኬታሲኔ ሚናሴ ዛርኬፌ ባጋይታስ ሄ ቢታይ ኢሜታና ማላ ጎዳይ አዛዚዴስ።
- 14 አርሴሌ ዛርኬቲ ጋዴ ዛርኬቲኔ ሚናሴስ ባጋ ዛርኬቲ ባስ ኢሜቲዳ ቢታ ላቲዳ።

* 34:12 ሃይቆ አባ፡ ሃይቆ አባ ጊዛይሳ ኢሲ ኢሲ ጌሻ ማጸፋ ቢርሼላቲ ማጸኔ አባ ጌቲስ።

15 ኢስቲካ ዮርዳኖሴ ሄ ፒንፋን ኢያርኮ ገናራ ኣርሼይ ሞኪዛ ባጋራ ባና ጋኪዛ ጸንጾዛ ኤኪዳ» ገ ዮቲዴስ።

ቢታ ገሻናስ ዶሬቲዳ አሳታ

16 ጎዳይ ሙሴስ ሂዝጊዴስ፤

17 «ቄሴ ኤልኤዘሬይኔ ናዌ ና ኢያሶይ ጋዴዛ ዴሬዘስ ገሼቶ።

18 ኢስቲ ቢታ ገሺዛ ዎዴ ኢስታ ማዳናስ ዛርኬፌ ዛርኬፌ ኮራፒኔ ኤካ።

19 ሄ ኔ ኤካና አሳታ ሱንፊ ሃይሳፌ ካሊዛይሳ፤ ዩሁዳ ዛርኬፌ ዮፊኔ ና ካሌቤ፤

20 ሲሞና ዛርኬፌ አሚሁዴ ና ሳሜላ፤

21 ቢኒያሜ ዛርኬፌ ኪሳሎኔ ና ኤልዳዴ፤

22 ዳኔ ዛርኬፌ ዮጊሌ ና ቡቃ፤

23 ዮሴፌ ዛርኬፌ ሚናሴ ባጋ ሱፊዴ ና ሃንኤሌ፤

24 ዮሴፌ ዛርኬፌ ኤፍሬሜ ባጋ ሺፊጾ ና ቃሙኤሌ፤

25 ዛቢሎኔ ዛርኬፌ ፔሪናኬ ና ኤልጻፋኔ፤

26 ዪሳኮሬ ዛርኬፌ ሆዛ ና ፓልቲኤሌ፤

27 ኣሴሬ ዛርኬፌ ሴሌሜ ና አሁዴ፤

28 ኒፍታሌሜ ዛርኬፌ አሚሁዴ ና ፔዳሄሌ።»

29 ሃይታንቲ ኢስራኤሌ አሳስ ካናኔን ቢታ ገሺ ኢማና ማላ ጎዳይ ዶሪዳ አሳታ።

35

ሌዌ ዛርኬታስ ኢሜቲዳ ካታማታ

1 ኢያርኮ ገናራ ዮርዳኖሴ ሻፋፔ ሄ ፒንፋን ዲዛ ሞኣቤ ዴሞባ ቦላ ጎዳይ ሙሴስ ሂዝጊዴስ፤

2 «ኢስራኤሌ አሳይ ባ ገሻፔ ገሻፔ ሌዌ ዛርኬቲ ዳና ካታማታኔ ሄ ካታማታ ዩሾን ኢስቲ ባ ሜሄ ኢዛን ሄማና ጋዴ ኢማና ማላ ዮታ።

3 ሄ ካታማቲካ ሌዌ ዛርኬታስ ዱሳሶ ጊዳና ጊዴስ፤ ሜሄ ሄሚዛሶሆቲ ኢስታ ሜሄይ ፔኢዛሶ ጊዳና።

4 ካታማታ ዩሾን ኢንቲ ሌዌ ዛርኬታስ ኢማና ሜሄ ሄንላ ጋዴዛ አኮቲላይ ካታማ ጊሞቤዛፔ ዶሚዲ ኦይዱ ባጋራካ 1,000 ዋቆ ዋቆ ጊዶ።

5 ሄሳ ማላን ካታማዛ ጊዶ አሊዲ ኦይዲ ባጋራካ ጉላፔ ቢዲ ጉላ ጋካናስ 2,000 ዋቋ ጊዶ፤ ሄሳ ሌዌ ቆሞቲ ባስ ሜሄ ሄንሳሶሆ ሂስቲቶ። *

ሼምፖ ዋዲዳይቲ ባቃቲ ኣቲዛ ካታማታ

(ዛሬ 19:1-13፤ ኢያ 20:1-9)

6 «ሌዌ ቆሞታስ ኢንቲ ኢሚዛ ካታማታፔ ኡሱፑናቲ ኣስ ዋዲዳ ኣሲ ባቃቲ ኣቲዛ ካታማታ ጊዳቶ፤ ሄይታፔ ሃራ 42 ካታማታ ጉጂ ኢሚቲ።

7 ኢስቲ ሜሄ ሄሚዛሶሆታራ ጉጂን 48 ካታማቲ ኢሜቲቶ።

8 ኢስራኤል ዛርኬቲ ላቲዳ ጋዴፔ ኢስታ ጋዴ ጋዴ ዳልጋቲላ ማላ ዳልጋ ጋዴ ኦይኪዳይታፔ ዳልጋ፤ ጸንላ ጋዴ ኦይኪዳይታፔ ጸንላ ኤኪዲ ሌዌ ዛርኬታስ ኢሚቲ።»

9 ጎዳይ ሙሴስ ሂዝጊ ዮቲዴስ፤

10 «ኔኒ ኢስራኤል ኣሳስ፤ «ኢንቲ ካናኔ ዴሬ ጌላናስ ዮርዳኖሴ ሻፋ ፒኒዛ ዋዴ፤

11 ኢሲ ኢሲ ኤርንታ ዲሼ ኣስ ዋዲኮ ሄሳዴይ ባቃቲ ቢዲ ኣታና ካታማታ ኔ ዶራ።

12 ሄ ካታማቲ ሼምፖ ዋዲዳዴይ ፒርዳስ ሺቆንታ ዲሺን ሃይቂዳዴ ዳሶይ ኢዛ ዋዲንታ ማላ ኢዚ ባቃቲ ኣቲዛ ካታማታ ጊዳቶ።

13 ሃይቲ ኢንቲ ሌዌታስ ኢሚዳ ኡሱፑን ካታማቲ ኤርንታ ሼምፖ ዋዲዳ ኣሲ ባቃቲ ኣቲዛ ካታማታ ጊዳና።

14 ሄ ካታማታፔ ሄቫቲ ዮርዳኖሴ ሻፋፔ ሄ ፒንላን ኣርሼይ ሞኪዛ ባጋራ ሃንኮ ሄቫቲ ቃሴ ካናኔ ቢታን ጊዳቶ።

15 ሃ ኡሱፑን ካታማቲ ኤርንታ ዲሼ ኣስ ዋዲዳ ኢስራኤል ኣሲ፤ ኢማላቲኔ ኢንቲ ጊዶን ዲዛ ሃራ ዴሬ ኣሳቲ ባቃቲ ኣቲዛሶ ጊዳቶ።

ሱላ ኣዛሬላ

16 « ኣሲ ኣሲ ቢራታፔ ኦሴቲዳዛን ኣስ ዋዲዳ ጊዲኮ ሄ ሼምፖ ዋዲዳዴይ ኢዚካ ኣሳ ኩሼን ሃይቆ።

17 ኢሲ ኢሲ ሹቻን ጫዲዲ ኣስ ዋዲዳ ጊዲኮ ሄ ሼምፖ ዋዲዳዴይ ኢዚካ ኣሳ ኩሼን ሃይቆ።

18 ኢሲ ኢሲ ሚላን ጫዲ ኣስ ዋዲዳ ጊዲኮ ሄ ሼምፖ ዋዲዳዴይካ ኣሳ ኩሼን ሃይቆ።

* 35:5 ጉላ ጌቲዛይሲ ኢሲ ኢሲ ባጋ ጋሞላ ቃላን ዞዜ ዋይኮ ዴንቁሼ ጌቲቲሰ።
35:8 ኢያ 21:1-42

19 ሄ ሃይቂዳይሳስ ማታ ዳቦይ ሱል አዛራናስ ዳንዳይዛ ጊሻስ አዋንካ ዳሚኮ ዋዳናስ ዳንዳይስ።

20 « ሲሲ አሲ ኦዲዲ አስ ሱጊ ዬጊ ዋዲኮ ዋይኮ ጌማሶን ኡቲዲ ኢሲ ሚሻን ጫዲ፥ †

21 ዋዲኮ ሞርኬቴላን ዳንዲዲ ኢጪ ዋዲኮ ኢዚ ሼምፖ ዋዲዳ ጊሻስ ኢዚካ አሳ ኩሼን ሃይቃናስ ቤሴስ፤ ሄ ሃይቂዳይሳስ ማታ ዳቦይ ሱል አጫናስ ዳንዳይዛ ጊሻስ አዋንካ ዳሚኮ ዋዳናስ ዳንዳይስ።

22 « ሲዶ አቲን ኢሲ አሲ ኤርንታ ዲሼ አስ ሱጊ ዋዲኮ ዋይኮ ቆፖንታ ዲሼ ኢሲ ሚሻን ጫዲ ዋዲኮ፥

23 ዋይኮ ኤርንታ ዲሼ ሹቶ ኢዛ ቦላ ዬጊ ዋዲዛ ጊዲኮ ሄሳዳይ ኢዛ ቆሃናስ ኦዲ ኦሶንታ ጊሻስ፥

24 ዳሬዚ ሄ ዋዲዳይሳ ጊዶኒኔ ሃይቂዳይሳ ዳቦታ ጊዶን አሜታና ፒርዳይ ሃይሳፌ ካሊዛይሳ ጊዶ።

25 ኤርንታ ዲሼ አስ ዋዲዳይሳ ሱል አጪዛ አሳ ኩሼፔ ዳሬዚ አሺዲ ኢዚ ባቃቲ አቲዳ ካታማ ዛር፤ ዛይቴን ቲዬቲዳ ቄሴታ ሃላቃይ ሃይቃና ጋካናስ ኢዚ ሄን ጋምኦ።

26 « ሲሰ ዋዲዲ ካሳሴቲዳይሲ ባቃቲ አቲዛ ካታማፔ ካሬ ኬዚዛ ጊዲኮ፥

27 ሱል አጪዛዳይ ዳሚዲ ኢዛ ዋዲኮ ሱል አጮን ኦይሼቴና።

28 አስ ዋዲዲ ካሳሴቲዳይሲ ቄሴታ ሃላቃይ ሃይቃና ጋካናስ ባቃቲ አቲዛ ካታማን ጋምኦ፤ ቄሴታ ሃላቃዚ ሃይቂዳፔ ጉዬ ኢዚ ባሶ ሲማና ዳንዳይስ።

29 « ሲይሲ ሃ ዋጋዚ አንቲ ዲዛ ዳሬ ኡባን አንቲሲኔ አንቲ ዜሬላታስ ኤቂ ዲዛ ዋጋ ጊዶ።

30 « ሲሼምፖ ዋዲዳ እይ አሲካ ሃይቆ ፒርዳ ፒርዳታናስ ዳንዳይዛይ ኢዛ ቦላ ናምኦ ማርካይ ዋይኮ ኢዛፔ ቦላራ ማርካቲኮ አቲን ኢሲ ማርካን ጸላ ሃይቆ ቂጻቲ ኤኬና።

31 ሼምፖ ዋዲን ሃይቆ ፒርዳይ ኢዛ ቦላ ፒርዳቲዳ አሲ ሃይቃና ቤሴስ አቲን ባ ዋዲዳ ሼምፖ ጊሻስ ሚሼ ቃንጺ አታናስ ዳንዳይና።

32 ኢዛን ባቃቲ አቲዛ ካታማ ባቃቲዳ ኦናፔካ ቄሴታ ሃላቃይ ሃይቃናፔ ካሴ ኢዚ ጉዬ ሲሚዲ ባ ቢታን ዳኦና ማላ ጊዲ ሱል ቃንጸ ኤኮፍቴ።

† 35:20 ኦዲዲ፡ ኦዲዲ ጊዛይሳ ኢሲ ኢሲ ባጋ ጋምኦን ኤሪዲ ዋይኮ ኤሪሼ ጌቴቲስ። 35:30 ዛሬ 17:6፤ 19:15፤ ታይ 27:7

33 እንቲ ሄሳዕ ኦሊዛ ጊዲኮ እንቲ ቢታ ቱኒሴታ፤ ጋሶይካ ኣሳ ሱል ጉሲዛይሲ ቢታ ቱኒሴሰ፤ ሄ ቢታይ ጌያናይ ኣሳ ሱል ጉሲዲዳ ሱሳይ ጉኪን ኣቲን ሃራን ጌዬና።

34 ታኒ እንቲ ጎዳ ጊዲዳ ጊሻሲኔ እንቲናራ ኢሰራኤል ዳሬዛ ጊዶን ዲዛ ጊሻሰ ታኒ ኢዛን ዲዛ ቢታ ቱኒሶፒቱ፡ ጋ ዮታ።»

36

ጲሎፋዴ ማጫ ናይታሰ እማቲዳ ጸንጾ

1 ዮሴፌ ና ሚናሴይ ዩሊዳ ማኪሬ ና ጋላኣዴ ዛርኬታ ካሌሊዛ ሃላቃቲ ሙሴኮኔ ኢሰራኤል ኣሳ ካሌሊዛይታኮ ሸቂዲ፤

2 «ኔኒ ሃኖ ቢታዮ ኢሰራኤል ዳሬዛሰ ሳማን ጊሻና ማላ ጎዳይ ኔና ኑ ጎዳዛ ኣዛዚዴሰ፤ ሄሳዕካ ኑ ኢሻ ጲሎፋዴ ጊሻ ኢዛ ማጫ ናይታሰ እማና ማላ ኔና ኣዛዚዴሰ።

3 ጊዶ ኣቲን ኢሰቲ ጌሊዛ ኣዚናቲ ሃራ ቆሞፌ ጊዲኮ ኢሰታ ጊሻ ጋዴይ ኑ ዛርኬታ ጸንጾፌ ቃንጾቲዲ ሄ ኢሰቲ ጌሊዳ ኣዚናታ ዛርኬታሰ ጉጃቲዛ ጊሻሰ ኑ ዛርኬታ ጸንጾዚ ካሴ ኤኬቶይሳፌ ፓጩ ጊዴሰ።

4 ዋዞ ላይሳይ ጋኪዛ ዋዴ ኢሰታ ጊሻዚ ኢሰቲ ጌሊዳ ዛርኬሰ ጉጃቲሰ፤ ሄሳ ጊሻሰ ኢሰታ ጸንጾይ ኑ ዛርኬታ ጸንጾ ፓጪንቹሰ» ጊዳ።

5 ሄሳፌ ጉዬ ሙሴይ ጎዳይ ኢዛሰ ዮቲዳ ማላ ኢሰራኤል ኣሳሰ፤ «ሚናሴ ዛርኬቲ ጊዳይሲ ዉሪካ ሊኬ።

6 ሄሳ ጊሻሰ ጎዳይ ጲሎፋዴ ማጫ ናይቲ ባ ዛርኬታ ጊዶፌ ባ ዶሲዳዴ ጌላናሰ ዳንዳዬቲሰ።

7 ሄሳ ማላን ኢሰራኤል ኣሳ ጸንጾይ ኢሲ ዛርኬፌ ሃራ ዛርኬን ኣቋፎ፤ ኢሰራኤል ኣሳይ ካሴ ባ ኣዋታፔ ላቲዳ ቢታ ሚንሊ ኦይኮ።

8 ኢሰራኤል ኣሳ ዛርኬታ ጊዶን ባ ኣዋ ጋዴ ላቲዳ ማጫሲ ኦኒካ ባ ቆሞ ጌላናሰ ቤሴሰ፤ ሄሳ ማላን ኢሰራኤል ኣሳይ ኡባይ ባ ኣዋታ ጸንጾ ናጋናሰ ዳንዳዬሰ።

9 ሄሳ ጊሻሰ ጋዴዚ ኢሲ ዛርኬ ኩሼፔ ሃራ ዛርኬ ኩሼን ኣቋናሰ ዳንዳዬና፤ ዉሪካ ባ ዛርኬን ዛርኬን ባ ቢታ ኦይኪ ናጎ» ጊዴሰ።

10 ጲሎፋዴ ማጫ ናይቲ ጎዳይ ሙሴ ኣዛዚዳ ማላ ኦሊዳ።

11 ጲሎፋዴ ማጫ ናይቲ ማሂሎ፤ ቲርጾ፤ ሆጊሎ፤ ሚልኮ፤ ኖኦ፤ ሄይታንቲ ባ ኣዋ ኢሻታ ናይታ ጌሊዳ።

12 የሴፌ ና ሚናሴ ዛርኬታ ጊደን አዚና ጌሊዳ፤ ሄ ኢስታ ቢታይ ኢስታ አዋታ ዛርኬ ሱንፋን ሚኒ አቲዴሰ።

13 ኢስራኤል አሳይ ኢያርኮ ጊናራ የርዳኖሴ ሻፋፔ ሄ ፒንፋን ሞአቤ ዴምባን ዲሺን ጎዳይ ሙሴ ባጋራ ኢስታሰ ኢሚዳ ዋጋቲኔ አዛዙቲ ሃይታንታ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b